

# JA ØGYAJPX<sub>Y</sub> JA ØMYADYA'AKY MIDI JA MARCOS YJAAY

Ku Juan Bautista  
kya'amaay abak etjotp

**1** Yide'en yiknimadyak'okwaañ ja øgyajpxy ja ømyadya'aky midi ja nwindsøn'ajtim Jesucristo yja'ajtpy, ja Dios U'nk. <sup>2</sup>Yide'en ja y'ejxi tyiyi tø dø'on ja Dios wyinaty kø'øm tnimaañi ja kyugajpxy Isaías, jøts ja yide'en tjaadya'ant ja ayuujk ku ja Dios Teety ja y'u'nk yide'en tnimaay:

Ngajxjawyeenip øts, u'nk,  
ngugajpxy tu'uk pøn nøjkkp  
jawyeen kugajpxy'ajtpi,  
ja'ats ja naqxwii'ñit jaa'y  
tnøjmip, jøts wan ja tyiktowdi  
tyiktuuda'akti ja wyinmaa'ñ,  
jøts mets ja m'ixpøjkin jade'en  
yikupøkt.

<sup>3</sup>Pø patyxi ja kugajpxy ñijky  
jawyeen abak etjotp  
jøts myigu'uk ja tnøjmit  
møk'ampy:

“Awejxidi Dios y'ixpøjkin,  
yiktowdi yiktuuda'akti  
mwinmaa'ñ yikxon.”

<sup>4</sup>Ja Juandam idø'on jam jade'en  
memp abak etjotp jøts jaa'y ja  
tyiknøbety, yide'en ja wyā'añ jøts  
ku ja jaa'y tuki'iyi tja'dyigøøgyøxti

ja kya'øyjaa'y'ajtin jøts wan  
tnøbajtkøxti, kuts idø'on ja  
jade'en ttu'undit winets ja  
yikpojkpimaa'kxtit. <sup>5</sup>Mayjaa'y  
idø'on ja jam nimejniyip jøts ja  
pyatmadøyi, mendip ja jaa'y jam  
pøn tsinaadyip Jude'it etjotp, jøts  
nayide'en pøn kugajp'ajtmidip  
Jerusalén; jade'en Juan ja mayjaa'y  
jam ñimiñiyi møj nøøjotp midi  
txøow'ajtp Jordán, jøts ja jam  
ñøbatti ku pyøky ja tkajpxnaxkøxti.

<sup>6</sup>Kameeyi pøjk wyet'ajtpy idø'on  
ja Juan wyinaty, jøts po'ak ja  
tsum'aty; ja' ja tø ñadyatsumyi jøts  
møj mu' ja jam tnidsøøni møøt ja  
jüyujk pa'ak, ja' ja jam yjii'kxpy.  
<sup>7</sup>Yide'en idø'on kya'amay mayjaa'y  
agujkp:

—Ja øts ja jaa'y tu'uk ix'oojk  
xpamiñ pøn møkta'aky yikutukp  
ja'agøjxp ku kutujk ja tmimiñ  
møk'ampy, ka'ap øts ja nmi'abaaty  
jade'en sa yikutuky, nijuuni øts  
ja møøt nganamyibaat'atiyit.

<sup>8</sup>Paty meets ixyam tiy janch  
ndyimdyukmadøy, jøts ku øts  
ja'ayi tø nnimiñ jøts meets nøø  
nduktanøbatt; jøts ku dø'on ja  
yja'att pøn øts idø'on ndijpy ix'oojk  
memp, jawaani øy ja tyunk ja

ttu'unt kumi Espiritu Santo ja  
tyuktatøkip ja jaa'y.

**Ku ja Jesús ñobejty**

<sup>9</sup>Xjats ja Jesús winet et chøø'ñ  
Nazaret, jam kajpkøjxp midi  
wyinaty Galile'it jaa'y y'etjotp, jøts  
ja ñijkxy nõbajtpi møj nõøjotp midi  
txøøw'ajtp Jordán, ma Juan ja  
yiknøbajti. <sup>10</sup>Xjats ku ja pyidsiimy  
møj nõøjotp, winets ja ojts t'ixy  
ja tsajp jøts ku ja y'awa'ach, jøts  
Espiritu Santo ja jade'en ñigida'agyi  
sam ja tsapak. <sup>11</sup>Xjats yikmadøøy ja  
Dios Teety y'ayuujk jap tsajpjøtpy,  
yide'en ja wya'añ:

—Øts me n'u'nk'ajtpy; njanchøjkpy  
mets jøts njanchtajotkujk'ajtpy mets.

**Ku ja Jesús miku' øjts yjot'ijxyi**

<sup>12</sup>Winets ja Espiritu Santo  
yiknøjkxøø jam abak etjotp, <sup>13</sup>jøts  
ja Jesús jam wixijkxyøøw chinaay.  
Xjats ja miku' ja yikpojkipitunwa'añi,  
jøts ja nijuuni tkamimadøøy. Jam  
idø'on ja chinaay ma ja may awa'añ  
jyuyk jam chøønidi, xjats ja ankilis  
ja pyudøjkøø.

**Ku ja Jesús tpadøjkiyi'ñ ja tyunk**

<sup>14</sup>Jøts ku ja Juan wyinaty tø  
yikpiktakni jap puxøjkjøtpy, winets  
ja Jesús chøø'ñ jøts ja ñijkxy  
Galile'it etjotp, ma ja tniga'amaay  
ja øgyajpxy ja ømyadya'aky,  
midi ñigajpxpy sa Dios ja yjaa'y  
ttanitanit ja kyutujk. <sup>15</sup>Yide'en ja  
wya'añ:

—Tønim inet ja xøøw ja et yja'aty,  
wingomp ixyam ja Dios kyutujk  
midi ya tu'ump. Yiktigatsti ja  
mdsinaa'yindi, ja'dyigøøgyøxti  
tuki'iyi ja mga'øyjaa'y'ajtindi,

jøts janchjawidi ja øgyajpxy ja  
ømyadya'aky.

**Ku ja Jesús twaadsøøy  
nimaktaxk ja ajkxmakpi**

<sup>16</sup>Jam idø'on mejpya'am midi  
txøøw'ajtp Galilea, jam ja Jesús  
wyinaty ñaxy ku ja t'ejxpaajty  
namajtsk ja jaa'y, ja Simón  
jam wyinaty møøt ja y'uch  
Andrés. Ajkxmaktip idø'on ja  
tyunk'ajttip, xyuumy ja jam  
wyinaty ñøøwejtspajttip midi ja  
tya'ajkxmaktip. <sup>17</sup>Xjats Jesús ja  
tnimaay:

—Mada'akti, møøt widettik øts  
jøts nduknijawidit sudso jaa'y ja  
nitso'ok'ajtin tpaaty.

<sup>18</sup>Ku ja jade'en yiknimaydi,  
winets ja jatyi tmatjstuttøø  
ja xyuumy midi ja wyinaty  
tya'ajkxmaktip, jøts ja  
tpadsoo'ndøø.

<sup>19</sup>Jawaani ja Jesús ojts yø'øxy xjats  
ja ojts t'ejxpaaty ja Jacobo, pøn ja  
Zebedeo wyinaty myajnk'ajtpy. Ja'  
jam wyinaty barkijotp t'adajkyidip  
ja xyuumy møøt ja y'uch Juan.  
<sup>20</sup>Xjats ja tyaa'jxyi'ñ, wyaadsoow  
ja'; winets ja tyeeety ja tunk ja  
ttukmidandøø jam barkijotp  
møøt ja tyumbi, jøts ja Jesús ja  
tmøøtnøjkxti.

**Tu'uk ja yaa'dyøjk pøn ja  
miku' wyinaty tø tyatøkiyi**

<sup>21</sup>Xjats ja ojts yja'atti Capernaum,  
jam møj kajpkøjxp; jøts ku poo'kxin  
xøøw tpaajty, winet ja Jesús ñijkxy  
yik'ixpøjkpi jam israelit jaa'y  
chaptøjkjotp. <sup>22</sup>Xjats ja jaa'y ja jam  
ñigyumaap tjawidi, ku Jesús ja  
jade'en yik'ixpikyidi sam ja jaa'y

pøn ja møk kutujk tmøøt'ajtp, ka'ap ja jade'en yik'ixpikyidi sam ja kajpxwejpitøjk pøn yik'ixpøjktip jap israelit jaa'y chaptøjkjøtpy. <sup>23</sup> Japts wyinaty tu'uk ja jaa'y tsaptøjkjøtpy pøn wyinaty ja miku' tø tyatøkiyi, ja' møk yide'en waan:

<sup>24</sup> —¿Mets Jesús, Nazaretit jaa'y, tiku øø tø xnimiñ, sa øø xunwa'lañ? ¿Ja' mets tø xnimiñ jøts øø xyikudigøøgyøxt? Wa'ats me n'ejxkapy pøni pøn mets. Ka'axi me mbøkmyøødi, Dios jaa'yxi mets.

<sup>25</sup> Xjats ja Jesús møk twingugajpxiyi'ñ ja miku', jøts ja tnimaay:

—iAmøñi, kidi nugo mgajpxy, tsojk majtstu'tut yø jaa'y!

<sup>26</sup> Xjats ja miku' møk'ampy tyikmiðeðjiky ja jaa'y, jøts ja møk chabaay, winets ja pyidsiimy. <sup>27</sup> Xjats ja mayjaa'y janchnigyumaap tja'widøø, jøts ja xem yam ñadyiibyikyidi kø'øm, yide'en ja ñawya'añidi:

—¿Ti wenk ixpøjkin ya'at? ¿Ti tunk yø jade'en tyumpy? ¡Janch møk kutujk tmøødi, mimadojip paat ja miku' yø' ku yø t'ane'emy!

<sup>28</sup> Xjats ja jaa'y ja tñimadoogøxti pøni niwine'en ja jam wyinaty chøønidi Galile'it etjotp. Niduki'iyi ja tñija'wigyøjxtøø ku ja Jesús jade'en t'odyuñ ja jaa'y.

### Ku ja Jesús tyikmøkpjiky ja Simón Pedro tyaakmø'jt

<sup>29</sup> Xjats ku ja Jesús pyidsiimy jam tsaptøjkjøtp, winets ja tmøøtnijkxy ja Jacobo møøt ja Juan jam Simón tyøjkwindum, ma ja wyinaty tmøøtsøøni ja y'uch Andrés.

<sup>30</sup> Jamts pamaay ja wyinaty

tmøødidi, tyaakmø'jt ja Simón wyinaty pøjkip, mowa'lañ jømba'am ja yjanchpiky; jøts ja Jesús ja ttukmadowdi ku ja jade'en pyiky. <sup>31</sup> Xjats ja Jesús twingume'eniyi'ñ ja pamaa'y, jøts ja ojts twejtsji'iky; ja'ayi ja jade'en ttuñ, winets ja pya'am jatyi ñiwaajtsøø; kuts ja jade'en yjajty, xjats ja tø'øxyøjk ja yikaajyidi nayjaty ku ja chøøjky.

### Ku ja Jesús tyikmøkpjiky ja maabyamaay

<sup>32</sup> Waani y'lijty ku ja xøøw yjejxy jøts ku kyoodsiña, winet ja Jesús yiktanimiñ ja mayjaa'y pøn wyinaty pøjkidip, jøts ja jaa'y pøn wyinaty tmøøt'ajttip ja miku'; <sup>33</sup> niduki'iyi ja kajp jaa'y myendøø tøk'agø'øm ma ja Jesús jam wyinaty. <sup>34</sup> Xjats ja may tyiktsøøjky ja pamaa'y pøn wyinaty tigati pøjkidip, ojts ja tyiktsokixy jøts ja miku' ja tyikpidsømgijxy midi ja jaa'y wyinaty myøøt'ajttip; jøts ka'ap ja miku' ja tyikajpxy, kumi ñija'wip ja' paty ja jade'en ttuñ jøts ja kyadamigajpxiyit jøts ku ja Dios U'ngi.

### Ku ja Jesús kya'amaay

<sup>35</sup> Xjats ku yjøpkyoost'ajty, jaakmøñim ja et wyinaty, winets ja Jesús myaabiði'jky jøts ja chøø'ñ jam kajpjotp, Dios Teety ja wyinaty y'ajot'atwampy, paty ja ñijkxy abak etjotp. <sup>36</sup> Xjats ja Simón choo'ndøø ixaabyi møøt ja myigu'uk, jøts ja tpaatwa'andi ja Jesús, <sup>37</sup> xjats ku ja tpaattøø winets ja tñimaadyøø:

—Mdum'ixaajyip jaa'y ixyam.

<sup>38</sup> Winets ja ñimaajyidøø:

—Wan tjaa'myindi abikyajp mididi wingon tandip, jøts øts

jam nayide'en nniga'ama'aty ja  
øgyajpxy ja ømyadya'aky; kumi ja'  
ø tø nnimiñ jøts øts jade'en ndu'unt.

<sup>39</sup>Xjats ja Jesús jade'en t'ayø'øy  
ja kajp midi jam wyinaty Galile'it  
etjotp, jøts ja kya'amay jam  
tsaptøjkjotp, jøts ja nayide'en  
tyikpidsimy ja miku' midi ja jaa'y  
wyinaty winaagin myøøt'ajttip.

**Ku ja Jesús tyiktsøøjky  
ja jaa'y pyu'uts**

<sup>40</sup>Xjats Jesús ja jaa'y tu'uk  
ñimejnøø pøn wyinaty axøø'kpm  
putsp, jøts ja wyinguxanaajyi,  
yide'en ja wyaañ:

—Møøt'ajtpy mets ja møk'ajtin  
jøts ø xyiktsø'okt, yiktsokts øts  
mdsojk'ajtingøjxp.

<sup>41</sup>Xjats ja Jesús ja y'ayo'ejxi, jøts  
ja tnixajiyi'ñ, yide'en ja tnimaay:

—Ndsøky'ajtpy øts jøts mdso'okt,  
tsokni.

<sup>42</sup>Ja'ayi ja jade'en wyaañ, xjats ja  
jaa'y ja pyu'uts jatyi ñiwaajtsiyøø  
jøts ja myøkpiky, møk møjaaw  
ja ñajja'wiyøø. <sup>43</sup>Winets ja  
Jesús ja pyagajxøø, yikxon ja  
y'ukyik'ane'emy, yide'en ja  
tnimaay:

<sup>44</sup>—Madow, kidi jaa'y xukmadøy,  
ka'ap pøn sã xnøjmit, nøjx jam  
teety wyindum jøts ja xuk'ext ku  
tø mdsø'øky, jøts nay jam idø'øn  
mdamiyoxp ja Dios ja jiyujk sã  
Moisés jekyip tyikutuky, jade'en  
ja jaa'y tñijawidit jøts ku me tø  
mjanchø'øky.

<sup>45</sup>Xjats ja jaa'y ñijxxy, jøts  
ja tuki'iyi ttamimadyakijxy ja  
mayjaa'y sudso pu'uts ja wyinaty  
tø ñiwa'achiyi. Paty ja Jesús øy  
mã kya'ukajptøjkini, jagam ja

wyidity mã ja et janch abak; jamts  
ja øy magama pøn ñidsøøni jøts ja  
yikninijxxy.

**Ku ja Jesús tyikpidi'jky ja  
køxujxpi pakxujxpi**

**2** Ku wyinaty kawinaak xøøw  
tø ñajxni, xjats Jesús jadigojk  
kyajptøjkii'ñ jam Capernaum; jøts  
jaa'y ja tñija'widøø ku ja wyinaty  
tø yja'aty jam tøjkjotp. <sup>2</sup>Xjats  
ja mayjaa'y jaty ñamyujkidøø,  
yikxon ja tøjx yjanch'ujch, ka'ap  
ja y'uknibaajtini; jøts ja Jesús  
jam tñiga'amay ja øgyajpxy ja  
ømyadya'aky. <sup>3</sup>Winets ja jaa'y  
yja'ttøø nimaktaxk pøn tkijja'ttøø  
tu'uk ja pamaa'y pøn wyinaty  
køxujxp pakxujxp. <sup>4</sup>Xjats ja Jesús  
ja tjpaatwa'andi, jøts kumi nima  
kya'awa'adsi kumi tø ja mayjaa'y  
wyinaty t'awa'kta'tsnidi ja tøjka'aw,  
winets ja tñitajuttøø ja tøjx jøts jut  
ja tyik'awatstøø. Japts pamaa'y ja  
tyikwinajktøø møøt ja myaabajt jap  
Jesús wyinduypy. <sup>5</sup>Xjats ku ja Jesús  
ojts t'ixy ja jaa'y pøn tyikmendøø  
ja pamaa'y jøts ku ja amuum  
yjanchjawiyi, winets ja pamaa'y ja  
tnimaay:

—Nbojkpimee'kxpy mets u'nk.

<sup>6</sup>Jamts wyinaty ja kajpxwejpitøjk  
chøøni pøn wyinaty ttuk'ixpøjktip  
ja Moisés kyutujk jam tsaptøjkjotp,  
ja'ats yide'en winmaadyøø: <sup>7</sup>“¿Ti yø  
jaa'y jade'en kyuwa'anip, sa jyaty?  
¿Tiku yø jade'en wya'añ? iKa'ap  
idø'øn jade'en y'øyi! ¿Pøn ja pøky  
ya t'ukmaa'kxp, kidi Diosip tu'ugyi  
tmaa'kxp ja pøky?” <sup>8</sup>Xjats ja Jesús  
ñija'wip ja wa'ats ku ja jaa'y jade'en  
wyinaty wyinmaydi, winets ja  
tnimaay:

—¿Tiku jade'en nichøky mwinnmaydi? <sup>9</sup>¿Ja ti ne'egi jawaani jajtni, kuts yø pa'amjaa'y nnøjmit: “Mee'kxpy øts yø mbøky”, uk ku nnøjmit: “Wa'lkuki, pøkmukni yø mmaabajt jøts nøjxni mdigam”?  
<sup>10</sup>Ixyamnim meets inet x'uk'ext mabaat øts idø'on ja møk'ajtin nmøøt'aty ya naxwiiñ jøts ø nmaa'kxt ja pøky.

Xjats ja tnimaay ja køxuxpi paxxuxpi:

<sup>11</sup>—Pidøkni, wa'kukiñi, wejtsjø'øk yø mmaabajt jøts mnøjxni mdigam.

<sup>12</sup>Xjats ja pamaa'y jaty pyidi'jky; ojts ja myaabajt ja twejtsji'iky, jøts ja jam cho'oni mayjaa'yjotp. Paty ja jaa'y niduki'iyi ñigyumaap tja'widøø ku ja pamaa'y jade'en myøkpjky, xjats ja Dios ja ttamøja'widøø, jøts ja wyandøø:

—Nimā niwindinim jade'en nga'ijxyindi.

### Ku ja Jesús tpawaay ja Leví

<sup>13</sup>Waani y'ijty, winets jadigojk chøø'ñ ja Jesús jøts ja ñijky jam mejy'agø'øm; jamts jaa'y ja yikxon yjanchniñi, jøts ja jam tyik'ixpiky. <sup>14</sup>Xjats ku dø'on ja ojts ñijky, winets ja t'ejxpaajty ja Leví, ja Alfeo y'u'nk, jam ja wyinaty chøøni mā ja ttukugubety ja jaa'y ja pyiktā'aky, xjats ja Jesús wyaañ jøts ja Leví yiknimaa'y:

—Wan tjaa'myim jøts øts n'ixpøjkin xpabøjkit.

Winets ja Leví jaty tyanaagyukiyii'ñ, jøts ja Jesús ja tpanijky.

<sup>15</sup>Xjats ja Jesús yikwaay migaabyi Leví tyøjkwindum, winets ja

yikugubajtpi yja'tmidøø, møøt jadu'ukpi jaa'y pøn kyabadundip ja myigu'uk chinaa'yin, jøts ja tu'ugyi twinguwa'ljtsidøø ja kaabyajt møøt ja Jesús jøts ja pyabøjkpitøjk; janch namay ja jaa'y jam wyinaty pøn ja Jesús pawidejtiyip. <sup>16</sup>Xjats ku ja kajpxwejpitøjk jøts ja fariseotøjk jade'en t'ejxtøø jøts ku ja Jesús jam wyinaty tmøøtkay tum ja ka'øyjaa'dyi, winets ja tnimaadyøø ja pyabøjkpidi:

—¿Jadits ku yø mwindsøn tmøøtkay yø yikugubajtpidi jøts yø ka'øyjaa'dyi?

<sup>17</sup>Xjats ku Jesús ja jade'en tmadøø, winets ja wyaañ:

—Ka'ap øts nyiktaniguexy jøts nbudøkit pøni pøn janch wa'ats ñayja'winiyip, ja'agøjxp ku ja pyøky kapøkyjawidi. Ja'ayi ja nbudøkip pøni pøn ñadyapøkyja'wiyidip ja pyøky. Nayide'en øts idø'on njaty sam ja tsøyibi kyanijky mā ja pamaa'y kya'ity. Jami ja ja'ayi ñijky mā ja pa'amjaa'y jam.

### Ku ja Jesús yiktiibyijky tigøjxp ku ja kya'ayuu'atti

<sup>18</sup>Tuk'ojk idø'on yjajty, ixam idø'on Juan Bautista pyabøjkpitøjk wyinaty y'amaay'atti møøt ja fariseotøjk, ayuu'ajttip ja jam wyinaty, Dios idø'on ja jade'en wyindsø'jkidip, winets ja jaa'y winaagin tnimendøø ja Jesús mā ja wyinaty jøts ja ttiibyøkti, yide'en ja tnimaadyøø:

—¿Jadits ku Juan pyabøjkpitøjk y'amaay'atti jøts ja fariseotøjk nayide'endi, ka'axi ja kyaydi, jøts sudso mets yø mbabøjkpitøjk nayide'en kya'amaay'atti, sudso

meets yjawí amgujk jotkujk mgaydi? Ka'ap meets yjawí ti xkumay.

<sup>19</sup>Jade'en ja wyandøø, xjats ja Jesús yide'en y'adsøøy:

—¿Winaak ojkimts meets jade'en tø x'uktani'ixy, winaak ojk meets jade'en tø x'uknijawi ku tø'øxñigaabyi tø'øxñi'ukpi tø y'uk'ayuu'atti ku ja jemyaa'y jam tø yja'tni? Ka'axi jade'en pøn y'ayuu'aty, ka'ap jade'en pøn tø t'amaay'aty. <sup>20</sup>Jaanim idø'on tiy yjanch'amaay'atti pøni ku ja wyinaty tø yiktawinwaadutnidi ja jemyaa'y, jam ja jade'en kyaydi amgujk jotkujk jøts ja jemyaa'y ja myidsep ja o'jkin jatyi tyuk'anøjkxiyi. ¿Pønts jade'en kidi yjotmay'øøky? ¿Sudso dø'on jotkujk ngaa'yint n'uujkint? Pø nayide'lenxi øts idø'on yø nbabøjkpitøjk yam xjawidi ku njaakyam'aty.

<sup>21</sup>'Ka'axi pøn wyetpach tta'agiya jemwyet midi tyimyjemñim; ku ja jade'en yiktu'unt, jøts kumi mujkpi ja jemwyet, jøts ja tjaaktyimgyøø'tsni ja wetpach, jaaktyimyiwenip ja kyøøts'ajtin ja'. <sup>22</sup>Jøts nayide'en ka' y'øyi jøts yikpikta'akt ja vino jap po'dukjotpy midi namii'kxñim; ku ja jade'en ndu'unint, takøø'tsipts ja po' jøts jade'en nugo wyindigøy, windigøøpy ja po' jøts nayide'en ja vino. Paty ja vino midi namii'kxñim nda'ada'amyin ja jembyo'ak, jøts jade'en nimidi kyawindigøøty.

**Ku ja Jesús pyabøjkpitøjk  
poo'kxin xøøw et y'ariindøjtøø**

<sup>23</sup>Tuk'ojk idø'on yjajty ku poo'kxin xøøw wyinaty tø tpaaty,

winet et ja Jesús ja pyabøjkpitøjk tmøøtnajxy jam kamjotp ma ariingam jam wyinaty; jam idø'on ja wyinaty ñaxti ku ja pyabøjkpitøjk ttøjpinaxwa'ktøø ja ariindøøm. <sup>24</sup>Xjats ku ja fariseotøjk ja ojts jade'en y'ijxyidi jøts ku ja jade'en y'adø'øtsti, winet ja Jesús jatyi yiknimaay:

—iEjx yø mbabøjkpitøjk! ¿Tiku yø jade'en y'adø'øtsti, tiku ariin yø ttøjti, kumi ka'ap jade'en kyutukyi jøts yø jade'en y'adø'øtstit ku poo'kxin xøøw?

<sup>25</sup>Winets ja Jesús y'adsøøy, jøts ja wyaañ:

—Nugo meets mjanchkajpxy. Tø meets ja nøky xja'ixy midi wamp jøts ku ja David yide'en y'adiijch møøt ja myigu'uk ku yuu ja pyaajtidøø, ku ja wyinaty niti kya'ijtxyidi. <sup>26</sup>Winets ja ñøjkxtøø jap tsaptøjkjotpy ma ja Abiatar jap wyinaty tyetywindsøn'aty, japts ja t'amidøøy ja tsapkaaky midi ja Dios yja'ajtpy jap wyinaty. Ja'ats ja ojts tkaydi midi ka'ap kyutukyi jøts nugo jaa'y ja tka'adyit. ¿Jøts tiku dø'on ja jade'en y'adiijch pøni ka'adam ja jade'en kyutukyi? ¿Tiku myigu'uk ja nayide'en ttukaay ja tsapkaaky, pøni jade'endam ja kyutukyi jøts ja ja'ayi tka'adyit pøn teety'ajttip?

<sup>27</sup>Nayi waan ja Jesús yide'en:

—Ja'agøjxp ja poo'kxin xøøw yikpiktaajky jøts ja jaa'y yikpudøkit, kidi ja'ajip poo'kxin xøøw yiktanibiktaajkiyii'ñ jøts jaa'y niti kyidyimdyu'undit. <sup>28</sup>Ngudanaapy øts ja naxwii'ñit jaa'y, jøts øts wamp ti paat'ajtip kapaat'ajtip yiktu'unt ku poo'kxin xøøw.

**Ja jaa'y pøn wyinaty ja  
kyø' jadi'iñi tøøtsnip**

**3** Xjats ja Jesús jadigojk tyøjkiyi'iñ jam tsaptøjkjotp ma yaa'dyøjk ja tu'uk tpaajty, midi wyinaty tuktamajñ køxujxp. <sup>2</sup>Jøts ja Jesús jam a'ejxuky y'ity, ja' ja jaa'y y'ejxwandip pøni y'ukyiktsøkpy idø'on ja jaa'y ku poo'kxin xøøw, winets ja jatyi tni'øønidit. <sup>3</sup>Xjats ja Jesús tnimaay ja yaa'dyøjk pøn ja kyø' wyinaty xujxp:

—Pidø'øk jøts ixø nøjkx mdani kuk'ajy.

<sup>4</sup>Xjats ja Jesús ttiibyijky ja jaa'y pøn ja jam wyinaty a'ejxujkiyidip, yide'en ja tnimaay:

—¿Midi'ibi ixyam kutuky, ku jaa'y n'ødyu'unint, uk ku jaa'y nga'ødyu'unint? ¿nyiknitsoojkimp ja jaa'y, uk nyik'oo'kimp ku poo'kxin xøøw, midi'ibi øy?

Xjats ja jaa'y amøni y'etti, nipøn sã kyawa'añ. <sup>5</sup>Winets ja Jesús ja twin'ejxji'jky ambøjkin'ampy, jøts ñiyjotmay'oo'kni dø'on ja Jesús y'ejxji'jky, ja'agøjxp ku ja jaa'y niwine'en tkaja'gyukidi. Jøts ja tnimaay ja jaa'y midi wyinaty køxujxp:

—Xajtøw.

Xjats ja xyajtiy, jøts ja kyø' ja møk tyaañ, ojts ja chø'øky. <sup>6</sup>Winets yø'øpyidsømdøø ja fariseotøjkti, jøts tminagyajpxidi ja Herodes myigu'uk, ja' ja kyajpxy'ajttøø sudso t'ukyik'ooktit ja Jesús.

**Ja mayjaa'y pøn jam  
wyinaty mejy'agø'øm**

<sup>7</sup>Xjats ja Jesús chøø'ñ, jøts ja pyabøjkpitøjk ja ojts tmøøtniikxy

jam mejy'agø'øm, winets mayjaa'y ja pyanøjkxidøø pøn jam wyinaty Galilea kugajp'ajttip. <sup>8</sup>Xjats ku mayjaa'y ja ojts tñimadowdi jøts ku ja Jesús jade'en tjanch'ødyuñ ja jaa'y, winets jam øy pøn jaa'y myendøø, pømbi tsoo'ndip jam Jude'it etjotp, pømbi Jerusaléngit kajpjotp, pømbi Idume'it etjotp, pømbi tsoo'ndip wingon ma ja møj nøø midi txøøw'ajtp Jordán, pømbi tsoo'ndip jam Tiro etjotp, jøts pømbi tsoo'ndip jam Sidón etjotp, jade'en ja mayjaa'y ja jam ñimejniyøø. <sup>9</sup>Ja'agøjxp ja Jesús ojts t'ane'emy ja pyabøjkpitøjk jøts ja jam tyik'awejtiti tu'uk ja barki, jøts mayjaa'y ja kya'adejmukiyyit. <sup>10</sup>Kumi tø ja wyinaty kawinaak tyiktsø'øky ja jaa'y, tum jam ja pamaa'y wyinaty tø ñaxkida'akti ja' ñikøjxp jøts ja cho'okti. <sup>11</sup>Jøts ku ja Jesús maamyiku' y'ejxpaadyiyi midi ja mayjaa'y jam myøøt'ajttip y'am yjotp, jatyi ja wyinguxaniyi jøts ja ñii'mxyi:

—Dios U'nk mets.

<sup>12</sup>Xjats ja møk tnøjmi jøts ja ka'ap ttukmado'odit ja mayjaa'y jøts ku ja Dios U'ngi.

**Ku ja Jesús twiwijch ja jaa'y  
nimakmajtsk pøn ja wyinaty  
kyudanaabyi'atwampy**

<sup>13</sup>Xjats ja Jesús pyatøjkiyi'iñ kojpkøjxp, ma ja jaa'y ja twaadsøøy pøni pøn idø'on ja kø'øm chøjkpy, winets ja jam ñimejniyøø ja jaa'y pøn ja wyinaty tø twaadsøy. <sup>14</sup>Jøts ja nimakmajtsk twiwijch pøn ja ejtp myøøtwidetwampy, jøts pøn tniga'ama'adyip ja øgyajpxy ja ømyadya'aky; <sup>15</sup>xjats ja ktutujkmøøy

jòts ja tyiktso'oktit ja pamaa'y, jòts ja miku' ja tyikpidsò'òmdit midì ja jaa'y winaagin myòòt'ajttip. Jade'en tyajky ja kutujk. <sup>16</sup>Nimakmajtsk idò'on ja jaa'y jam wyinaty: jam ja Simón wyinaty pòn nayide'en yiktejp Pedro; <sup>17</sup>jòts nay jam ja Jacobo wyinaty mòòt ja y'uch Juan, ja Zebedeo y'unaj'jk midì xòbajtòò Boanerges, ja' idò'on tyijpy midì mòk mòk ja jaa'y myigajpxtip ejxim ja anaaw pyijy, ka'ap idò'on chò'ogidi; <sup>18</sup>Nay jam ja jaa'y wyinaty midì txòow'ajttip Andrés, Felipe, Bartolomé, Mateo, Tomás, Jacobo ja Alfeo y'u'nk, Tadeo, jòts ja Simón midì tsoo'mp canaangit jaa'y y'etjotp, <sup>19</sup>jòts nay jam ja Judas Iscariote wyinatymi midì tkòyajk ja Jesús.

**Ku ja Jesús yiknimaay jòts ku miku' myòk'ajtin ja tyiktuujni**

Xjats ku ja Jesús wyimbijty kojpkòjxp, winets pyabòj'kpitòjk ja tmòòtòjkiyìi'ñ tòjkjòtpy, <sup>20</sup>jòts ja jaa'y yikxon ñamyujkidi jadigojk, nigidibaat ja Jesús y'ukaañidi mòòt ja pyabòj'kpitòjk. <sup>21</sup>Xjats ku ja Jesús myìgu'uk ñimadojìyòò jòts ku ja jam wyinaty, winets ja ñimejni jòts ja yiktsoonwa'añi kumi jade'en ja wyinaty wyinmaydi jòts ku myò'òty ja Jesús.

<sup>22</sup>Nayi tò ja kajpxwejpitòjk wyinaty myeemidi jam pòn tsoo'ndip Jerusalén, xjats ja wya'andi:

—Miku' windsòn yò jaa'y myòòt'ajtpy, ja Beelzebú, ja' yò tyamòj paty yò myayi jòts yò tyikpidsimy myimiku' midì yò jaa'y jadu'uk myòòt'ajttip.

<sup>23</sup>Xjats ja Jesús twaadsòoy ja jaa'y, jòts ja ttukwinjawiwya'añ tu'uk ja madya'aky, paty ja wya'añ:

—¿Sudso ndejint miku' kò'òom ñankpyidsòmìyit aguwanikòjxp? <sup>24</sup>Jòts nayide'en ku tu'uk kajp ñawya'kxyi, jòts ja tsep ttundi agò'òmyi, ka'ap ja kajp jeky y'lity, jatyi ja jaa'y jadi'ìni ñankyixyidi; <sup>25</sup>nayide'en jyaty ku jaa'y ñachiigyidi ni'u'nk ni'unaj'jk, ka'ap ja jeky chò'onidi. <sup>26</sup>Jòts ku miku' kò'òom ñañibidò'ogiyit, tò dò'on ja wyinaty kyawindi, ñankyudigòjyip idò'on ja wyinaty kò'òom.

<sup>27</sup>Nipòn midsep jap jadi'ìni kyatòki jap jotmòk jaa'y tyòkjòtpy, kunim ja tkòwòòndit tpakwòòndit; winetnimts ja tpòkòjxidit ja pyikta'aky. ¿Ti sudso òts yò jaa'y jeexyip ja miku' ndukmajtsu'uty kuk òts ja miku' windsòn jawyeen tò ngamimada'aky?

<sup>28</sup>Janch meets idò'on nnòjmi, jòts ku ja jaa'y ja pyòky tuki'iyyi yikmee'kxy, tuki'iyyi yikmaa'k'kxixy ja ka'òñigajpxy ja ka'òñimadya'aky; <sup>29</sup>ja' nijuuni kyayikpoj'kpimaa'kxp pòni pòn tka'òñigajpxp tka'òñimadyakp ja Espiritu Santo, ejtp ja pyòky ja tmi'ity.

<sup>30</sup>Ja'agòjxp ja Jesús jade'en wyaañ ku ja wyinaty jade'en tò yiktijy jòts ku miku' ja tmòòdi, jòts Espiritu Santo tkamòòt'aty.

**Ja Jesús tyaaak jòts ja y'uch**

<sup>31</sup>Waani y'ijty, xjats ja Jesús y'uch yja'ttòò mòòt ja tyaaak, jòts ja jap tòk'agi'py wya'k'òyidi, japts ja tñankwyaadsòj'idòò ja Jesús.

<sup>32</sup>Winets Jesús ja jaa'y ñimajyòò pòn ja jap wyinaty wingon windsinaajyip, yide'en ja wyandòò:



—Ixap ja mdaak y'awijxy  
tøk'agi'py møøt ja m'uch, mets  
myik'ixaapy.

<sup>33</sup>Xjats ja tnimaay:

—¿Pøn øts idø'on xuktaak'ajttip,  
jøts pøn øts idø'on xuk'uch'ajttip?

<sup>34</sup>Winets ja twin'ejxji'jky ja  
mayjaa'y, jøts ja tnimaay:

—Yø' øts idø'on ndaak'ajtpy, jøts  
yø' øts idø'on n'uch'ajtpy pøn øts ya  
wingon xwindsinaadyip. <sup>35</sup>Ja' øts  
idø'on n'uchip, jøts ja' øts idø'on  
ndaagip pøni pøn tpadundip sa ja  
Dios chojkin.

**Ku ja Jesús tmadyakpaaty ja  
jaa'y midi nøjx neppi**

**4** Xjats ja Jesús jadigojk  
yik'ixpøjktøjkii'ñ jam  
mejpya'am ma ja jaa'y ja ojts  
ñimiñiyi may'ampy, jøts ja jam  
ñañimukpajtidøø. Ku dø'on ja  
jade'en janch namaydi, winets ja  
Jesús tyøjkii'ñ jam barkijotp midi  
wyinaty nøøjotp, jamts ja y'ixaajky  
jøts ja mayjaa'y jam nøø adsayjotp  
tyandøø. <sup>2</sup>Jamts ja tyik'ixpijky  
jade'en, may ja ejxpajtin madya'aky  
ja jam tniagjpxy, yide'en idø'on  
ja tnimaay ja mayjaa'y ku ja jam  
yik'ixpijky:

<sup>3</sup>—Øyim idø'on xmado'odit:  
Tu'uk idø'on jaa'y chøø'ñ ariin  
wøjpi. <sup>4</sup>Jøts ku dø'on ja ojts  
twøjwidity ja tyømt, winet ja tømt  
waani ñaxkidaajky jam tuu'ba'am,  
ja'ats ja joon jam ñimeen jøts ja  
wa'ats tpeemujkijxy. <sup>5</sup>Nayide'en  
ja tømt jam waani ñaxkidakmøø  
tsaajotp ma ja naajx øy kya'ity;  
xjats ja ariindømt jam janch  
tsojk myujxy, kumi ka'ap ja naajx  
wyinaty myajpxyi. <sup>6</sup>Jøts ku ja

xøø'an myiiñ, winets ja tyiijch,  
ja'agøjxp idø'on ja jade'en yajty  
ku ya'aats ajawi kya'ity. <sup>7</sup>Nayi  
naxkidaajk ja tømt jam kujp agujkp;  
jamts ja yjanchni'aa'mbejty ku ja  
kujp yikxon yondøø jøts ja jade'en  
kyatøømiyii'ñ. <sup>8</sup>Nayi naxkidaajk ja  
tømt jam øñaxjotp. Ojts ja yikxon  
yøñ, yikxon ja jam yjanchtøømiyii'ñ  
midi'ibi ee'pxmajk ja pyajkwimbejt  
tu'ukpi tømt, midi'ibi tugi'pxy  
pajkiyii'ñ, jøts midi'ibi magø'pxy,  
jade'en ja ariindømt pyajkejty.

<sup>9</sup>Xjats ku ja Jesús jade'en  
myadyakijxy, winets ja tnimaay ja  
mayjaa'y:

—iPøni pøn ja'gyukiwyampy, wan  
tja'gyuki!

**Tigøjxp idø'on ja Jesús ejxpajtin  
madya'akyøjxp ja y'ixpøjkin tyaky**

<sup>10</sup>Xjats ku ja mayjaa'y choo'ndi,  
jøts ja Jesús jam tyaañ, winets  
ja tyiktøødi ja namakmajtsk  
pyabøjkpitøjk, jøts nay ja  
pyabøjkpitøjk pøn ja jam wyinaty  
myøøt'ajtpy, ja' ja ñijawiwyandip ti  
dø'on ja madya'aky jade'en tyijpy,  
sudso ja yikja'gyuki. <sup>11</sup>Xjats Jesús  
ja ñimaajyidøø:

—Meets nugo myiktukmadoop  
ja' midi ka'ap y'ijty yiknijaw i pøni  
sa ja Dios kyutujk y'ejxi tyiyi midi  
ja tyanitanaapy ja yjaa'y; jøts pøn  
øts ngutujk xkababøjkidip ka'ap  
ja jade'en tiy yiktukmadowdi,  
ejxpajtin madya'akyøjxp ja  
yiktukmadowdi; <sup>12</sup>jøts ja  
jade'en kyawinmaa'nbyaattit  
ku ja ti tjaniwinmayidi, ka'ap  
ja tmadoogukidit pøni sa jaty  
ja yjayiknøjmidi, paty idø'on  
ja jade'en yjatti ku øts ja

kø'øm xkajanchjawidi, kø'øm idø'on ñadyuñidi paty ja pyøky kayayikmaa'kxtit.

**Ku ja Jesús tñigajpxy sudso dø'on yikja'gyukit ku jaa'y neppi ñijkxy**

<sup>13</sup>Winetnimts ja wyaañ:

—¿Ka'ap xja'gyukidi yø ejxpajtin madya'aky, sudsomts meets ja xjanchja'gyukigyøxt jadu'uk ja ejxpajtin madya'aky? <sup>14</sup>Pøn ja ariindømt twøjp, jade'en idø'on ja n'ukpiktaajkint ejxim ja jaa'y midi ja øgyajpxy ja ømyadya'aky tkajpxwa'kxp. <sup>15</sup>Jøts winaagin jaa'y jade'endi ejxim ja tømt midi naxkidaajk jam tuu'ba'am: y'amidoodujktip ja' ja øgyajpxy ja ømyadya'aky, jøts ku ja jade'en tmadowdi, winets ja miku' ja jatyi ñimiñidi jøts ja pyøjkxyidi ja øgyajpxy ja ømyadya'aky midi ja wyinaty tø y'ukjotøkiyidi. <sup>16</sup>Nayide'en ja jaa'y winaagin n'ukpiktaajkma'ant ejxim ja tømt midi naxkidaajk jam tsaajotp: pyatmadoodip ja' ja øgyajpxy ja ømyadya'aky ñixyondakni, jøts kumi ka'ap ja tmimøk'etti, <sup>17</sup>jade'en ja yjatti ejxim ja ariin y'aats ajawi kya'ityin; ka'ap ja jeky tmi'etti ja'agøjxp ku ja tku'ayo'ombaadidi ja øgyajpxy ja ømyadya'aky, winets ja tmajtstu'utti, ka'ap ja tu'ugyi tpadundi. <sup>18</sup>Nayide'en jaa'y winaagin yjatti ejxim ja tømt midi jam yikwøj kujp agujkp: yjapatmadoodip ja' ja øgyajpxy ja ømyadya'aky, <sup>19</sup>jøts ja' ja ne'egi tyajotigøødyip ja pyikta'aktyi ja jujky'ajtindi midi ya naxwiñ, ja' møjtojkidip jøts ja tyikudigøy ja øgyajpxy ja ømyadya'aky, jøts

ja jaa'y tkayikwingaxø'øktit ja Dios kyajpxy. <sup>20</sup>Ja jaa'y nayide'en winaagindi pøn tpatmadoodip ja øgyajpxy ja ømyadya'aky jøts ja yjotøkiyidi, winets ja tyikwingaxø'økti jade'en ejxim ja tømt midi yikwøjp jam øñaxjotp. Winaagin ja jaa'y jade'endi ejxim ja tømt midi tyøøm tyikwimbejtp may, midi'ibi ee'pxmajk pajkiyii'ñ, midi'ibi tugi'pxy jøts midi'ibi magø'pxy.

**Niti jadi'iñi kyatañ, kuwañim ja tyimiyikñijawi**

<sup>21</sup>Nayide'en pyabøjkpitøjk ja tnimaay:

—¿Ti ja' ndejint jaj wya'añ jøts ja yikñijupt jap kajuun patki'py, uk jøts ja yikpikta'akt jap maabajt patki'py? Ka'ap ja jade'en pøn tyiktuñ, køjxp ja yikpikta'aky, jamts ja yjajy. <sup>22</sup>Ti yjawi ka'ukyikpatp ku ti jjayu'uch'ity, ti tunk uk ti winmaa'ñ yjawi ka'ukyikñija'wip ku ti yik'amaa'tsk'aty. <sup>23</sup>Jamxi mdatskti, tamadowdi yikxon.

<sup>24</sup>Nayide'en pyabøjkpitøjk ja tnimaay:

—Øyim xpatmado'odit yø ixpøjkin midi myiktukmadoodip. Nayide'en meets ja wijy'ajtin myikmo'ot pøni sa meets ja jaa'y xukniweji ja Dios y'ixpøjkin; jøts mjaaktyimñijawip meets ja jawaani pø xmadoopxi meets yam kø'øm. <sup>25</sup>Jaaktyimiyikmøøpy ja wijy'ajtin ja' pøn ja'gyukip; jøts pøn kaja'gyukip, jaaktyimiyikpøkøjxp tuki'iyi ja' ja wyiyj'ajtin.

**Ku yiknimadyaajky ja tømt midi mujxp jøts midi yomp**

<sup>26</sup>Nayide'en pyabøjkpitøjk ja tnimaay:

—Jade'en idø'on ja Dios kyutujk midi ja tyanitanaapy ja yjaa'y, jade'en idø'on ja n'ukpiktaajkint sa ja jaa'y yjatyin ku tyømt ja twøjy naxjotp; <sup>27</sup> mya'ay ja koots pyidi'iky ja jøpy, najxpts idø'on ja xøow tsuu jade'en, mujxp ja tømt jap, yomp idø'on ja jap, jøts ja jaa'y ka'ap tniyaw i tigøjxp idø'on ja jade'en yjaty. <sup>28</sup> Jøts kumi ja naajx idø'on ja jade'en ñamyayi kø'øm nanntyøømbidsøjmiyip; ku jawyeen pyidsimy ja ariindeky, jøtsnim ja kyojki, jøtsnim ja tyøømbajtni; <sup>29</sup> kuts ja myijay, winets ja jaa'y choondi jøts ja twejxwa'andi, kumi tø ja ariin wejxk'aats tpaaty.

**Ku ja Jesús tmadyakpaaty  
ja mortas tømt**

<sup>30</sup> Nayide'en ja Jesús tnimaay ja pyabøjkpitøjk:  
—¿Ti ja Dios kyutujk møøt ndami'ejxi'int midi ja tyanitanaapy ja yjaa'y, ti ixpøjkin ti madya'aky ja ndamimado'owint? <sup>31</sup> Jade'en idø'on ja n'ukpiktaajkint ejxim ja mortas tømt midi yikwøjp jam naxjotp. Ka'ap jadu'uk ujtspajk te ya naxwiiñ midi janch mutsk sa ja møj mortas tøømdin; <sup>32</sup> jøts ku ja yikwijy, janch yikxon ja yøñ, wyinajxkijxpy ja tuki'iyi ja ujts midi yikjagyajp jap kemyjøtpy, yikxon ja janch møj y'awaji y'axeñi, japts ja joon patki'py y'aptsø'okti.

**Tigøjxp ku Jesús xumi  
jade'en tyik'ixpiky ja jaa'y  
ejxpajtin madya'akyøjxp**

<sup>33</sup> May ja Jesús ja jaa'y jade'en ejxpajtin madya'akyøjxp tyik'ixpijky ku ja tnan'ky'ixpøjkøø

ja øgyajpxy ja ømyadya'aky, jade'eñi paat ja y'lijty tmadya'aky mabaat ja kø'øm tnajtsjawi ja jaa'y tnmadowdi. <sup>34</sup> Jøts ejtp idø'on ja Jesús jade'en tyik'ixpijky ja jaa'y ejxpajtin madya'akyøjxp, jøts tyukmadøøpy pyabøjkpitøjk ja wa'ats pøni ti dø'on ja jade'en tyijpy.

**Ku ja Jesús tyiknajxy ja møk poj,  
jøts ku ja tyik'amøkiyii'ñ ja mejy**

<sup>35</sup> Xjats ku kyoodsiyii'ñ ja et nay ja'abi xøow, winets ja tnimaay pyabøjkpitøjk:

—iWan tjaa'myindi jaduktamajñ'ampy jam nøøba'am!

<sup>36</sup> Xjats ja jade'en tminawya'kxidøø ja mayjaa'y, jøts ja jap barkijøtpy tyiktsoo'ndøø ja Jesús mayim ja jap wyinaty, ojts abikbyarki ja pyadsøøñidi, ja' ja ojts tmøøtnøjkxti. <sup>37</sup> Xjats ja poj jam janch møk myiñ, jøts ja nøø møk'ampy y'adøtspinaaxwa'jky, yikxon ja yjanchtojmji'jky jøts ja kom nøø tyøjkiyii'ñ jam barkijotp, ujtsnip ja wyinaty. <sup>38</sup> Jamts ja Jesús wyinaty mya'ay barki ix'am, tø ja jam wyinaty ñagyukøyiyi; winets pyabøjkpitøjk ja ojts yuxyi, jøts ja ojts ñii'mxyi:

—iWindsøn! ¿Kidi mdsø'øgi ku nnøjøø'kxin uk ku n'oo'kin?

<sup>39</sup> Xjats ja Jesús pyidi'jky jøts ja møk twingugajpxiyii'ñ ja poj; jøts yide'en ja mejy tnimaay:

—iMimadook øts et, kidi m'adi'ich!

Winets ja mejy jaty i y'amøkiyii'ñ jøts ja tu'ugyi tyaañ.

<sup>40</sup> Xjats ja tnimaay pyabøjkpitøjk:  
—¿Jadits ku mdsø'øgidi, tigøjxp ku ø xkajanchjawidi?

<sup>41</sup>Winets ja yjanchø'jkidøø,  
yide'en ja kø'øm ñawyajnidøø:  
—iPønims idø'øn ya'at  
ndejiñt, sudso poj sudso mejy yø  
myimadøyi!

Ja Gadarit jaa'y pøn wyinaty  
ja miku' tø tyatøkiyi

**5** Xjats ja ttayø'øñajxtøø ja  
nøø, jøts ja yja'ttøø jam  
nøøba'am ma dø'øn ja naajx  
wyinaty txøøw'aty Gadara. <sup>2</sup>Xjats  
ku ja Jesús yø'øpyidsiimy jam  
barkijotp, winets jaa'y ja tu'uk  
ñimejnøø midi jam wyinaty  
tsoo'mp jam kami santijotp ma ja  
oo'kpi ñaxøkidi, miku' ja wyinaty  
myøøt'ajtpy. <sup>3</sup>Jam idø'øn ja  
wyinaty tyimchinaadyakni ma ja  
oo'kpi ñaxøkidi, jøts ka'ap idø'øn ja  
pøn pujx kadeen y'uktaxojtsiniyi  
y'uktabakxojtsiniyi. <sup>4</sup>Kumi tø ja  
wyinaty kawinaak ojk jade'en  
yjayiktuñ, xjats ja jatyi ttapoti,  
jadi'iñi ja pu'xk tanuki, ejtp idø'øn  
ja jade'en txumituñ jøts ja jade'en  
nipøn kyamayi. <sup>5</sup>Ejtp idø'øn ja  
xyumiwidity xinaxy tsunaxy, jam  
ja kojpkøjxp jam ja kami santijotp  
muum chabaawidity, jøts tsaä ja  
jam kø'øm yjanchnadyuktatsaachiyi.  
<sup>6</sup>Xjats ku ja jagamyi t'ejxpaajty ja  
Jesús, winets ja ojts putyi tñinijkxy  
jøts ja twinguxanaay, <sup>7</sup>yide'en ja  
møk'ampy tñimaay:

—¿Jesús, Dios U'ñk, ti ø  
xanimemp, sa ø xunwa'añ?  
Njanchminuu'kxakpy tun  
may'ajt Dios køjxpit, kidi ø  
xyik'ayo'ombaaty.

<sup>8</sup>Ja' idø'øn ja jade'en  
kyuwa'aniiyi'ñ kumi yide'en Jesús  
ja wyinaty tø ñii'mxyi:

—iMiku', majtstu'ut yø jaa'y!

<sup>9</sup>Xjats ja Jesús wyangojmoø:  
—¿Ti me mxøøw?

Winets ja miku' y'adsøø jam  
jaa'y y'am yjotp, jøts ja wyaañ:  
—Legión øø nxøøw, ja'agøjxp ku  
øø nnamayi.

<sup>10</sup>Yikxon idø'øn ja  
tjanchminuu'kxa'jky ja Jesús, jøts  
idø'øn kyayikajxpidsøømt jam  
naxjotp ma ja wyinaty chøøni.

<sup>11</sup>Jøts kumi jamdam magyuch  
wyinaty tyimyjøø'kxwidejtmidi  
jam kojpk wingon, <sup>12</sup>xjats ja miku'  
ñuu'kxaktøø, jøts ja wyandøø:  
—Tanigajxk øøts yø kuch; wan  
øøts jam ttøki.

<sup>13</sup>Xjats ja Jesús tyajky ja tiy'ajtin,  
yikjajt idø'øn ja jade'en, winets ja  
miku' tmajtstuttøø ja jaa'y, jøts  
kuch ja tñimajtskojtmidi, ja' ja  
tyatøjkidøø. Namajtsk milin idø'øn  
ja kuch jam wyinaty tyanidi,  
ja'ats kø'øm ñanktyejmidøø jap  
jaa' jutjøtpy jøts ja nøøjøtpy  
tyimñaxkidaktøø, japts ja  
ñøøjøø'kxkøxtøø.

<sup>14</sup>Xjats ja jaa'y ojts kyakøxti  
pøn jam wyinaty kuch'ejxtip, jøts  
ja t'atsnimadya'akwa'andi jam  
møj kajpjt, jøts nayide'en jam  
kamjotp. Winets ja jaa'y myendøø,  
jøts ja t'ejxwa'andi tñijawiwa'andi  
ti dø'øn wyinaty tø tyuñi. <sup>15</sup>Ja  
Jesús idø'øn ja ñimendøø, winets  
ja ojts t'ejxti ja jaa'y pøn wyinaty  
t'ukmøøt'ajtp ja miku' jøts ku  
ja jam chinaañi wet xøøw, tø ja  
yikxon wyejni kyajni; winets ja  
jaa'y yjanchø'jkidøø. <sup>16</sup>Pøn ja jaa'y  
wyinaty tø twin'ejxti, ja'ats ja  
tñimadyaktøø sa jaty ja wyinaty  
tø yjaty tø kyubety ja jaa'y pøn

tmøøt'ajtp ja miku', jøts maagyuch ja nayide'en tñimadyaktøø ku ja wyinaty tø y'oo'køjxnidi. <sup>17</sup>Winets ja tminuu'kxakaktøø ja Jesús jøts wan ja jam tyimbyidsimy etjotp midi ja ñax'ajttip.

<sup>18</sup>Xjats ku ja Jesús tyøjkiyii'ñ jam barkijotp, winets ja jaa'y ja ñimaajyøø midi ja miku' wyinaty jekyip t'ukmøøt'ajtp jøts ku ja pyadsoonwa'añiyi. <sup>19</sup>Xjats Jesús ka'ap tkupijky, yide'en ja tñimaay: —Nøjkx mdøjkwindum, ninøjkx mmigu'uk jøts xukmado't ku Dios tø mjanchpudøkiyi, tamimadya'ak sudso Dios tø m'ayo'ixxyi.

<sup>20</sup>Xjats ja jaa'y ojts ñijky, jøts ja tñimadyakwidejtøjkiyii'ñ kajp kajp jam Decápolis etjotp sa Jesús ja wyinaty tø yjanchpudøkiyi; winets jaa'y ja ñigyumaap tjanchja'widøø.

**Ja Jairo ñøøx, jøts ja tø'øxyøjk pøn ja nwindson'ajtim Jesús wyet ojts ttojni**

<sup>21</sup>Xjats ku ja Jesús wyimbijty jap barkijøtpy, ku ja ojts ñijky jam nøøba'am, winets mayjaa'y ja jam ñimejnøø, jøts ja Jesús jami tyaañ. <sup>22</sup>Tø dø'øn ja jam wyinaty tyañ ku jaa'y jam tu'uk yja'ljty midi yik'ixpøjkp jam tsaptøjkjotp. Jairo, ja' ja xyøøw'ajtpy. Xjats ku ja t'ejxpaajty ja Jesús, winets ja ñagyuxendyaajkøø jam Jesús wyindum <sup>23</sup>jøts ja tjanchminuu'kxaajky, yide'en ja tñimaay:

—Jotkøjxnip øts n'u'nk xjap; men mgø' xanixajy, jøts myøkpøkt jøts yjujky'att.

<sup>24</sup>Xjats ja Jesús ojts tpanijky ja jaa'y; namay ja ñøjkxti, may jaa'y ja janchpadsoo'nøø, yikxon

ja yjanchyik'atejmuiky. <sup>25</sup>Jamts ja tø'øxyøjk wyinaty tu'uk jam mayjaa'yjotp midi wyinaty pøjkp, myakmajtsk jumøjtíp taxnaxyi ja wyinaty tø pyaajtniyi, jade'en jumøjt ja wyinaty kujk tmi'ity ja pa'am. <sup>26</sup>Yikxon ja wyinaty tø tku'ayowi ja pya'am ku tsøyibi ja may tjayiktuñ, tø myeeñun'k ja wyinaty tyik'oo'køjxni pøni wine'en ja jam wyinaty tmøødi, jøts niwine'en ja wyinaty tø tkadamøkpiky, ne'egi ja pa'am yjinax'adøtsni. <sup>27</sup>Xjats ku ja ojts tmadøy jøts ku yiknimadya'aky ja Jesús, winets ja tpamiñ jap mayjaa'yjotp, jøts ja ttojni ja wyet. <sup>28</sup>Kumi yide'en idø'øn ja ñawya'añiyi: “Ja'ayi øts wyet inet yø ndojnit, tso'okp øts inet jatyi.” <sup>29</sup>Xjats ku dø'øn ja jade'en ttuñ, winets ja taxnaxyi jatyi y'amøkiyii'ñ; tyimyja'wiyii'ñ ja kø'øm jøts ku ja wyinaty tø chø'øky ku pya'am ja wyinaty tø ñaxy.

<sup>30</sup>Xjats ja Jesús tja'wiyii'ñ, jøts kudam ja wyinaty tø tyiktsø'øky tu'uk ja jaa'y ku ja myøk'ajtin ja wyinaty tø tyik'awa'añ; xjats ja t'ejxwimbijty ja mayjaa'y, jøts ja ojts tyikty yide'en:

—¿Pøn øts nwet tø xojni?

<sup>31</sup>Winets ja pyabøjkpitøjk y'adsoji: —Jabi kawine'ents ja jaa'y mjanch'atejmuky, jøts mjanch'ukwa'añ: “¿Pøn ø xomp?”

<sup>32</sup>Ejxwidejtp idø'øn ja Jesús, ja' ja tyimy'ejxwampy pøn idø'øn ja wyinaty tø yjatyimy'uktøni.

<sup>33</sup>Winets ja tø'øxyøjk tsø'øgi yjanchyikmibejniiyi, ñija'wipts ja' jøts ku ja wyinaty ja tyaxnaxyi tø ñaxy, xjats ja ojts twinguxanaay'øyi

ja Jesús, tyamimadyakøjx ja tuki'iyi pøni sa jaty ja y'ejxi tyiyi. <sup>34</sup>Winets ja Jesús tnimaay ja tø'øxyøjk:

—Ja'agøjxp u'nk tø mdsø'øky ku ø tø xjanchjawī. Nøjkxni, Dios mgunu'u'kxip, jøts kidi pa'am m'ukpaajtñiyi.

<sup>35</sup>Íxammim ja Jesús jade'en wyinaty wya'añ, ku jaa'y jam yja'ttøø midi wyinaty tso'ondip jam mōjaa'y tyøjkwindum, ja mōjaa'y midi wyinaty tump jam tsaptøjkjotp, xjats ja yiknimaay:

—Tø ja mnøøx y'oo'kni. ¿Tiku yø windsøn nugo xyikjotkøjx'adi'ich?

<sup>36</sup>Myadøøpy idø'øn Jesús ja' ku ja mōjaa'y jade'en yiknøjmi, xjats ja tnimaay:

—Kidi mdsø'øgi; ja'ayi amumjoojt xjanchjawit.

<sup>37</sup>Jøts ja øjts ñøjkxti, ka'ap ja Jesús tkupijky ja mayjaa'y jøts ja myøøtwidetiyit, Pedro ja nugo myøøt'ajt, møøt ja Jacobo, jøts ja Juan midi ja Jacobo y'uch'ajtpy.

<sup>38</sup>Xjats ku ja jam yja'ttøø ma ja jaa'y jam wyinaty chøøni pøn tump tsaptøjkjotp, winets ja øjts t'ixy jøts ku ja jaa'y nugo xem yam y'adøtsnidi, pømbi jap waani yaxp, jøts pømbi jap janch møk yaxp. <sup>39</sup>Xjats ja Jesús tyøjkii'ñ jap tøjkjøtpy, jøts ja tnimaay ja jaa'y:

—¿Tiku jadine'en mna'amdi, jadits ku mya'axti? Ka'ap yø kiixyu'nk y'øøky, maap yø'.

<sup>40</sup>Winets ja jaa'y ja øjts tnixe'ekti. Xjats ja Jesús t'ixkajxpidsømgijxy ja jaa'y, nugo u'nkteety u'nktaak ja øjts tmøødi jøts ja pabøjkpitøjk midi ja jam wyinaty myøøt'ajtpy, xjats ja tyøjkii'ñ ma ja kiixyu'nk

jap wyinaty, <sup>41</sup>jøts ja øjts tnixaji kyø'køjxp, yide'en ja tnimaay:

—Talita, cumi —yide'en idø'øn ja tijy: Mets u'nk idø'øn nnimaapy, pidø'øk.

<sup>42</sup>Xjats ja kiixyu'nk jatyī tyanaagyukiyii'ñ jøts ja yø'øbyijky jadigojk, makmajtsk ja yjumøjt ja wyinaty. Winets ja jaa'y yjanchø'jkityigøødyøø ku ja jade'en t'ejxtøø. <sup>43</sup>Jøts ja Jesús møk'ampy t'ane'emy ja jaa'y, jøts ka'ap pøn ttuknijawidit ku ja kiixy jade'en wyinaty tø yjujkpyiky, yide'en ja mōjaa'y yiknimaadyøø jøts wan kyaaky tmo'odi ja kiixyu'nk.

#### Ku ja Jesús yja'jty jadigojk Nazaretit kajpjotp

**6** Xjats ja Jesús jam chøø'ñ jøts ja ñøjkxnimøø jadigojk y'etjotp, ja pyabøjkpitøjk ja myøøtnøjkx. <sup>2</sup>Xjats ku tpaajty ja poo'kxin xøøw, winets ja yik'ixpøjktøjkii'ñ jam tsaptøjkjotp. Jøts ja mayjaa'y pøn ja wyinaty patmadojyiyip, ñigyumaap ja tyimya'widøø ku ja jade'en yik'ixpiky, xjats ja wyandøø:

—¿Ma yø jade'en tø y'ixpiky? ¿Ti wijy'ajtin yø jade'en tø yikmø'øy, jøts sudso yø jade'en ja tunk tjaty midi naxwii'ñit jaa'y ni tu'ugin kyajajtip? <sup>3</sup>¿Ti kidi ya'at ja tsajtspi, ja Mariyixi yø y'u'nk, ja Jacobo y'ajch, møøt ja José, møøt ja Judas, jøts ja Simón? Pø yø'øxi ja y'ajch'ajttip, jøts nayø' ja kiixyuna'jk y'ay'ajttip pøn ya tsinaadyip, ¿kidi?

Jade'en ja wyandøø, xjats ja jade'en tkamibøjkidøø ja Jesús

y'ixpøjkin. <sup>4</sup>Winets Jesús ja ñimaajyidøø:

—Niduki'yiyi jaa'y twindsø'ogidi ja Dios kyugajpxy, ja'ayi ja nugo kawindsø'jkiyip pøn ja myigugajp'ajtpy, pøn ja møøt tyukjaa'y'aty, jøts pøn ja myøøtsinaapy jam tyøjkjotp.

<sup>5</sup>Xjats ja jam jade'en niti tkatuuñ, nugo ja waani tyiktsøøjky ja pamaa'y ku ja ojts tkønixajy. <sup>6</sup>Jøts nugo ja jadi'iñi tkumaa'yiyii'ñ tkudajiyii'ñ ku jaa'y ja kyajanchja'wiyøø. Xjats ja jade'en kajp kajp wyidijty ma jaty ja kajp jam wyinaty wingon tyañ, jamts ja yik'ixpijky.

**Ku ja Jesús tkexy ja pyabøjkpitøjk kajpxwa'kxpi**

<sup>7</sup>Ku dø'øn ja wyinaty jade'en tø yik'ixpiky, winets ja tyaajxyii'ñ ja myakmajtskpi jaa'y, jøts ja tpagejxy namajtsk jaty, ojts ja tkutujkmøøgyxy sudso ja kuwani tyikpidsø'ømdit ja miku'. <sup>8</sup>Yikxon ja ojts t'ane'emy jøts ja niti tkako'ondit ñiduu'yø'øyik, nugo tyajk ja ja'ayi kyaptip. Ka'ap ja ti tminøjkxtit, ni pejni, ni tsapkaagyí, ni meeñi, niti tkako'ondit. <sup>9</sup>Nugo kyø'øku'nk ja ja'ayi ttuktawa'agidit, jøts nijan tu'ugyi twetstit, ka'ap majtsk, jade'en ja yik'ana'amdøø.

<sup>10</sup>Xjats ja yjaaktyimyiknimaadyøø:

—Ku muum tøjkjøøjty mdøkidit, tu'ugyi mja'ta'aktit, jam idø'øn mja'attit mdsøndit kunim mdsøndit jam kajpkøjxp, winetnimts mbidsø'ømdit jam.

<sup>11</sup>Jøts pøni magajp mgayikupøkt, pøni ma pøn niwine'enin mgapatmadoowa'añidi, jøts ku

jam mdsøndit, winets pu'ux xwinaptit mdekyøjxp, jøts jade'eñi xuk'ejxtit jøts ku jade'eñi tø mnañiwa'achidi. Janch øts idø'øn nwa'añ, janch meets idø'øn nnøjmi, ku Dios mye'ent tu'ukpi xøøw jøts tiidyunwa'ant ja jaa'y, winets ja kajp nøjkk jinaxy yiktiidyuñ pøni ma mgayikupøkti, jøts ne'egi ka'ap ja Sodomit kajp møøt ja Gomorrit kajp jade'en nøjkk yiktiidyundi sa ja nøjkk yiktiidyundi.

<sup>12</sup>Xjats ja pyabøjkpitøjk ojts choondøø, jøts ja ojts yide'en kya'amaawiyidetti jøts wan ja jaa'y chinaa'yin tyiktigatsti, wan tja'dyigøøgyøxti tuki'yiyi ja kya'øyjaa'y'ajtindi pøni sa ja wyinaty tø chøøni. <sup>13</sup>Jøts may ja nayide'en tyikpidsømdøø ja miku' midi jaa'y jam wyinaty myøøt'ajttip, jøts ja nayide'en tyiktsøktøø may ja pamaa'y ku aceite ja ojts ttajaaxti.

**Ku ja Juan Bautista ja o'jkin tpaajty**

<sup>14</sup>Xjats ja windsøn Herodes ja tnmadøøy ku ja Jesús øy pøn jaa'y ñija'winiyi jøts ku ja tyikutuky, winets ja Herodes wyaañ:

—Ja Juan midi ja jaa'y ojts tyiknøbety, ja' inet tø pyidsimy jadigojk jap oo'kpi jutjøtpy.

<sup>15</sup>Xjats jadu'ukpi jaa'y ñømidi:

—Elías ja'.

Jøts pømbi wamip:

—Dios ja' kyugajpxy, nayide'en sam jekyip myemidi ja Dios kyugajpxy.

<sup>16</sup>Winets ja Herodes wyaañ ku ja jade'en tmadøøy:

—Ja Juan inet ja' pøn øts ojts nnankyajtspøødyi ja kyubajk, ja' inet yø tø pyidsimy jadigojk jap oo'kpi jutjøtpy.

Jade'en ja Herodes wyaañ.

<sup>17</sup>Kumi ja' ja wyinaty tø tsumy, ja' ja wyinaty tø tkõwiiñ tprakwiiñ jap puxøjkjõtpty ja'agøjxp jøts ja Herodías yjotkujk'att, ja tø'øxyøjk pøn ja Felipe jawyeen y'atsnidø'øxy'ajt, pøn ja Herodes wyinaty tø t'atskap'aty. Ja'ats ja Herodes nugo myøøtsinaapy. <sup>18</sup>Paty ja Juan ja wyinaty yide'en tø ñii'mxyi:

—Ka'ap kyutukyi jøts m'uch ja ñidø'øxy nugo xmøøt'atit.

<sup>19</sup>Xjats ja Herodías wyinaty jade'en tø tjanchmi'ambiky ja Juan jøts ja tyimyik'ookwa'añ, xjats ja ka'ap tmiwinmaa'nbyaaty sudso ja t'ukyik'ookt; <sup>20</sup>kumi ñija'wip ja Herodes wyinaty jøts ku ja Juan wyinaty øy tsuj yjaa'y'aty ku pøky tkamøødi, paty ja ttsø'øgi jøts paty ja ñidø'øxy ja sa tkaduktuñ. Pyatmadoojip yikxon ja kyajpxy ku ja Juan janch tsuj myadya'aky, øy ja mabaat tjaganimadøy. <sup>21</sup>Xjats ja tiempi tpaajty ku ja Herodías jotkumoni wyaañ sudso ja tyik'ookt ja Juan. Winet et ja Herodes twaadsøøy ja tyumbitøjk migaabyi mi'ukpi, ja'agøjxp ku syandi xøøw ja wyinaty tyiknaxy. Ja may soldadi windsøn ja wyaadsoow møøt ja riki jaa'y, jøts nayide'en ja møjaa'dyøjkti pøn ja kutujk jam wyinaty t'adsinaadyip Galilea. <sup>22</sup>Winets ja Herodías ñøøx tyøjkiiyi'ñ jap ma ja jaa'y jap wyinaty kyaydi y'uukti jøts ja jap y'ejch, xjats ja Herodes ja ojts tjanchuj'ixy ja y'ajtsk, nayide'en ja jaa'myidi pøn ja jap wyinaty myøøtkaapy. Winets ja tniimaay ja kiixy midi jap wyinaty tø y'ech:

—Amidook øts pøni ti mdsøjkpy, nyakp øts inet øy midi.

<sup>23</sup>Ojts Dios ja ttuk'ixy jøts ku ja tmo'ot pøni ti ja kiixy kø'øm y'amidøøpy, pikta'aky paat kutujk paat ja kukwa'kxy tyakwa'añ.

<sup>24</sup>Xjats ku ja kiixy jade'en tmadøøy winets ja pyidsiimy, jøts tyaak ja t'atsniimaay:

—¿Ti n'amido'op?

Xjats ja ojts ñii'mxyi:

—Ja Juan kyubajk m'amidoojyip pøn ja jaa'y tyiknøbajt.

<sup>25</sup>Winets ja kiixy jatyi tyøjkiiyi'ñ nay jap ma ja windsøn jap wyinaty, jøts ja tniimaay:

—Ixyamyi ndsøky ja Juan kyubajk pøn jaa'y tyiknøbajt, ja' øts kyubajk xmøøjyip texyjøtpy.

<sup>26</sup>Winets ja windsøn yjanchjotmay'oo'kpijky ku ja kiixy jade'en wyaañ; jøts kumi tø ja wyinaty Dios ttuk'ejxni jøts ku ja tyakt tuki'iyi pøni ti ja kiixy y'amidøøpy, tø migaabyi mi'ukpi ja wyinaty jade'en tmadowdi, xjats ja jade'en sa tkanimaay, kyupøjk ja' midi idø'øn ja kiixy wyinaty y'amidøøpy. <sup>27</sup>Jatyi syoldadi tu'uk tkejxy pøn wyinaty y'ejx'ejtip, jøts ja t'atsyikwinajkit ja Juan kyubajk, jøts tyikme'ent møkta'aky'ampy. <sup>28</sup>Xjats ja soldadi chøø'ñ, jøts ja ojts ñijkxy jap puxøjkjõtpty, japts Juan kyubajk ja ojts tkajtspo'jtiiyi, jøts ja tyikmiiñ texyjotp. Jade'en ja kiixy ja yikømmøøy, jøts ja jade'en tmøøy ja tyaak.

<sup>29</sup>Xjats ku ja Juan pyabøjkpitøjk ñija'wiyøø, winets ja yikpøjkjønøø, ojts pyabøjkpitøjk ja yikpidø'øgiyi, ja' ja ojts yiknaxøkiyidi.



**Ku ja Jesús tyikaay ja  
nimagoxk milbi jaa'y**

<sup>30</sup> Xjats ja Jesús ja kyudanaabyi tminabyaajtøø, jøts ja ojts tyamimadyakixyi ti jaty ja wyinaty tø ttundi, jøts ti ja wyinaty tø ttuk'ixpøkti ja jaa'y. <sup>31</sup> Xjats Jesús ja tniimaay:

—Mendi, wan tjaa'myindi poo'kxpi ma et abak.

Ja'agøjxp idø'on ja jam jade'en ñøjkxwa'andi ku ja mayjaa'y ja myiyø'øwyimbityidi myiyø'ø'y'adijyidi, niwine'enin ja yikxon kyakaydi kya'uukti.

<sup>32</sup> Winets ja barki ja ttatøjkidøø, jøts ja ñøjkxtøø abak etjotp. <sup>33</sup> Mayjaa'y ja y'ejxidøø ku ja jade'en choo'ndøø. Yik'ejxkajp ja Jesús; xjats ja choo'ndøø pujtpim, kawinaak kajp ja jaa'y jam ñøjkxtøø jøts ja ojts t'anajxukti ja Jesús, jawyeen ja mayjaa'y jam ne'egi yja'ttøø ma ja wyinaty y'ukja'atwa'andi. <sup>34</sup> Xjats ku ja jam yja'ttøø, ku ja Jesús pyidsiimy jap barkijøtpy, winets ja t'ejxpaajty ja mayjaa'y, jøts ja ojts t'ayo'ixy ku ja jam yik'ayowim tyanidi mabyorreegin midi ñi'ejxpi ka'ejtp; jøts ja tyik'ixpøjktøjkiyiñ, jeky ja tyik'ixpijky. <sup>35</sup> Xjats ku ja et chuu'ñøø, winets ja pyabøjkpitøjk ja wingon ñimejnøø, jøts ja ñimaajyøø:

—Tøts ja et chuu'ni, pø ka'apts ya pøn chøøni. <sup>36</sup> Kajxni yø jaa'y, wan tñøjknidi kamjøøjtjy, wan tñøjknidi ma kajp wingon, jamts tju'udyit ja jii'kxy, kumi janch yu'oo'knidip yø'.

<sup>37</sup> Winets ja Jesús y'adsøø yøts ja wyaañ:

—Ka'ap idø'on mwa'ant, mo'odi chapkaaky, yikaydi.

Xjats ja pyabøjkpitøjk wyandøø:

—¿Nøjkxp øøts jøts øøts tsapkaaky n'atsju'uty majtsk magø'pxy denario, jøts øøts yø jaa'y nyika'aty?

<sup>38</sup> Winets ja Jesús wyaañ:

—¿Ja winaak jap mdsapkaaktyi? Nøjkx x'ats'ejxti.

Xjats ku ja t'ejxtøø, winets ja tniimaadyøø:

—Magoxk ja tsapkaaky jap jøts majtsk ja ajkx.

<sup>39</sup> Xjats ja Jesús tyikutujky jøts wan ja jaa'y wanjaty t'ixa'akti jam tsuxk miyjotp; <sup>40</sup> winets ja jaa'y y'ixaktøø tukpiky jaty, pømbi niwixikxmyajk ixaktøø, jøts pømbi nimago'pxy. <sup>41</sup> Xjats ja Jesús magoxk tniyajiyiñ ja tsapkaaky jøts majtsk ja ajkx, winets ja ojts tpat'ixy yø tsajp, jøts ja ojts tkunuu'kxy ja tsapkaaky xjats ja ojts ttukwa'kxy, jøts ja pyabøjkpitøjk ja tmø'ø yøts ja ttagama'adyit ja jaa'y jøts ja tyikwa'kxidit. Tuki'iyi ja jaa'y ajkx yiktagumaagyøjxtøø, ojts ja yikmøøgyøxti, <sup>42</sup> xjats ja kyaadyøø ku'uxyi; <sup>43</sup> winets ja tsapkaaky windank makmajtsk kach yikpøkmujky møøt ja ajkx windank. <sup>44</sup> Janch namay ja jaa'y jam wyinaty yjøø'kxti, ja yaa'dyøjk ja yikmachodøø nimagoxk mil.

**Ku ja Jesús yø'ø y jam mejwyingøjxp**

<sup>45</sup> Xjats ja Jesús ja pyabøjkpitøjk tkugajxigyijxy jap barkijøtpy, jøts ja ojts tyiknijky jawyeen jam Betsaida, kyajxjawyeeni jaa jøts ja nøø ja ttanaxtit. Xjats ja yjaaktaañ jøts ja jaa'y ja tminawya'kxiti.

<sup>46</sup>Xjats ku ja jade'en tminawya'kxøø ja mayjaa'y, winets ja ñijxxy Dios'ajot'ajtpi kojpkøjxp. <sup>47</sup>Jøts ja barki jam ja wyinaty kujk ñaxy mejkyujk'am ku ja et kyoodsiyi'ñ, jøts ja Jesús jam wyinaty nadyu'uk tø tyañ jam naxkøjxp. <sup>48</sup>Xjats ja ojts t'ixy ja pyabøjkpitøjk jøts ku ja ka'ap y'ukmaa'niyidi sudso tkaaptit ja nøø, ja'agøjxp ku ja poj wyinaty yø'y wimbet'ampy. Xjats ku yjøpkyoost'ajty winets ja Jesús ojts tñinijxxy wingon ja pyabøjkpitøjk, jadi'iñi ja nøøwingøjxp yø'y, jøts tyimy'ukwinaxwampy ja pyabøjkpitøjk ja wyinaty. <sup>49</sup>Ku ja ojts y'ejxpaadyi jøts ku ja yø'y jam nøøwingøjxp, winets ja pyabøjkpitøjk yjanchabaagaktøø, miku' ja wyinaty tø tyimwyinmaydi; <sup>50</sup>kumi tø ja wyinaty niduki'iyi t'ejxti, janch tsø'jkidip ja!. Xjats Jesús ja ojts myigajpxyidi, yide'en ja ojts yiknøjmidi:

—iJotmøkpøkti; øts idø'on, kidi mdsø'ogidi!

<sup>51</sup>Xjats ja kyøxpejty jam barkijotp ma ja jam wyinaty, jøts ja poj jaty ñajxy; ñigyumaap ja tyimya'widøø, <sup>52</sup>kumi ka'anin ja wyinaty tñijawidi yikxon pøni pøn ja Jesús, øy ja tsapkaaky ja! t'jayikmayi, janch kujuun idø'on ja'adi, ka'ap idø'on ja tja'gyukidi.

**Ku ja Jesús tyiktsøøjky ja mayjaa'y jam Genesaret**

<sup>53</sup>Xjats ja ttanajxtøø ja mejy, jøts ja ojts yja'atti jam Genesaretit jaa'y y'etjotp, jamts byarki ja ojts tmixojtspatti nøøba'am. <sup>54</sup>Ja'ayi ja pyidsømdøø jap barkijøtpy, winets

ja Jesús jaty yik'ejxkajpy. <sup>55</sup>Jøts ja jaa'y jaty ttukmadow'abidsømdøø ja myigu'uk ma jaty ja kajp jam wyinaty jøts ku ja Jesús tø yja'aty, xjats ja jaa'y tkiyja'tpinibøjkidøø maabajtkøjxp ja pamaa'y ma ja jam wyinaty tñijawidi ja Jesús. <sup>56</sup>Jøts ku ja Jesús yja'ljty ømyadsowi, ku ja tniyø'øyi ja kajp møj mutsk, uk ku ja yja'aty kamjotp, ejtp idø'on ja jaa'y tuu'am tpikta'akti ja pamaa'y, jamts ja tminuu'kxa'akti ja Jesús jøts wyetpaa' ja wine'enin tyukpaadidit; jøts pøni pøn ja wet paa'jtjyip, jaty ja cho'okti.

**Ja ka'øwyinmaa'ñ ja jaa'y tyikpøkyajtp**

**7** Winets ja Jesús yiknimiñ ma ja jam wyinaty, ja fariseotøjk ja ojts ñimiñi møøt ja kajpxwejpitøjk, pøn jam wyinaty winaagin tø choondi Jerusalén. <sup>2</sup>Ja'ats t'ejxtøø kudam ja Jesús pyabøjkpitøjk kyøbujti ku kyaydi, jøts ka'ap idø'on ejxim ja møjjaa'y chinaa'yin, ja'agøjxp ja ojts wenk tñigajpxti tñimadya'akti. <sup>3</sup>(Kumi yide'en ja fariseotøjk kostumbri tmøøt'atti jøts nayide'en ja myigu'uk israelit jaa'y, ja' idø'on ja pyadundip pøni sa jaty ja møjaa'dyøjk wyinaty tø y'atsøonidi, ka' pøn kyay kunim ja kyagøbujti may ojk, winetnimts ja wa'ats ñayjawiyidi. <sup>4</sup>Nayide'en pøni pøn maayjøtpy tsoo'mp, jøts pøni ku ja ka'ap kyøbujñim kawinaak ojk, ka'ap ja nayide'en kya'aty. May idø'on ja kostumbri jade'en midi ja pyadundip, ejtp idø'on yikpujy uujk'iñ, tsajpts'øøy, møøt texy tas midi tum pujx, jøts maabajt, jade'en

ja wa'ats tyik'etti.) <sup>5</sup>Paty fariseotøjk møøt ja kajpxwejpitøjk tnimaadyøø ja Jesús:

—¿Tigøjxp ku yø mbabøjkpitøjk jade'en ja kyø' tkapujti ku yø kyaydi sa ja møjaa'y chinaa'yin wya'añ?

<sup>6</sup>Xjats ja Jesús y'adsøø yøts ja wyaañ:

—Meets win'øø'mbi, yikxon ja Isaías midi Dios kyugajpxy'ajtpy ojts tja'ay ja Dios kyajpxy ku ja wyaañ:

Nugo yø jaa'y jade'en y'aaw ttakajpxy ku øts yø xwindsø'øgi,

jøts niwine'enin øts n'ayuujk yø xkaja'gyukiyi.

<sup>7</sup>Niti yø kyawa'añ jade'en, øy øts yø mabaat xjawindsø'øgi, ja'agøjxp ku tyikyø'ødyi ja jaa'y ixpøjkin jøts wya'andi kuts ja nja'aji.

<sup>8</sup>Nayide'en ja Jesús wyami:

—Jøts meets idø'on jade'en, kumi jade'en meets Dios kyutujk x'ixwejtsi, jøts xpadundi midi jaa'y kyostumbri'ajtpy: ja texpyujk, ja taspujk, jøts pøni ti jaty meets jade'en mdumpy.

<sup>9</sup>Jade'en ja tnimaay:

—Janch wijy mee mnayjawiniyi jøts ku mgostumbri jade'en xpadundi, m'ixwijchp meets ja Dios kyutujk. <sup>10</sup>Øy ja Moisés yide'en yjawaañ: “Windsø'øgi mdeety mdaak”, jøts “Pøni pøn tyeety tyaak tka'ømyigajpxp, wan ja jaty t'øøky.” <sup>11</sup>Jøts ku meets, mdanigutujk'ajtpy meets ja jaa'y, ka'ap idø'on tyimy'aguwanikøjxpi jøts ja tyeety tyaak ja tyimwyindsø'øgit, wan ja tnøjmidi ja tyeety ja tyaak: “Ka'ap inet

ixyam nbudøkit, ka' ti nmo'owa'añ, ja'agøjxp ku øts nbikta'aky tmøøt'aty Corbán.” (Corbán, ja' tyijpy ayuujk, tø ndamiyøxy ja Dios tuki'iyi nbikta'aky); <sup>12</sup>jøts ku ja jade'en wya'añ, nijuunits meets ja xka'uktukpudøjkyini ja tyeety ja tyaak. <sup>13</sup>Jade'en'ampy meets ja xka'ukyikmøjtøjkiñi ja Dios kyajpxy, ja'agøjxp ku ja mgostumbri xuk'ixpøkti xem yam ja u'nk ja una'jk, jøts nayide'en ja mdsinaa'yin xyikyø'ødyi.

<sup>14</sup>Xjats ja tyajxmujkøjx ja jaa'y jadigojk, jøts ja tnimaay:

—Patmadooik øts ni'ijtyi, jøts xnimado'odit tu'uk ja ayuujk:

<sup>15</sup>Niti jii'kxy jaa'y kyayikpøkpyetyi ku jaa'y ti tjii'kxy. Ja' jaa'y yikpøkpyajtip midi tsoo'mp jam anmija'winjotp. <sup>16</sup>Madowdi yikxon, pø jamxi mdatskti, yø'øts mdamado'odip.

<sup>17</sup>Xjats ku ja Jesús tminawya'kxøø ja jaa'y, winets ja tyøjkiyiñi tøjkjøtpy, japts pyabøjkpitøjk ja ojts yiktiyi ti ja'abi madya'aky jade'en tyijpy. <sup>18</sup>Xjats ja tnimaay:

—¿Ni meets paat yø xkanimadooni? ¿Ka'ap nxijawidi ku jaa'y niti jii'kxy kyayikpøkpyetyi ku jaa'y ti tjii'kxy? <sup>19</sup>Ka'ap jii'kxy tyøki anmija'winjotp, maatsjotp ja jii'kxy tyøki mā ja tinch, jøts pyidsimy ku jaa'y niijxxy nawyiyø'øyibi.

Jade'en idø'on ja ojts tnigajpxy jøts ku jii'kxy tum wa'ats midi yikjøø'kxp, ka' yikpøkpyety.

<sup>20</sup>Yide'en ja wyaañ:

—Ja' jaa'y yikpøkpyajtip midi pidsoomp y'anmija'winjotp. <sup>21</sup>Kumi jam pyidsimy ja ka'øwyinmaa'ñ

ku jaa'y kya'øwyinmay, jam pyidsimy ku jaa'y ñiyaaly ñidø'øxy ñabyøjkxiyidi, ku nadyu'uk jaa'y ñamyøøt'atyidi, ku jaa'y yikjaa'y'øøky, <sup>22</sup>ku jaa'y myeech, ku jaa'y wenk jaa'y pyikta'aky tsojkiyi, ku jaa'y ti tka'ødyuñ, ku jaa'y tyaay'aty, ku jaa'y najts'aaw najtsjoojt yjaa'y'aty, ku jaa'y myigu'uk ti ttami'ama'at'aty, ku jaa'y pyagajpxy, ku jaa'y ñamyikexyi, ku jaa'y niti tkawinmay. <sup>23</sup>Tum anmija'winjotp yø ka'ødyunk jade'en chøøñ midi jaa'y tyikpøkpyajtp.

**Ku ja Tiro t'øxyøjk  
tjanchja'wiyii'ñ ja Jesús**

<sup>24</sup>Xjats ja Jesús jam chøø'ñ jøts ja ñijkxy Tiro jøts Sidón, jade'en ja et jam txøøw'aty ma dø'on ja ñijkxy. Xjats ku tøjk ja jam tpaajty jamts ja tyøjkiiyi'ñ, ka'ap ja pøn t'uktuknijawiywa'añ ku ja jam. Ma ka'ap ja jade'en yjajty ojts ja jaty yiknijawi. <sup>25</sup>Jaty t'øxyøjk ja tu'uk ñija'wiyøø pøn ñøøxu'nk jam wyinaty miku' tmøøt'ajtp; ja'ats jam meen jøts ja wyinguxanaajyi. <sup>26</sup>Ojts ja t'øxyøjk wya'añ jøts ja Jesús tyikpidsø'ømt ja miku' mididi ja kiixyu'nk jam wyinaty myøøt'ajtpy, sirofenicyit jaa'y idø'on ja t'øxyøjk pøn jam jade'en meen, jøts griego ayuujk ja kyajpxy. <sup>27</sup>Xjats ja Jesús y'adsøø jøts ja wya'añ:

—Jawyeen øts ja israelit jaa'y nbudøkit, jøts meets ix'oojknim.

<sup>28</sup>Winets ja t'øxyøjk y'adsøø jøts ja wya'añ:

—Janch jade'en teety, ka'ap kyajjade'eni. Jade'en øts ixyam nnayjawiyi ejxim ja uku'ngin, jøts

ja israelit jaa'y ndejint ejxim jaa'y una'jkin kyaydi, jøts ja kyaaky abu'xk tyika'adi jøts ja uku'nk ja jaty tkaamyuky. Paty teety nnøjmi jøts mdu'ump may'ajt jøts ø xpuðokit.

<sup>29</sup>Xjats ja Jesús tnimaay ja t'øxyøjk:

—Janch idø'on mwa'añ; nõjkxti. Tø ja m'u'nk ja miku' myajtstuujtniyi.

<sup>30</sup>Xjats ja t'øxyøjk ojts ñijkxy tyøjkjotp, kuts ja jam yja'aty jøts ja ñøøxu'nk ja tpaajty maabajtkøjpx. Ka'ap miku' ja wyinaty t'ukmøøt'ajtni, tø ja wyinaty myajtstuujtniyi.

**Ku Jesús ja nat jaa'y  
tyatsk tyik'awajtsiyi**

<sup>31</sup>Xjats ja Jesús jam choo'ngojmøø Tiro, jøts ja ñijkxy Sidón, tyimñajxts ja jam jøts magyajp ja ttanajxy jam Decápolis etjotp, jøts ja yja'jty ma ja mejy txøøw'aty Galilea. <sup>32</sup>Jamts jaa'y jadu'uk yiktaniamiñ pøn wyinaty nat, pøn wyinaty atoojts, ka'ap ja y'øgyajpxy, winets ja yiknimaay jøts ja kyø' ja ttanixajt jøts ja tyiktso'okt.

<sup>33</sup>Xjats Jesús ja ojts abiky tsoo tyiknijkxy, ojts ja nadyu'uk tjíway ma ja mayjaa'y jam wyinaty, jøts kyøtsa'jx ja ojts tkudeji jap nat jaa'y tyatskjøtpy, ojts kyø' ja ttsujwyey jøts jaa'y tyoojts ja ojts ttpaajti.

<sup>34</sup>Winets ja Jesús chajp'ixy, jøts ojts myøkxejy, xjats wya'añ:

—iEfata! —midi ayuujk tyijpy: iAwa'ats!

<sup>35</sup>Winets ja nat jaa'y jaty ja tyatsk y'awaajch, jøts ja tyoojts nayide'en y'øiyii'ñ, xjats ja

jade'en kyajpxpijky øy, ojts ja yikxon y'awijy. <sup>36</sup>Winets ja Jesús yikxon ojts t'uk'ane'emy jawyeen ja mayjaa'y jøts ja pøn ka'ap ttukmado'odit; ku ja jade'en tnimaay, ne'egi jinaxy ja ojts tnimadya'akti. <sup>37</sup>Xjats ja jade'en ñigyumaap tjawidi, yide'en ja wyandøø:

—Tyum'ødyumpy øy ti; yikmadøøpy nat jaa'y, jøts yik'awijpy uum jaa'y.

**Ku ja Jesús tyikaay ja ñimaktaxk milbi jaa'y**

**8** Winet ets mayjaa'y jam wyinaty tø ñamyukyidi, jøts ja kyaajyik ja kya'etti. Xjats ja Jesús tyaajxiyii'ñ ja pyabøjkpitøjk, jøts ja tnimaay:

<sup>2</sup>—Njanch'ayo'ijxpy øts yø jaa'y, kumi tyigøøkxøowyip øts yø ya xnimenidi, jade'en øts yø ya kujk nmøøtsinaañidi jøts ja kyaaky tø kyøjxnidi. <sup>3</sup>Ku øts inet yø ayuu axøøw njakaxt jam tyøjkjotp, jadi'iñi net yø muum yjotkøjxnidit tuu'ajy, kumi ja winaagin pøn tø choondi jagam et.

<sup>4</sup>Xjats pyabøjkpitøjk ja ojts y'adsøy, jøts ja ñimaajyøø:

—¿Sudso yø jaa'y ya yjanchka'adyit, pø ka'ats ya pøn chøøni?

<sup>5</sup>Winets ja Jesús tyiktiiy ja pyabøjkpitøjk, yide'en ja tnimaay:

—¿Winaak tsapkaaky jap xmøødidi?

Winets ja wyandøø:

—Wixujk.

<sup>6</sup>Xjats Jesús tnimaay ja jaa'y jøts wan t'ixakøxti jam naxkøjxp, winets ja tnixajiyii'ñ ja tsapkaaky,

jøts ja ttamøja'wiyii'ñ ja Dios. Xjats ja ojts ttukwa'kxy ja tsapkaaky jøts ja tmøøy ja pyabøjkpitøjk, winets ja ttagumaadyøjkidøø ja jaa'y. <sup>7</sup>Jamts winaagin ja mutsk ajkxu'nk ja wyinaty tmøøt'ajtmidi, ja'ats ja Jesús ojts tkunuu'kxy, jøts pyabøjkpitøjk ja ttaguwa'aniiyii'ñ jøts wan ja jaa'y ja ttagumaagyøxti. <sup>8</sup>Xjats ja jaa'y ni'ijtyi kyaagyøjxtøø, ojts yikpøkmuky wixujk kach. <sup>9</sup>Jøts ja jaa'y pøn wyinaty tø kyaydi, nimaktaxk milin ja jam wyinaty ñamay'atti. Xjats ja Jesús ja ojts tminawya'kxniyi, <sup>10</sup>jøts ja tyøjkinaa jap barkijøtpy møøt ja pyabøjkpitøjk, jøts ja ñøjkxtøø jam Dalmanutit jaa'y y'etjotp.

**Ku ja fariseotøjk t'amidoodøø ja Jesús, jøts ja ttuk'ejxtit ja myilagri'ajtin**

<sup>11</sup>Winets ja fariseotøjk jam myendøø, jøts ja tminagyajpxøjkidøø ja Jesús. Ja' ja ojts t'amidowdi, jøts ja Jesús ja dios'ajtin tyikwingaxø'økt ya naxwiñ, nugo dø'øn jade'en tjot'ejxti. <sup>12</sup>Xjats Jesús ja tkumøkxajiyii'ñ, jøts ja wyaañ:

—¿Tigøjxp ku jaa'y ya'atpi xøøw ya'atpi jumøjt t'amidowdi jøts yiktuk'ejxtit ja dios'ajtin? Janch meets idø'øn nnojmi, jøts ku jade'embii jaa'y ni tuk'ojkin kyayiktuk'ejxtit ja dios'ajtin.

<sup>13</sup>Xjats ja tmajtstuupty, jøts ja tyøjkii'ñ jap byarkijøtpy, jøts ja ñijkxy jaduktamajñ'ampy jam nøøba'am.

**Ja fariseit jaa'y y'ixpøjkin**

<sup>14</sup>Nika'ap kyaaky ja wyinaty tø tkondi, tø ja wyinaty tja'dyigøydi,

tu'ugyi tsapkaakyu'nk ja wyinaty jap tkonidi jap barkijøtpy. <sup>15</sup>Xjats ja Jesús tnimaay ja pyabøjkpitøjk:

—Ejxim Herodes, ejxim fariseotøjk lyevaduri xkupøjkidi, øyim mnay'ejx'etidit.

<sup>16</sup>Winets ja pyabøjkpitøjk jatyi myadyaktøjkidøø, yide'en ja ñawyajnidøø:

—Ja'agøjxp yø jade'en wya'añ ku adøm tsapkaaky tø ngayikmi'iñindi.

<sup>17</sup>Wa'ats Jesús ja tnijawi ti ja wyinaty kyajpxy'ajttip. Ka'ap ja tsapkaaky ja tijy midì ñimadoodip ja pyabøjkpitøjk, ja Herodes ja fariseotøjk ndejint ja y'ixpøjkin ja y'ayuujk tyijpy. Paty ja Jesús yide'en tyiktiiy:

—¿Tiku mwa'andi ku mdsapkaaky xijy kya'etti? ¿Ka'aním xnimadowdi, jøts nika'ap xnijawidinim, janch juun mgubajk xmøødidi? <sup>18</sup>¿Ka'aním mgø'øm ween xawin'ejxti, jøts ni mdatsk xkadamadoodinim, niwine'enin xkaja'myatsti? <sup>19</sup>Ku øts ojts tsapkaaky magoxk nyikwa'kxy, jøts ojts nmø'øy ja magoxk milbi jaa'y, ¿winaak kach ja kaaky windank ojts xpøkmukti?

Xjats ja wyandøø:

—Makmajtsk kach.

<sup>20</sup>—¿Jøts mja'myajtstip nayide'en ku øts ojts ja tsapkaaky wixujk nyikwa'kxy, jøts øts ja myaktaxk milbi jaa'y ojts nmø'øy? ¿Jøts winaak kach ja kaaky windank xpøkmuktøø?

Xjats ja wyandøø:

—Wixujk.

<sup>21</sup>Winets Jesús ja pyabøjkpitøjk tnimaay:

—Ka'anímdam meets idø'on xja'gyuki. Ja tsapkaaky yø meets ja'ayi mdajotmay'øø'kpy.

**Ku ja Jesús tyikwin'ejxwa'kxy tu'uk ja winap jaa'y jam Betsaida**

<sup>22</sup>Jawaani y'lijty, xjats ja yja'tti jam Betsaida ma ja kajp wyinaty jade'en txøøwi; jamts ja Jesús yiktanímiiñ tu'uk ja winap jaa'y, jøts ja ojts yikminuu'kxa'aky, jøts ja tnixajit jøts ja tyiktso'okt. <sup>23</sup>Xjats ja jade'en tnixajiyii'ñ kyø'køjxp, jøts ja tyikpidsiimy kajpjotp. Winets tsujy ja ojts ttawenjaaxy jøts ja tnixajiyii'ñ, xjats ja tyiktiiy jøts pøni kujk wyinaty wine'enin t'ixy øy ti. <sup>24</sup>Winets ja winap jaa'y wyin'ejxwa'kxy, jøts wyaañ:

—N'ijxpy øts yø jaa'y ku yø'ødyi, ja ku jade'en kyaxø'økti sa kipyin.

<sup>25</sup>Winets ja Jesús jadigojk twinguxajiyii'ñ ja winap jaa'y, jøts ja yikxon tyik'ejxmøkiyii'ñ, ojts ja winap jaa'y ja wyeen y'awa'ach, tum wa'ats ja t'ejxni øy tyii'ji. <sup>26</sup>Xjats Jesús ja tkajxni jam tyøjkwindum, yide'en ja tnimaay: —Kidi mgajptøki, jøts nipøn jam sa xkanøjmit.

**Ku ja Pedro wyaañ jøts ku ja Jesús yja'aji yiknitsokp, ja Cristo**

<sup>27</sup>Tø dø'on ja jade'en wyinaty y'ukjaty, xjats ja Jesús ja pyabøjkpitøjk tmøøtsøø'ñ jøts ja ñøjkxti jam Cesarea Filipino. Jade'en ja et xyøøw ma dø'on ja ñøjkxti. Xjats ja Jesús tuu'ajy ja pyabøjkpitøjk tø tnimaay, jøts ja tyiktiiy:

—¿Pønik øts, sa jaa'y wya'andi?

<sup>28</sup>Winets ja pyabøjkpitøjk  
y'adsoodøø, jøts ja wyandøø:

—Winaagin jaa'y wya'andi jøts  
ku mets Juan Bautista, pømbi  
nømidip jøts ku mets Elías midi  
jegyibim yiknija'wip, jøts ku mets  
Dios kyugajpx'ajtpi midi jegyibim  
yiknigajpxp yiknimadyakp.

<sup>29</sup>Xjats ja kø'øm ja Jesús  
yiktøøjidøø yide'en:

—Jøts meets, ¿Sa meets  
m'ukwa'añ, pøn øts idø'on?

Winets ja Pedro y'adsøø jøts ja  
wyaañ:

—Ja yiknitsokpi mets, ja Cristo.

<sup>30</sup>Xjats Jesús ja ñimaajyidøø jøts  
ka'ap pøn ttukmado'odit jøts ku ja  
kyiristi.

### Ku ja Jesús kø'øm tnigajpxy jøts ku ja y'ookt

<sup>31</sup>Xjats ja Jesús  
tyik'ixpøjktøjkiyii'ñ ja  
pyabøjkpitøjk, ja' ja tyukmadoow  
sa ja y'ayo'ombaatt ja Dios, ja  
naxwii'ñit jaa'y ja myøjkudanaabyi,  
kø'øm idø'on ja jade'en ñadyijyi.  
Yide'en ja Jesús ttukmadøø jøts  
ku ja møjaa'dyøjk, ku ja israelit  
jaa'y tyeetywindsøn, jøts ku ja  
kajpxwejpitøjk ja y'ixwetsiyit.  
Jade'en ja tnimaay ja pyabøjkpitøjk  
jøts ku ja ja' yik'ooogit, tyukmadoow  
ja' ku ja jade'en y'ookt jøts ku ja  
kyidigøøk xøow pyidsø'ømt jap  
oo'kpi jutjøtpy ku ja yjujkyøkt.

<sup>32</sup>Wa'ats ja ttukmadoogijxy ja  
pyabøjkpitøjk. Xjats ja Pedro ka'ap  
t'øya'wiyii'ñ ku ja wyinaty tø  
wya'añ kuk ja y'ookt. Ja'agøjxp ja  
Pedro møk twingugajpxiyii'ñ ja  
Jesús. <sup>33</sup>Xjats ja Jesús wya'kjimbijty,  
jøts ja pyabøjkpitøjk ja ojts

twin'ixy, xjats ku Pedro miku'jin  
wyinaty tø kyajpxy, winets Jesús  
ja twingugajpxiyii'ñ nayide'en,  
jawaani møk'ampy ja tnimaay:

—iMets miku', jiwā'ak, majstutk  
øts! Ka' mets jade'en mwinmay  
sam ja Dios Teety wyinmayin,  
jade'en me mwinmay sam øy pøn  
naxwii'ñit jaa'y.

<sup>34</sup>Winets ja Jesús ja  
pyabøjkpitøjk tyaa'jxyii'ñ, tuki'iyi  
ja tyajxmukijxy ja mayjaa'y jøts ja  
tnimaay:

—Pøni pøn tsojkin tmøøt'ajtp  
jøts øts ja nja' jade'en xpaduujnit,  
ka' mibaat kø'øm ñadyunk'atit,  
ja'ayi ku amumjoojt ñadyamiyoxit  
ja ayo'on jøts idø'on jade'en  
tpadu'unt. <sup>35</sup>Pønts kajade'endunim  
nay'ejxip, niwindem tkapaaty  
ja nitso'ok'ajtin; jøts pøn ø  
xku'ayo'ombaajtip, ja' idø'on  
tpaatp ja nitso'ok'ajtin. <sup>36</sup>¿Ja  
ti ja ñiwyā'ant øy ja jaa'y  
tjaja'bøjkixy ja naxwii'ñajtin  
jøts ja y'anmija'win ne'egi  
wyindigøø? <sup>37</sup>Jabi ka'axi mibaat  
ja ñitso'ok'ajtin ja tkuju'uty. <sup>38</sup>Jøts  
pøni pøn ø xatsø'dyump, pøni  
pøn øts n'øgyajpxy n'øy'ayuujk  
xatsø'odyuujnip ya jaa'y wyinduujy  
midi jekyip t'ukpadundip ja  
Dios, ya pojkipi jaa'y wyinduujy,  
nayide'ents øts ja tsø'odyumbi  
nøjkx ndatsø'odyuñ ku øts ja  
Dios Teety kyutujk nmimejnit, ku  
øts ja ankilis nmøøtme'ent pøn  
tsinaadyip jap tsajpjøtpy. Øts  
idø'on ja naxwii'ñit jaa'y nmøjkuda  
naabyi'ajtpy.

**9** Janch meets idø'on nnøjmi,  
ja jaa'y ya winaagin tyanidi  
pøn ka'ooktip kunim ja t'ejxtit

tnijawidit ja Dios kyutujk ku ja tpiкта'akt møk'ampy.

**Ku ja Jesús adsu'jky tuki'iyi  
y'atstigajch, amuum  
chamambøjkiixy**

<sup>2</sup>Tyudujkxøøwip ja Jesús wyinaty jade'en tø wya'añ, xjats ja pyabøjkipitøjк ja nidigøøк t'ukwaay, ja Pedro ja y'ukwaaw møøt ja Jacobo jøts møøt ja Juan, jade'en ja ojts tmøøtnijкxy jam kojpkøjxp ma ja Jesús adsu'jky tyigajch, jamts ja pyabøjkipitøjк wyinaty t'ukmøøtani. <sup>3</sup>Yikxon wyet ja chamambijky janch poop ejxim tsap'øø'pkyin, nipøn jaa'y wyet ya jade'en tkayikwa'ach sa dø'øn wyet ja pyoobiyii'ñ. <sup>4</sup>Winets ja pyabøjkipitøjк t'ejxpattøø ja Elías møøt ja Moisés, jøts ku ja tmøøtmadya'akti ja Jesús. <sup>5</sup>Xjats ja Pedro tnimaay ja Jesús:

—Windsøn, ityimy'øy'ajtp ku øø nyam'aty! Nyik'øyip øøts ujts'aadyøjк, tu'uk mets mja', tu'uk Moisés yja', jøts Elías yja' tu'uk.

<sup>6</sup>Tø ja pyabøjkipitøjк wyinaty yjanchø'ogidyøjkinidi, ka'ap ja y'ukwinmaa'nbyatnidi sa ja tnøjmidit ja Jesús paty ja Pedro jade'en nugo y'ukwanaa. <sup>7</sup>Winets yoots myiiñ ma ja jam wyinatyi, ja'ats ja ojts yik'adigøyidi, jøts jap yikmadøøy ja Dios y'ayuujk midi waan:

—Ya'at n'U'nk øts idø'øn njanchøjkpy, mimadojidi pøni sa wya'añ.

<sup>8</sup>Xjats ku ja jatyi y'ejxjø'ktøø, winets ja nipøn tka'ejxpattøø ma ja Jesús jam wyinaty, ja'ayi jam wyinaty nadyu'uk tanaapy.

<sup>9</sup>Xjats ku ja choo'nidøø jam kojpkøjxp ku ja kyidaknidi, winets Jesús ja tya'ana'amidøø, jøts ja ka'ap pøn ttamimadya'aktit midi ja wyinaty tø t'ejxti, jaanim ja tmadya'akyø'odyit kunim ja kø'øm oo'kpi jutjøtpy pyidsø'ømt jadigojk, jaa pøn myøjкudanaabyi'ajtpy ja naxwii'ñit jaa'y. <sup>10</sup>Xjats ja pyabøjkipitøjк jade'en kø'ømyi t'amaa'tsk'ajttøø, kø'ømyi ja jade'en tkajpxy'atti ti dø'øn ja jade'en tyijpy ku ja pyidsø'ømt jap oo'kpi jutjøtpy jadigojk. <sup>11</sup>Xjats ja tyiktøødøø ja Jesús, yide'en ja tnimaadyøø:

—¿Tigøjxp ku ja kajpxwejpitøjк yide'en wya'andi jøts ku Elías jawyeen mye'ent, jøts ix'oojknim ja yiknitsokpi?

<sup>12</sup>Winets ja Jesús y'adsøøy jøts ja tnimaay:

—Janch me'emp ja Elías jawyeen, ja'ats nøjkx nayide'en tyikjajtp ja øgyostumbri midi Dios ojts tpiкта'aky. ¿Jøts sa ja Dios kyajpxy wya'añ, sa øts ja nyiknigajpxy pøn møj kudanaabyi'ajtp, sak njatt? Yide'en ja Dios kyajpxy wya'añ jøts kuk ø n'ayo'ombaatt, ka'abik øts ja jaa'y xtsokt, x'ixwetspik øts ja jaa'y. <sup>13</sup>Jøts ndukmadøøpy meets ixyam ku ja Juan Bautista tø y'atsmiñ, jøts tø kyugajpx'aty nayide'en ejxim Elíasin, jøts jaa'y ja ojts yjemduñi tyeduñi pøni sa y'anmija'win ja tyimñekti, jajt idø'øn ja jade'en sa Dios kyajpxy wyinaty wya'añ.

**Ku ja Jesús tyikmøkpijky  
tu'uk ja mixyu'nk pøn wyinaty  
ja miku' tø tyatøkiyi**

<sup>14</sup>Jawaani y'ijty xjats ja Jesús tmøøtja'aty ja nidigøøк ja myigu'uk



ma ja pyabøjkpitøjk jam wyinaty tø yjaaktandi, jøts ja t'ejxpattøø ja mayjaa'y ku ja pyabøjkpitøjk jam wyinaty tø yiknabejkinidi; jøts kajpxwejpitøjk ja jam tmøøtnay'øjyidi. <sup>15</sup>Xjats ku ja Jesús yik'ejxpaajty, winets ja jaa'y niduki'iyyi ñigyumaap yjajtøø, jatyi ja tñibujtjø'ktøø ja Jesús, jøts ja ojts tkajpxpoo'kxti. <sup>16</sup>Xjats Jesús ja yiktøøjidøø, yide'en ja ñimaajyidøø: —¿Sats yø nbabøjkpitøjk xnøjmidi, ti yø møøt mnadyamigajpxidip?

<sup>17</sup>Winets ja mayjaa'y nidu'ugin y'adsøø yøts ja wyaañ:

—Windsøn, ixya me tø ndanimiñ tu'uk nmajnkun'k pøn ja miku' tmøøt'ajtp, jøts ja' yø kayikajpxip.

<sup>18</sup>Jatyi miku' yø myachi ku yø ma ñijkxy, ja'ats yø yiknaxkidajkip, jamts yø yjanch'a'øøpy jøts yjanchtøtskaaty, jade'en'ampy yø tø yjanchwindigøøñi, ka'ap myøjaaw yø ukteeni. Tø øts yø mbabøjkpitøjk njanøjmidi jøts tyikpidsø'ømdit yø miku' midi øts yø n'u'nk myøøt'ajtpy, jøts ka'ap yø tø myayidi.

<sup>19</sup>Xjats ja Jesús y'adsøø yøts ja wyaañ:

—Mee kajanchja'wibidi, yø mbøky nugo myikmajadaktip. ¿Ma windemnim meets ja ngajpxy ja n'ayuujk xpabøjkit, jøts windemnim meets yø jade'embì suktatso'okt ku øts yø ejtp njanchjanigajpx'ity?

<sup>20</sup>Winets ja tyikmendøø, xjats ku Jesús ja miku' y'ejxpaajti, winets ja mixy yikxidejtyø'jy møk'ampy, ja miku' ja ojts jade'en tyuñi, xjats ja kyidaay, kawinaak ojk ja kyibejp'awidijty jøts ja yjanch'a'øøpy. <sup>21</sup>Winets ja Jesús

tyiktiiy ja u'nkteety, yide'en ja tnimaay:

—¿Windii yø jade'en pyaadyi, windii yø jade'en yjajt'okwa'añ?

Xjats ja u'nkteety wyaañ:

—Jaayip yø pyaajtniyi ku yø myutsk'ajty, <sup>22</sup>may ojk ja miku' yø jønjøtpy tø yiktøkiyi, may ojk yø tø yiktøkiyi møj nøøjøtpy, jøts yø jade'en yik'ookwa'añi. Ukwaniik sa xu'unt, ayo'ejxk øøts, pudøjkik øøts.

<sup>23</sup>Xjats ja Jesús wyaañ:

—Pøni mjanchja'wip ja Dios, tum'ø y jaa'y pyidsø'ømxiiyi øy tyii'ji pøni ku tjanchjawi ja Dios.

<sup>24</sup>Winets ja mixy tyeety møk'ampy wyaañ:

—iNjanchja'wip øts ja Dios; jøts pudøjkik øts jøts njaakjanchjawit!

<sup>25</sup>Xjats ku ja Jesús ojts t'ixy ja mayjaa'y jøts ku ja ñamyuk'adi'ichidi, winets ja møk'ampy twingugajpxiyii'ñ ja miku', yide'en ja tnimaay:

—Miku', mets ja jaa'y myik'uu'mpy jøts mets ja jaa'y myiknajtpy, øts nyikutujkpy jøts mbidsø'ømt; majtstu'ut yø mixy, jøts kidi m'uktøjkini jadigojk.

<sup>26</sup>Xjats ja miku' møk'ampy chabaaguejky, jøts ja mixy ojts møk'ampy yikxidejtyø'ø y, winets miku' ja ojts myajtstu'udyi, jade'en ja yiktaajni ejxim ja jaa'y y'øøky, may ja jaa'y wyanidi jøts ku ja tø y'oo'kni. <sup>27</sup>Xjats Jesús ja ojts twejtsji'iky; jøts ja mixy tyanaagyukiyii'ñ.

<sup>28</sup>Winets ja Jesús tyøjkini tøjkjøtpy, jøts ja pyabøjkpitøjk ja yiktøøjiyøø yide'en:

—¿Tigøjxp ku øøts yø miku' tø ngayikpidsimy?

<sup>29</sup>Xjats ja Jesús wyaañ:

—Yø miku' jade'en'ajttip, winet yø pyidsømdi ku ja Dios n'ajot'ajtin jøts ku yø ngu'amaay'ajtin.

**Ku ja Jesús tnigajpxy  
jadigojk jøts ku ja y'ookt**

<sup>30</sup>Xjats ku ja ojts choondi jam, winets ja ñajxtøø Galilea. Jøts ka'ap Jesús ja pøn ttuknijawiywa'añ ku ja jam wyinatyi, <sup>31</sup>kumi yide'en ja pyabøjkpitøjk ja wyinaty yik'ixpiky, yide'en ja tnøjmi:

—Øts idø'øn

nmøjkudanaabyi'ajtpy ja naxwii'ñit jaa'y, jøts meets idø'øn nduknijawi sa njatt sa ngubatt ya naxwiiñ. Jade'en øts ja jaa'y xkøyakt, ku øts ja mayjaa'y xmatst jøts ø jatyi xyik'ookt; jøts ku jade'en n'uk'ookt, winets øts kyidigøøk xøøw nbidsø'ømt jap oo'kpi jutjøtpy. <sup>32</sup>Xjats ja pyabøjkpitøjk ja ka'ap tnmadowdi ku ja jade'en yiknøjmidi, jøts tsø'jkidip ja' øyik idø'øn ja tyiktø'ødit ti jade'en tyijpy.

**Pøn idø'øn jawaani møj ma Dios  
ja yjaa'y ja kyutujk ttanitani**

<sup>33</sup>Xjats ja Jesús jam tmøøtsøø'ñ ja pyabøjkpitøjk jøts ja yja'tti Capernaum, jade'en ja møj kajp xyøøw ma dø'øn ja ojts yja'tti; jøts ku ja tyøjkidøø tu'ugyi tøjkjøtpy, japts ja Jesús pyabøjkpitøjk tyiktiiy, yide'en ja tnimaay:

—¿Ti meets ukwan ja mgajpxy'ajtpy tuu'ajy?

<sup>34</sup>Xjats ja pyabøjkpitøjk amøñi y'amidoodukti, ka'ap ja sa wya'andi, kumi ja' ja jam wyinaty tø tnadyamigajpxyidi pøn pyabøjkpitøjk idø'øn ja

tyimyjawaani møj pidsømp.

<sup>35</sup>Winets ja Jesús y'ixaajky jøts ja tyaajiyii'ñ ja ñimakmajtskpi jaa'y pøn ixpøjktip, jøts ja tnimaay:

—Pøni pøn namyøjpikta'akwajnip, wan ja myigu'uk tpudøki, øy ti tunk ttu'unt ejxim ja jaa'y pøn ja ñitanaabyi kalejtp.

<sup>36</sup>Winets ja tñixajiyii'ñ tu'uk ja mutsku'nk jøts ja tpiktaajky jam agujk'am, jamts ja ojts ttsa'anji'iky, jøts ja wyaañ:

<sup>37</sup>—Pøni pøn tkupøjkp øy midi una'jku'nk øts køjxp, øts ja wyinaty jade'en xkupøjkp, kumi tum øts ja una'jk nja'ajtpy; jøts pøni pøn øts idø'øn jade'en wyinaty xkupøjkp, kidi øtsip ja wyinaty nadyu'uk xtyimgyupøkp, nayi kyupøkp ja nøjxk pøn ø xkajx.

**Ku ja Jesús wyaañ: Adøm  
ja' nbudøjkibi pøni ka'ap  
adøm ja xmidsep'ajtyindi**

<sup>38</sup>Winets ja Juan tnimaay ja Jesús:

—Windsøn, tø øøts ja jaa'y tu'uk n'ixy pøn tyiktump mets mmøk'ajtin, jøts miku' ja ttukmajtstu'uty ja jaa'y, jøts kumi ka'ap ja yik'ijxyi xjats øøts ja tø ndukmajtstu'uty jøts ja ka'ap jade'en y'uk'adøtsnit.

<sup>39</sup>Winets ja Jesús wyaañ:

—Janch øy midi yø jaa'y tyumpy, kidi xukmajtstu'utti; pøni yø' ja jaa'y tyiktsojkp øts køjxp, sudso øts yø jadigojk xmigajpxigøøgyojmit.

<sup>40</sup>Pøn adøm xkamidsep'ajtimp, xmigu'ukwa'animp adøm ja'.

<sup>41</sup>Jøts ku pøngapøn ja tsuxk nøø mmo'ojidit tuktsemu'ngin, ku ja ttaguayakit øts køjxp, jøts kumi

øts meets njaaktyimyjaa'y'ajtnip, wimbejtixiyip tigajtsxiyip ja nøjkk jawaani øy, kumi øts idø'øn meets xkristi'ajtp.

### Ja' midi yikpøkpyajtp

<sup>42</sup>Øy pøngapøn pøni pøn øts n'unajk nidu'ugin xyikpojkipituujniyip, pøni pøn øts n'unajk nidu'ugin xyiktundigøjyiyip pøn jaty ø xjanchja'widip, ne'egi ja øyik y'ijty jøts paandaak yiktayukwøønt ja jaa'y pøni pøn jade'en adøtsp jøts ja mejyotp yikuwibepit.

<sup>43</sup>Pøni myikpøktyuujnip yø mgø', ne'egi øy ku xkajtspoott jøts mjaakayikpojkipitunit; ne'egi øy jade'en ku mgø' tuktamajñ xmidøkit jap tsajpjøtpy, jøts kidi xmidøki ka'pxy jap miku' ku'py ma jøonyow nijuuni kyapi'ich, <sup>44</sup>ma tinø'øk nijuuni kya'øøky. <sup>45</sup>Pøni myikpojkipituujnip yø mdeky, ne'egi øy ku xkajtspoott jøts mjaakayikpojkipitunit; ne'egi jade'en paktuk mdøkit jap tsajpjøtpy, jøts kidi myikpikta'aky ka'pxy møøt mdeky jap miku' ku'py, <sup>46</sup>ma tinø'øk nijuuni kya'øøky jøts ma jøøn nijuuni kyapi'ich. <sup>47</sup>Jøts pøni ku yø mween myikpojkipituniyi, ne'egi øy jøts mnawyenuudiyit; ne'egi øy jade'en ku windu'uk mdøkit ma Dios kyutujk tnitani ja jaa'dyi, jøts kidi myikpikta'aky miku' ku'py møøt mween ka'pxy, <sup>48</sup>ma nijuuni kya'øøky, ma jøøn ejtp tyøøy.

<sup>49</sup>Niduki'iyi ja Dios yjaa'y nøjkk ayo'ombaaty ya naxwiiñ, jøts ku dø'øn jade'en tpaaty t'ixy winets ja nøjkk jawaani øy

pyidsømni. Jade'en idø'øn ndejint n'ukpiktaajkint ejxim ja jiyujk yøxy ku ja kaan ja møøt yiktamiyoxi, jawaani øy ja nøjkk pyidsømni. <sup>50</sup>Kaan amuum tyik'øygøjxp o ti, nayide'en meets idø'øn ndejint m'ødyu'unt ku mmigu'uk xukmado'ot ja Dios yja' sudso y'anmija'win kyawindigø'ødyit. Kuts ka'ap jade'en mdu'undit, tø wyinaty mbidsømndi ejxim ja kaanin midi kawa'ats midi katump. Møøt mnamyayidi o pøngapøn.

### Ku ja Jesús kyajpxwijy jøts kidi amajtsk jaa'y ñawya'kxyidi

**10** Xjats ja Jesús jam chøø'ñ Capernaum, jøts ja ñijkxy Judea, jøts ku ja jam ñajxy winets ja møj nøø ja ttanajxy midi txøow'ajtp Jordán. Jøts ja tniyø'øyi ja kajp midi jam wyinaty tamp jaduktamajñ'ampy, jamts ja jaa'y may'ampy ñamyukojmiiyidøø ma ja wyinaty, jøts ja ojts tyik'ixpiky jade'leñim sayim ja wyinaty jekyip tø ttuñ. <sup>2</sup>Xjats ja fariseotøjk winaaagin tñimendøø ja Jesús jøts ja nugo tkajpxy'ejxwa'andi, yide'en ja tñimadyi pøni øy idø'øn jade'en ku ñiyaa'y ja tmajtstu'utwa'añ ja ñidø'øxy, jade'en ja ojts tyiktøwdi. <sup>3</sup>Xjats ja Jesús y'adsøøy jøts ja wyaañ:

—¿Sa Moisés yikutujky?

<sup>4</sup>Winets ja y'adsøødøø jøts ja wyandøø:

—Ojts Moisés tyikutuky jøts ja nøky tu'uk kyojt ku ja yaa'dyøjk tmajtstu'utt ja ñidø'øxy.

<sup>5</sup>Xjats ja Jesús y'adsøøy jøts ja wyaañ:

—Ja'agøjxp ja Moisés jade'en tyikutujky ku mee niwine'enin mgamadøy, ku mee niwine'enin

mgaja'gyuki. <sup>6</sup>Kumi Dios tyiktso'ondakijxy tuki'iyi ku yaa'dyøjk ku tø'øxyøjk tyiknajtskojyiii'ñ jøts ja jaa'y y'amajtskidit. <sup>7</sup>Paty yaa'dyøjk kuwani tmajtstu'utt ja tyeety ja tyaak, jøts ñidø'øxy tu'ugyi tmøøtsøønit nadyu'uk, <sup>8</sup>ku jaa'y y'amajtsk'atti ka'ap ja y'uknamajtskinidi, tu'ugyi ja ñamyayi ñabyaajtñiyidi. <sup>9</sup>Paty ka'ap y'øyi ku jaa'y tyiknawya'kxit midi ja Dios tø tyik'amajtski.

<sup>10</sup>Xjats ku ja tyøjkidøø tøjktøpty, winets ja pyabøjkpitøjk tyiktøødøø jadigojk midi ja Jesús wyinaty tø tmadya'aky. <sup>11</sup>Ñigajpx idø'on ja Jesús ja', yide'en ja wyaañ:

—Pøni pøn ja ñidø'øxy tmajtstutp jøts jadu'uk tmøøt'amajtskigyojmi, ja jawyeen ñidø'øxy idø'on ja wyinaty kya'ødyumpy jøts ja pyøktyuñ; <sup>12</sup>jøts ku ja tø'øxyøjk tmajtstu'uty ja ñiyaa'y, jøts ja tmøøt'amajtskimi ja wenk yaa'dyøjk, øktyump idø'on ja nayide'en.

#### Ku ja Jesús tkunuu'kxy ja mutskuna'jk

<sup>13</sup>Xjats ja jaa'y y'una'jku'nk tyikmendøø, ja' ja tyuknimendøø jøts ja Jesús ja tkønixajt, jøts ja møjaa'y jade'en yja'attøø jam møøt ja mutskuna'jk; winets ja pyabøjkpitøjk ja ojts møk'ampy wyingugajpxiyidi. <sup>14</sup>Xjats ku ja Jesús ja jade'en ojts t'ixy ja pyabøjkpitøjk, winets ja yjanch'ambijky jøts ja wyaañ:

—Majtstu'ut yø una'jk, wan øts yø xnimendi, kidi xnøjmidi kuts yø xkanime'endit, kumi tum

jade'embi jaa'y nøjkk nitanaajyip ja Dios kyutujk. <sup>15</sup>Janch øts idø'on nwa'añ, pøni pøn tkagupøjkp ja Dios kyutujk midi ja tyanitanaapy ja yjaa'y, niwindem xøøw ja jaa'y ja nøjkk tkadatøki jadigojk pøni ku ja wyinaty jade'en tø tkagupiky ejxim mutsku'nk yikupikyin.

<sup>16</sup>Winets ja ttsa'anji'jky ja mutskuna'jk jøts ja ojts tkunuu'kxy, ojts ja kyø' ja ttanixajkixy.

#### Ja kumeñ jaa'y

<sup>17</sup>Xjats ku ja yjaakwidijty, winets ja jaa'y ja tu'uk putyi ñimejnøø jøts ja wyinguxanaajyi, yide'en ja ñimaajyøø:

—Mets øyjaa'y yik'ixpøjkpi, ÷ti ø ndu'ump jøts øts n'anmija'win tpaatt ja nitso'ok'ajtin xemikøjxp?

<sup>18</sup>Xjats ja Jesús wyaañ:

—÷Ti jade'en myikwajnip ku øts jade'en xnøjmi jøts ku øts janchtyimy'øyjaa'y? Ka'ap pøn y'øyjaa'yi, tu'ugyi Dios y'øyi. <sup>19</sup>Mnija'wipxi dø'on ja Dios kyutujk midi nømp: “Kidi mmigu'uk ñiyaa'y ñidø'øxy xpøjkxi; kidi myikjaa'y'øøky; kidi mmeech; kidi mmigu'uk xwindaa'y'aty; windsø'øgi mdeety mdaak.”

<sup>20</sup>Xjats ja jaa'y y'adsøø yøts ja wyaañ:

—Windsøn, jaayip øts yø tuki'iyi nbadundøjkini ku nmutsk'aty.

<sup>21</sup>Winets ja Jesús twin'ejxji'jky ja jaa'y amyujy tsaachuyj, jøts ja tnimaay:

—Jap jadu'uk midi mjaakabadumpy: nøjkk, tuki'iyi x'atsto'okixy ti jaty jam mmøøt'ajtpy, jøts ja ayoobi jaa'y xabudøkit, winets ja Dios

mjotkujk'ajtin mmo'o'jiiyt jap tsajpjotpy; nøjcx x'atstuñ mididnijpy, winets ø xpadsoont.

<sup>22</sup>Xjats ku ja jaa'y jade'en tmadøøy, winets ja nugo tkumaa'yiyii'ñ tkudajiyii'ñ, janch ñiyjotmay'oo'kpim ojts ñøjcxni, kumi janch kumeeñ jaa'y idø'øn ja wyinaty.

<sup>23</sup>Xjats ja Jesús twin'ejxjø'kijxy ja jaa'y pøn ja jam wyinaty nidanaajyip, winets pyabøjkpitøjk ja tnimaay:

—iØy yjanchepi sudso ja kumeeñ jaa'y tkupøjkit ja Dios kyutujk midiyjaa'y ja tyanitanaapy!

<sup>24</sup>Xjats ja pyabøjkpitøjk jadi'iñi myondi tyukti ku ja Jesús jade'en wya'añ; winets ja Jesús wyaañ jadigojk:

—U'nk ana'jkti, ijanch tyimchep sudso ja kumeeñ jaa'y ttatøkidit ja Dios kyutujk, kumi myeeñ ja amuum yikmøjtøjkidip! <sup>25</sup>Ne'egi tsojk ñaxt tu'uk ja møj jiyujk jap xuu'ñ jutjotpy, jøts nigidi tu'uk ja kumeeñ jaa'y tyøkit jade'en ma Dios kyutujk ttanitani ja yjaa'y.

<sup>26</sup>Xjats ku ja jade'en tjaaktyimyadoodøø ku ja Jesús wya'añ, winet ja tyimñigyumaap yjajttøø, jøts ja xem yam ñawyajnidøø:

—¿Jøts pønims idø'øn nitso'ok'atp?

<sup>27</sup>Xjats ja Jesús y'ejxji'jky, jøts ja wyaañ:

—Ka'ap yø øy pøn jaa'y kø'øm ñankñitso'ogiyit, ja Dios ja'ayi myøøt'ajtpy ja møk'ajtin sudso xyiknitsoojkint; ti Dios tkatsepjawī.

<sup>28</sup>Winets ja Pedro kyajpxøjkii'ñ jøts ja wyaañ:

—Tø øø tuki'iyi nmajstutkixy ja nbikta'aky, jøts ixyam øøts idø'øn jade'en nwidity mets møøt.

<sup>29</sup>Xjats ja Jesús y'adsøøy:

—Janch meets idø'øn nnøjmi, pøni pøn tmajstuttip tyøjk, pøn tmajstuttip y'ajch y'uch, jøts chø', ja tyeety ja tyaak, uk ja y'u'nk ñidø'øxy tmajstutu'uty møøt ja naajx ja kam, pøni pøn jade'en tmajstutp ja pyikta'aky øts køjxp, ja øgyajpxkøjxp ja ømyadya'akyøjxp, <sup>30</sup>pyaatp ja nøjcx ja tøjck may'ampy, may'ampy ja nøjcx tpaaty y'uch y'ajch, ja tyeety ja tyaak, ja ñaajx ja kyam, øy ja tjaku'ayo'ombaadi øts køjxp; pøni myidanaapy idø'øn ku sa yiktu'unt, winets y'anmija'win ñøjckxt ma Dios. <sup>31</sup>Jøts may ja jaa'y Dios nøjcx yik'amutskiyidi, pøn nugo namyøjpiaktak'ejtíp; ja' ne'egi ja Dios kajxa'aky yikpidsø'ømp, pøn yik'ayo'om'ejtp.

### Ku ja Jesús tnigajpxy jadigojk jøts ku ja y'oockt

<sup>32</sup>Jam idø'øn ja wyinaty pyatti ma jam ja tuu' pyety mididijcxp Jerusalén, ja Jesús wyinaty jawyeen yø'øpy jøts ja pyabøjkpitøjk ix'oojk yø'ødyi. Xjats ja pyabøjkpitøjk ja ñigyumaap tjawidi ku ja Jesús jade'en ñijxxy, jøts janch tsø'jkidip ja'. Winets Jesús ja yjiwa'widøø nimakmajtsk, jøts ja ojts tyukmadoowinibøjkidi jadigojk sa jaty ja wyinaty yjatwa'añ kyubatwa'Lgxañ. <sup>33</sup>Yide'en ja ñimaajyidøø:

—M'ejxtip ku ixyam nbejtyindi jøts nnijxxyindi jam Jerusalén ma øts jaa'y xkøyakt, pøn møj kudanaabyi'ajtpy ja naaxwii'ñit

jaa'y, jøts øts ja israelit jaa'y  
 tyeetywindsøn jam xmatst jøts ja  
 kajpxwejpitøjkti, ja'ats tyikutuktip  
 jøts ø n'ookt, jam øts ja xkøyaktit  
 mā ja wenk jaa'y yikutukti  
 møk'ampy. <sup>34</sup>Xikxon ø nyiktaxe'ekt,  
 yikwop yikoxp øts, xnidsujip øts  
 ja jaa'y, jøts øts ja jaa'y xyik'ookt;  
 jøts ku øts wyinaty jade'en tø  
 n'øøky, kyidigøøk xøow øts jadigojk  
 nbidsø'omt jap oo'kpi jutjøtpy.

**Ku ja Jacobo møøt ja Juan  
 t'amidoodøø ja may'ajtin**

<sup>35</sup>Xjats ja Jacobo, møøt ja Juan  
 pøn ja Zebedeo myajnk'ajttip,  
 ja' ojts tnimendi ja Jesús jøts ja  
 tnimaadyi:

—Windsøn, ja' øø ndsøjkpy  
 jøts øø xuujnit ja may'ajt, ja' øø  
 n'amidoowampy.

<sup>36</sup>Winets ja Jesús tyiktiiy yide'en:  
 —¿Ti dø'øn mdsojktip, ti ø  
 ndu'ump?

<sup>37</sup>Xjats ja wyandøø:  
 —Xmøøtsøøni øøts ku myikutukt,  
 adsow aduuk øøts xyiktsøønit  
 mgutujktaajkjøtpy, jøts øøts ja jaa'y  
 xwindsø'øgit.

<sup>38</sup>Winets ja Jesús wyaañ:  
 —Ka'ap meets yø xnijawī pø ti  
 mee m'amidøøpy. Ngupøkp øts  
 ja ayo'on jøts pøni sa øts ja jaa'y  
 x'uktu'unt. ¿Jøts meets, mgupøktip  
 meets nayide'en ja ayo'on jøts pøni  
 sa meets ja jaa'y m'uktunit?

<sup>39</sup>Xjats ja y'adsoodøø jøts ja  
 wyandøø:  
 —Ngupøkp øøts, tiku øøts ndejint  
 ngagupøkt.

Winets Jesús ja tnimaay:  
 —Janch jade'en, mjanchkupøkp  
 meets nayide'en ja ayo'on midī

ø ngupøkp, jøts mjanchkupøktip  
 meets nayide'en pøni sa øøts ja  
 jaa'y x'uktu'undit; <sup>40</sup>tyimyø' ku  
 meets xmøøtsinaawya'añ adsow  
 aduuk, kidi øtsip meets ja nmo'op,  
 ja Dios Teety ja tyakp jøts ja' ja  
 myø'op pøni pøn ja jade'en tø  
 ttamidsøky.

<sup>41</sup>Xjats ku ja yjadu'ukpi  
 pyabøjkpitøjk tmadoodøø jade'en,  
 winets ja yjanch'ambøjktøø, jøts  
 ja Jacobo yikmi'ambøjktøø  
 møøt ja Juan. <sup>42</sup>Winets ja Jesús  
 pyabøjkpitøjk tyajxmujky, jøts ja  
 tnimaay:

—Yide'en'ampy ja jaa'y  
 wyindsøn'aty pøn Dios kyajpxy  
 tkabadundip, ja'ayi nugo ja jaa'y  
 tyiktuñ, jøts ja tu'ugyi tja'abøjkxøni.

<sup>43</sup>Jøts ka' mee nøjkx jade'en  
 mjatti. Wenk meets mja'ami, pøni  
 pøn namyøjkpikta'akwajnip, ja'  
 idø'øn jade'en mõjtøkip pøni pøn  
 ja myigu'uk twindsø'jkip; <sup>44</sup>jøts  
 pøni pøn tsuj windsøn'atwamp,  
 ja' idø'øn windsøndøkip pøni pøn  
 tuki'iyi ja jaa'y jade'en tpuðøjkip.  
<sup>45</sup>Ja'agojxp ø nmiñ jøts ja jaa'y  
 nbudøkit øy ti tunk ndu'unt, kidi  
 ja'ajip øts tø nnimiñ jøts øts jaa'y  
 øy ti tunk xuujnit, ja' ø tø nnimiñ  
 jøts øts pøkyjaa'y ngubajtit ja  
 pyøky ku n'ookt winets ja mayjaa'y  
 yikpojkipimaa'kxt. Øts idø'øn ja'  
 myøjkudanaabyi'ajtpy ja naxwii'ñit  
 jaa'y.

**Ku ja Jesús tyikwin'ejxwa'kxy ja  
 winap jaa'y pøn txøow'ajtp Bartimeo**

<sup>46</sup>Xjats ja yja'ttøø Jericó. Jøts ku  
 ja Jesús pyabøjkpitøjk jam wyinaty  
 tmøøtpidsimy kajpjotp møøt ja  
 mayjaa'y, winets winap jaa'y ja

tu'uk tpattøø pøn txøøw'ajtp Bartimeo, ja Timeo y'u'nk, jam ja wyinaty chøøni tuu'am jøts ja tigati tyikmuky. <sup>47</sup>Xjats ku ja tñimadøø y jøts ku ja Nazaretit jaa'y jam wyinaty ñaxy midi txøøw'ajtp Jesús, winets ja winap jaa'y møk'ampy kyajpxkejky jøts ja wyaañ:

—iWindsøn'ajtim, rey David y'ap y'u'nk, ayo'ejxk øts!

<sup>48</sup>Xjats ja mayjaa'y ja møk'ampy wyingugajpxiyøø jøts ja y'amo'ont, ka'ap ja winap jaa'y y'amøñ, ne'egi ja tjaakyikjinajx'adi'ich, yide'en ja wyaañ:

—iMets myimajtsk'ap'ajtip ja møj windsøn David, ayo'ejxk øts!

<sup>49</sup>Xjats ja Jesús wya'k'øyyii'ñ, jøts ja pyabøjkpitøjk ja tñøjmi:

—Nøjkx x'atswawdi.

Winets ja winap jaa'y y'atsyikwaay, yide'en ja t'atsnimaadyøø:

—Tsojk, pidø'øk, ixam idø'on myikwaadsøy.

<sup>50</sup>Xjats ja jaty tñajtswøjii'ñ ja yukwop, wo'onjø'kp inet ja adsu'jky, jøts ja tñinijkxy ja Jesús. <sup>51</sup>Winets Jesús ja yiktøøjøø:

—¿Ti mdsøjkpy, sa me ndu'unt?

Xjats ja winap jaa'y y'adsøø y jøts ja wyaañ:

—Windsøn, ja win'ejxwamp øts.

<sup>52</sup>Winets ja Jesús ja tñimaay:

—Nøjkxni; tø me mdsokni kumi tø me xjanchjawi.

Xjats ja winap jaa'y jaty wyin'ejxwa'lkxy, jøts ja tpanijkxy ja Jesús jam tuu'am.

**Ku ja Jesús kyajptøjkiyi'ñ Jerusalén**

**11** Xjats ku ja jam wyinaty yja'atwanidi Jerusalén,

winets ja tyandøø jam Betfagé midi ja kajp Betania wyinaty møøt ñamyiwingon'atyi, ja kajp midi jam wyinaty tandip kojpk ix'am midi txøøw'ajtp Olivos, jamts ja Jesús pyabøjkpitøjk namajtsk tkajxtsøø'ñ, <sup>2</sup>jøts ja tñimaay:

—Nøjkxti ixem ma yø kajpu'nk wingon, jøts ku net jam mja'attit, jamts inet buuru'nk tu'uk kuwiiñ xpaattit midi tsotsnim, midi ka'aním pøn ttatsøøni. Nøjkx x'atmigajidi jøts xwejtsme'endit. <sup>3</sup>Jøts ku pøn myiktøwidit tiku jade'en m'adø'øtsti, jade'en xnøjmidit jøts ku t'anuu'kxwaa'ñ nwindson'ajtim, jøts ku ja jaty tyikwimbejtkojmit.

<sup>4</sup>Xjats ja pyabøjkpitøjk ñøjkxti, jøts ja buuru'nk ja ojts tjanchpaatti kuwiiñ jam tøk'agø'øom, jam ja tpaatti tuu'am jøts ja tmigajidøø.

<sup>5</sup>Winets ja jaa'y winaagin tyiktøødøø pøn jam wyinaty, yide'en ja ojts ñii'mxyidi:

—¿Ti mdundip? ¿Tigøjxp ku yø buur xmigajidi?

<sup>6</sup>Xjats ja pyabøjkpitøjk y'adsøødøø jade'en sa Jesús ja wyinaty tø ñii'mxyidi; winets ja ojts yikmajtsu'utti jøts ja jam choo'ndi. <sup>7</sup>Xjats ja jade'en tyiktso'ondøø ja buur, jøts Jesús ja ojts ttaninøjkxti; winets ja wyet ja ttajiba'andøø ja buur, jøts Jesús ja ttawaa'tspejty ja jiyujk. <sup>8</sup>May jaa'y ja wyet ojts ty'a'apti jam tuu'am, jøts may ujts'aay ja ojts ttu'kxti jøts ja jam nayide'en tpiktaktøø, jøts ja Jesús jade'en tpaatsowa'andi ejxim møj windsønín. <sup>9</sup>Xjats ja niduki'iyi møk'ampy kyajpxkaktøø, jøts ja niduknax wyandøø:

—iDios Teety tsajpjotpit, kunuu'kx yø windsøn pøn me tø xkexy!

<sup>10</sup>iKunuu'kx yø windsøn midimgutujk mimejniyip, wan ja tyeety'ap David tyikmøjtaajki ja kyutujk jadigojk! iKuuyi ja Dios Teety jadu'uk yjaak'øyi!

<sup>11</sup>Xjats ja Jesús jade'en tyøjkiyii'n Jerusalén, jade'en ja yja'ljty jam tsaptøjkjotp. Jøts ja ojts t'ejxkixy tuki'iyi ti jaty jam wyinaty ejtp; jøts ku ja ojts jade'en t'uk'ejxkixy, winets ja ñøjxkni jam Betania møøt nimakmajtsk pyabøjkpitøjtk, ja'agøjxp ja ojts ñøjxknidi ku ja et wyinaty tø chuu'ni.

**Ku ja Jesús t'ayo'onmigajpxy ja iigi tsa'amguipy midim ja tyøøm ka'ejtp**

<sup>12</sup>Xjats ku ja Jesús kyimjabom choo'ndøø Betania, winet yuu ja pyaajtøø. <sup>13</sup>Jøts ja jagam t'ejxpaajty tu'uk ja iigi kipy midim jam wyinaty janch'aamyøøt; xjats ja ojts tninijxxy jøts ja t'ats'ejxwa'añ pøni jam idø'on ja tyøøm. Jøts ku ja ojts t'ixy, ni tu'ugin ja tyøøm ja tkapaajti, nugo ja wyinaty janch aay ja ñaxy, kumi ka'anim ja tiempim wyinaty tpaaty ku ja iigi tyøømi. <sup>14</sup>Winets ja Jesús tmigajpxy ja iigi kipy, yide'en ja tnimaay:

—iNijuuni mga'uktøømiñit!

Ku ja Jesús jade'en wyaañ, myadowdi ja pyabøjkpitøjtk ja'adi.

**Ku ja Jesús twojpidømguixy ja too'kpitøjtk jam tsaptøjkjotp**

<sup>15</sup>Jawaani y'ijty, xjats ja yja'ttøø jam Jerusalén. Jøts ku ja Jesús tyøjkiyii'n tsaptøjkjotp, winet ja t'ixwojpidømgiixy ja jaa'y pøn jap wyinaty too'ktip yajktip, midim

jam wyinaty juudyip kajpxtip, tuki'iyi ja t'ixkajxpidsømgiixy. Nayi yikpidømøm ja jaa'y ja' pøn jam wyinaty meen' tkugondiip, tuki'iyi myesi ja yiktejsapwajkøjxtøø, jøts nayide'en ja pak too'kpi chinaabyajt yiktejimbejtkøjxtøø; <sup>16</sup>jøts ja Jesús ja jaa'y tka'uktuk'anajxni ja tsaptøjtk ku ja jam tigati tjatsømnaaxwa'andi. <sup>17</sup>Yide'en ja Jesús tnimaay ja jaa'y ku ja yik'ixpijky:

—Yide'en jap nøykiixpy wya'añ: “Ja' øts ndøjtk wya'ant jøts naxwii'ñit jaa'y jap t'ajot'attit ja Dios Teety”; jøts ka'ap meets ja jade'en ti xyiktuñ, maa'tstaajtk meets ja' tø xyikwani.

<sup>18</sup>Xjats ku ja jade'en tmadoodøø ja israelit jaa'y tyeetywindsøn møøt ja kajpxwejpitøjtk, winets ja t'ixaadyøjkidøø ja taay jøts ja ttuku'oogiwy'a'andi, chø'jkidip idø'on jaa ku ja yjaa'y yikpøjtkøxniiyidit, paty ja jade'en tnidaayiwya'andi kumi tyumnija'winiiyip ja mayjaa'y ja wyinaty ku ja janchnigyumaap yik'ixpiiky. <sup>19</sup>Xjats ku ja et chuu'ñaay kyoodsiñaay, winets ja Jesús tmøøtsoo'naay ja pyabøjkpitøjtk jam møj kajpjotp, jøts ja jam ñøjkxti ma ja chøønidi.

**Ku ja iigi tsa'amguipy tyiijch**

<sup>20</sup>Xjats ku kyimjabom'ajty, winets ja jam jøpyi ñajxtøø ma ja iigi kipy jam wyinaty tyani, jøts ja ojts t'ejxti ku ja wyinaty tø tyøtjsjø'kni y'aatsjøtpy. <sup>21</sup>Winets ja Pedro ja tja'myejch, jøts ja tnimaay ja Jesús: —Windsøn, ejx ja iigi kipy tø tyøøtsni midim ojts x'ayo'onmigajpxy.

<sup>22</sup>Winets ja Jesús y'adsøø yøts ja wyaañ:



—Janchjawidi Dios møk'ampy.  
<sup>23</sup>Janch meets idø'on nnøjmi, pøni pøn tnimaapy ya'at kojpk: “Nøjkk mejyotp, jamts mdøkit”, pøni ku amumjoojt jade'en mwinmay ku ka'ap mmay mdajy, jøts ku kø'øm xjanchjawi ja m'ayuujk pøni sa wyinaty tø mwalañ, jatp idø'on ja jade'en pøni ku wyinaty jade'en ja janchja'win xmøøt'aty.  
<sup>24</sup>Paty mee nnøjmi pøni ti jaty m'amidoodip ja Dios, pøni ti mgu'amidoowidip jøts ku xjøp'ejxtit jade'en, jatpts ja jade'en. <sup>25</sup>Jøts ku mdios'ajot'attit, pøni jam ja mmidsepti, maa'kxukti, jøts Dios Teety nayide'en mbojkipimaa'kxidit pøn jap tsajpjøtpy. <sup>26</sup>Pøni ku ka'ap xmaa'kxukti ja mmigu'uk, nayide'en meets ja Dios Teety mgapojkipimaa'kxit pøn jap tsajpjøtpy.

### Ja Jesús myøk'ajtin

<sup>27</sup>Xjats ja jade'en jadigojk ñøjkkxtøø jam Jerusalén. Jøts ku ja Jesús jap wyinaty wyidity jap tsaptøjkjøtpy, winets ja jap ojts ñimiñi ja teetywindsøn, ja kajpxwejpitøjk, jøts ja møjaa'dyøjkti pøn ja kutujk jam wyinaty t'adsinaadyip, <sup>28</sup>ja'ats ja ojts yiktiyi, yide'en ja wyandøø:

—¿Pøn jade'en tø mdanigutujk'aty ku jade'en m'adi'ich ya tsaptøjkjøty? ¿Pøn mets jade'en mgutujkmø'øyi?

<sup>29</sup>Xjats ja Jesús y'adsøø y jøts ja wyaañ:

—Nayide'en mee nyiktøøwami; pøni x'adsoowimbejtíp øts inet, winets inet ndukmado'odit pøn øts yø jade'en tø xanigutujk'aty ku

øts jade'en n'adi'ich. <sup>30</sup>Ku ja Juan Bautista ojts yiknøbety, ¿pøn ja ojts tyanigutujk'aty ku ja jade'en y'adiiich? ¿Sa mee m'ukwalañ, Dios ja ojts tyanigutujk'aty jøts ja jade'en y'adø'øst? Adsoojimbejtík øts.

<sup>31</sup>Winets ja kø'ømyi ñagyajpxkaajkidøø, yide'en ja ñawya'añidi:

—¿Sa njanch'uknimaa'yint? Ku net yø njanimaa'yint: “Dios ja ojts kyutujkmø'øyi”, yide'en adøm inet yø x'adso'owint: “¿Jøts tigøjxp ku ka'ap xjanchjawidi pøni jade'endam ja'?” <sup>32</sup>Jøts ja jaa'y inet xmi'ambøjkma'ant ku net njawa'anma'ant jøts ku jaa'y ja ojts kyutujkmø'øyi.

Jade'en ja kø'øm ñawyajnidøø, jøts kumi ñija'widip ja jaa'y wyinaty may ku ja Juan ja Dios kyugajpxy'aty, paty ja jade'en chø'jkidøø. <sup>33</sup>Jøts ja yide'en tnimaadyi ja Jesús:

—Ka'ap øøts ja nnijawi.

Xjats ja Jesús tnimaay ja jaa'y:

—Nayide'en meets ja ka'ap ndukmado'ot pøn øts jade'en xanigutujk'ajtp ku øts jade'en n'adi'ich.

### Ku ja Jesús tmadyakpaajty ja ka'ødyumbi

**12** Winets ja Jesús tmigajpxøjkiiñ ja jaa'y ejxpajtin madya'akyøjxp, yide'en ja wyaañ:

—Jaa dø'on jaa'y wyinaty tu'uk pøn ja uvi tsal'am ojts tteñ kyamjotp; jøts ja yikxon tnagueemy tñabijky, jøts ku ja jade'en t'uktuuñ winets ja tyik'øyyiiñ tu'uk ja uvi

kumdaajk ma ja uvi tsa'am nøø ojts id'øon ja jade'en tyik'øyi, xjats ja tpøjch tu'uk tøjch janch køjxp jam kyamjotp. Kam ejx'etaajk id'øon ja yik'øyiyii'n, ojts id'øon ja jade'en tyik'øyigyixy.

<sup>1</sup>Winets ja tamuky tkøyajknaa ja kyam, tumbi ja ojts ttukmidañ, jøts ja ñøjxni abiky et. <sup>2</sup>Xjats ku ja tiempi tpaajty juuni cha'amy ja uvi tsa'am, winets ja windsøn tkejxy tu'uk ja tyumbi jam ma ja jaal'y ja tsa'amgam jam wyinaty tømimidand'i jøts ja jam t'atstuk'amidoowa'añ ja tsa'am kikujkp midi jam wyinaty ejtp kyamjotp. <sup>3</sup>Xjats ku ja tumbi jam yjal'jty, winets ja jatyi yikmajch jøts ja kam ejx'etpi ja ojts chiigyiyi, ka'ap ja ti yikmøøy, jadi'iñi ja jam wyimbijty. <sup>4</sup>Winets ja kugam tkejxy jadu'uk tyumbi nay jam; ojts ja ñijkxy jøts ja jam nayide'en yiktuuñ, yikxon ja jam ojts tyika'ach, ojts ja chaachi kyubajkiixpy, janchiktsepmigajpx ja jam. <sup>5</sup>Xjats ku ja nay jadi'iñi wyimbijty, winets ja kugam tjaakejxy jadu'uk tyumbi pøn ja kam ejx'etpi ojts tyik'ookti. Janch namay ja tumbi tmøøt'aty jøts ja xyumikexy tu'uk jatyi ja tsa'am tsømbi; ja'ats jam ojts ja kam ejx'etpi kya'ødyuñidi, pømbi yikwojp yikoix, jøts pømbi winaagin oo'ktøø.

<sup>6</sup>Jamts ja kugam myajnkun'k wyinaty tømøøtañ, tu'ugyi ja t'u'nk'aty, ja'ats ja jam kø'øm myøøtañ, ja'ayi ja yjanchøjkpy; xjats ja ojts ix'oojk tkexñim, yide'en ja wyaañ: "Yikwindsø'øgip yø kumi øts n'u'nk yø'." <sup>7</sup>Jøts ja tumbitøjch pøn jam wyinaty t'ejx'ejttip

ja tsa'amgam, ka'ap ja jade'en wyandøø jøts ja twindsø'øgidit, t'ixwibejpidsøjmidøø ne'egi jinaxy ja ñawya'añidøø: "Ya'at inet ja' pøn kugam'atp; wan tyikpa'ø'jkyimp jøts adøm yø tsa'amgam nja'bøjkna'ant." <sup>8</sup>Xjats ja jade'en tmajtstøø, jøts ja tyik'oo'ktøø, ojts ja ñine'kx ja t'ixwibejpidsøjmidøø jam tsa'amgamjotp.

<sup>9</sup>Jøts, ðti tyu'ump ja kugam kø'øm ku ja y'u'nk jade'en y'ø'jky? Kuwani ja kø'øm tnime'ent, winets ja tyikudigøøgyøxt ja kam ejx'etpi, jøts ja abikyjaal'y ja t'ixa'att, ja'ats ja myo'op ja cha'amgam.

<sup>10</sup>'iKa'anim ja nøky xkajpxidi ma yide'en wya'añ?

Ja tsaamidi ja pojtspi  
kya'uk'a'ejxidøø,

Ja'ats ne'egi ixyam tøm  
y'ukyikpiktakni pøch kyubajk  
jøts ja ttamajtsmujkixy ja  
pøch.

<sup>11</sup>Ja Dios Teety id'øon jade'en  
tøm ttuñ, øy yø nigyumaap  
njaja'wandi.

Jade'en ja Dios kyajpxy wya'añ.

<sup>12</sup>Winet et ja israelit  
tyeetywindsøn tmajtswandøø ja  
Jesús, ja'agøjxp ku ja wyinaty tøm  
myigajpxyidi jade'en. Jøts kumi  
chø'jkidip ja mayjaa'y ja wyinaty,  
paty ja ojts jadi'iñi tmajtstu'utti,  
jøts ja jade'en choo'nidøø.

#### Ku yikajpxy'aty ja kugubajt

<sup>13</sup>Waani y'lijty, xjats ja Jesús  
winaagin yiktaniguejxy ja  
fariseotøjch møøt ja Herodes  
myigu'uk, jøts ja nugo  
yjot'ejxwa'añi, ja' ja nugo chojktip  
jøts ja kyajpxigø'øty, ja'ats ja

yiktani'òònip. <sup>14</sup>Ojts idø'òn ja Jesús jam yiknimiñ, jøts ja yiknimaay:

—Windsøn, nnija'wip øøts jøts ku mets tiy janch mgajpxy, ku me ka'ap xmøjpikta'aky pøni sa jaty ja jaa'y wya'andi, jøts kumi ka'ap mets pøn x'ejxkapy xka'ejxkapy, mdum'ejxkajpkijxpy mets ja jaa'y, jøts tu'ugyi mets tiy janch xuk'ixpiky ja jaa'y sudso nnøjxxin ma Dios, paty øø nyiktøwa'añ: ðØy ku øøts ja windsøn César nmiyakt nmigubatt, uk ka'ap? ðNmo'op øøts ja meeñ, uk ka'ap?

<sup>15</sup>Xjats kumi ñija'wip ja Jesús wyinaty jøts ku nugo yjot'ejxwa'añidi, winets ja tnimaay:

—ðTiku ø xjot'ejxti? Yakti tu'uk meeñ, wan ø t'uk'ijxy.

<sup>16</sup>Xjats ja ojts tmo'odi, xjats ku Jesús ja twin'ixy winets ja ojts tyiktiy, jøts ja wyaañ:

—ðPøn ya'at ja wyeen y'aaw, jøts pøn ya'at ja xyøow ixya kyøjxja'ayi?

Xjats ja y'adsoodøø jøts ja wyandøø:

—César yø' yja'.

<sup>17</sup>Winets Jesús ja tnimaay:

—Mo'odi ja César ja yja' pøni midì ja yja'ajtpy, jøts ja Dios xmo'odit pøni midì ja yja'ajtpy.

Jøts ku ja Jesús jade'en wyaañ, winets jaa'y ja ñgyumaap tja'widøø ku ja jade'en y'adsøøy.

**Ku ja jaa'y tyiktøwdi pøni janch idø'òn ja' ku oo'kpi jadigojk jyujkpyøktit**

<sup>18</sup>Xjats ja Jesús ja saduceotøjk ojts ñimiñiyi. Ja' ñimejniyi pøn nømdip jøts ku oo'kpi nijuuni kya'ukpidsømnidit jap oo'kpi jutjøtpy; ja'ats ja ojts yiktiyi jøts ja ojts ñii'mxyi:

<sup>19</sup>—Windsøn, yide'en ja Moisés ojts tjaadyañ tu'uk ja kutujk pøni pønìk tku'oo'kp ja ñidø'øxy, jøts ku ja y'u'nk ja ni tu'uk tkayiktañ, winets ja ku'økytø'øxy tmøøt'amajtskit ja ñiyaa'y oo'kpi myigu'uk midì nadyu'uk jøts ja jade'en yika'axiyit. <sup>20</sup>Jøts ja dø'òn ja jaa'y wyinaty niwixujkti, jade'en ja tyukjaa'y'atti. Xjats ja myøjpi jawyeen y'amajtskiyiñ, jøts ja jatyi tku'ø'jky ja ñidø'øxy, ka'anim ja y'u'nk ja wyinaty tpaatinim.

<sup>21</sup>Ku dø'òn ja jade'en y'ø'jky, winets ja mutskpi midì ja oo'kpi wyinaty myijidsim'yajtpy, ja' ojts tmøøt'amajtski ja ku'økytø'øxy, jøts ja nayide'en y'oo'knimøø, ni tu'ugin ja y'u'nk ja tkayiktaañ; nayide'en ja myidigøøkpì yaa'y yjajty. <sup>22</sup>Niduki'iyi ja tø'øxy ja tyiknajxkijxy ja yaa'dyøjk niwixujk yaa'y, jøts nipøn ja y'u'nk ja ojts kyadukpaadyi, nipøn ja y'u'nk tkayiktaañ. Xjats ja tø'øxyøjk nayide'en y'oo'knimøø. <sup>23</sup>Jøts ku ja jadigojk pyidsø'ømdit jap oo'kpi jutjøtpy, ðpømbi ja tø'øxy nøjkx jadigojk tnidø'øxy'aty, kumi tø ja niduki'iyi t'atsnidø'øxy'ajtkøxti?

<sup>24</sup>Xjats ja Jesús y'adsøøy jøts ja wyaañ:

—Ka' mee m'øwyinmay, ja'agøjpx ku xkanijawidi ja Dios kyajpxy, ku xkanijawidi ja Dios myøk'ajtin. <sup>25</sup>Ku dø'òn ja oo'kpi nøjkx pyidsømdì jadigojk jap oo'kpi jutjøtpy, nipøn nøjkx kya'uk'amajtskiñ, nipøn nøjkx kya'uktø'øxmyiyø'øni, nipøn y'u'nk tka'ukyik'amajtskiñit. Jade'en ja tsinaa'yin ja nøjkx tyiknaxti ejxim ankilis pøn tsinaadyip jap

tsajpjøtpty. <sup>26</sup>¿Ka'ap meets xnijawi, jøts ku ja Dios kyajpxy wya'añ ku ja oo'kpi pyidsø'omt jadigojk jap oo'kpi jutjøtpty? ¿Ka'anim ja nõky x'ixpøkti midi ja Moisés ojts tja'ay, ma ja tnigajpxy sudso Dios ja ojts myigajpxyi jam ujts aayjotp? Ku ja ojts ñii'mxyi: “Tum øts xdios'ajttip ja Abraham, ja Isaac jøts ja Jacob.” <sup>27</sup>Kidi oo'kpipts ja ñidios'ajtpy, pø ja'axi ja ñidios'ajtpy jøts ja tyikjuky'att øy pøn. Jøts mga'øwynmaapy meets idø'on ku xkajanchjawidi.

**Ja møj kutujk midi ja  
Dios ñi'ane'empy**

<sup>28</sup>Xjats winet yjal'ty tu'uk ja kajpxwejpitøjk ja myigu'uk midi wyinaty tømädøy ku ja Jesús jam jade'en tminagyajpxyi ja saduceotøjkti, jøts kumi ja wyinaty tnijawi ku ja Jesús wyinaty øy tøm y'adsøy, winets ja tyiktiiy, yide'en ja tnimaay:

—¿Midi'ibi ja Dios ja kyutujk jawaani møj jøts nmimado'owint?

<sup>29</sup>Xjats ja Jesús y'adsøøy jøts ja wyaañ:

—Ja' Dios jawaani møj kyutujk'ajtpy midi wamp yide'en: “Israelit jaa'y, ukmadowdi meets, tu'ugyi ja Dios pøn adøm ndios'ajtindip. <sup>30</sup>Jøts tsokti ja jawaani ejxim niti jade'en xkatsokti, amumjoojt ja xwindsø'øgidit, ja' tu'ugyi mjotmay'attip, ja' tu'ugyi møk m'ajot'attip.” Yā'at idø'on øgyutujk'ajtp. <sup>31</sup>Jøts jap jadu'uk midi ñiñayjade'en møj, yide'en ja wya'añ: “Tsok mmigu'uktøjk, windsø'øgi mmigu'uktøjk, jade'en xtsokt jøts jade'en xwindsø'øgit sa

kø'øm mnachøkyi, jøts sa kø'øm mnawyindsø'øgiyi.” Ka'ap jadu'uk kutujk te midi jawaani møj sa ya'adindi.

<sup>32</sup>Xjats ja kajpxwejpitøjk wyaañ: —Windsøn, ka' me mgajpxigøy.

Tiy janch me mwa'añ jøts ku Dios ja tu'ugyi, ku ka'ap jadu'uk pøn.

<sup>33</sup>Janch me mwa'añ jøts ku Dios amumjoojt ndsojkint, jøts ku ja amumjoojt nwindso'jkint, jøts ku ja tu'ugyi møk n'ajot'ajttint, tyimdyiigyaajpxy jade'en ku nmigu'uk ndsojkint jade'en sa kø'øm nnachøjkyi'imp.

Ne'egi tyimy'øø yø jade'en ne'egi Dios chøjkpy, jøts ka'ap jadine'en yiktsøky ku jiyujk ku ja ti ndawindsø'ljki'int, ku ja ti ndamiyojxin jam altajrkøjxp.

<sup>34</sup>Xjats ku ja Jesús ojts t'ixy ja jaa'y ku ja Dios kyajpxy twinmadooji, ku ja yikxon øy tsuj y'adsoojiyøø, winets ja tnimaay:

—Tyimyjawaani kya'ity jøts mets ja Dios kyutujk xkupøjkit midi yjaa'y ja tyanitanaapy.

Jøts jade'en ka'ap pøn y'uknaya'a'ejxiniiyi jøts tyiktøø'adøøtst øy tyii'ji.

**¿Janch idø'on ku ja David  
t'ap'aty ja Cristo?**

<sup>35</sup>Jam ja Jesús wyinaty yik'ixpiky tsaptøjkjotp, jamts ja yide'en wyaañ:

—¿Sa dø'on ja kajpxwejpitøjk wya'andi? ¿Pønik idø'on tijy pøn ja Dios Teety ya pyiktaajk naxwiin jøts wyindsøn'att? ¿Nugo ja møj windsøn David y'ap ja tijy, kidi?

<sup>36</sup>Janch jade'en wya'andi, ka'ap idø'on ja kya'pxyi kumi kø'øm ja

David wyaañ ku Espíritu Santo ja ojts y'agajpxiyi, winets ja Dios kyajpxy ja ojts tjaajyi ma wyaañ yide'en:

Yide'en ja Dios Teety tnimaay ja nwindson'ajtim:

“Ixa'ak jøts ø xpudsøønit  
n'aga'n'ampy,  
jøts øts yø mmidsep  
nmimajadakøxt.”

<sup>37</sup> ¿Pøni yø' wyindsøn'ajtim, sudso yø ndejint nugo t'ap'att?

Jade'en ja Jesús wyaañ. Janch namay ja jaa'y jam wyinaty, jøts janch jotkujk ja jam wyinaty pyatmadøyi.

**Ku ja Jesús ttamigajpxy  
sa y'adø'øtsti ja jaa'y midi  
yik'ixpøjktip jam tsaptøjkjotp**

<sup>38</sup> Yide'en ja Jesús wyaañ ku ja jam wyinaty yik'ixpiky:

—Øyim mnay'ejx'etidit, ejxim meets kajpxwejpitøjkin, mnay'ejxniyidi pøn ja wyet yønjawwi tpajidøjttip ku yø'ødyi, pøn muum tuu'ajy nagyajxpoo'kxi ttsojktip windsø'øgi winjawi, <sup>39</sup> pøn ja øybi tsinaabyajt ttsojktip jap tsaptøjkjotpy, pøn ja tsinaabyajt twi'ejxtip ku kyaawya'andi, <sup>40</sup> jøts ja' ja ku'økyø'øxyøjk pyøjkidip ja myeeñ, jøts ja jaty tku'øø'ndi, ñadyijyi ja øy Dios'ajot'atti. Janch møk ja nøjkk tku'ayowidi ku jade'en y'adø'øtsti.

**Ku ja ku'økyø'øxy  
tpiktaajky ja lyimunsi**

<sup>41</sup> Tuk'ojk ja Jesús y'ixaajky jap møj tsaptøjkjotpy, jap ja wyinaty chøøni jap kajuun windujpy ma ja jaa'y ja myeeñ tpikta'akti

midi ja vojxtip, jap ja t'a'ejxuky ja jaa'y sa jaty jap pøn myeeñ wyinaty tpikta'akti, namay idø'øn ja'adi. <sup>42</sup> Winets yja'jty tu'uk ja ku'økyø'øxy pøn wyinaty janch ayoop, pøn wyinaty niti ka'ejtxip. Ja'ats pyujxmeeñ'unk majtsk tkugo'oniyii'ñ jap meeñ abøjk'i'i'ñjotpy, tuki'iyi dø'øn ja tpiktaajky midi ja wyinaty myøøt'ajtpy. <sup>43</sup> Winets ja Jesús tyaajxiyii'ñ ja pyabøjkpitøjk, jøts ja tnimaay:

—Janch meets idø'øn nnøjmi ku yø ku'økyø'øxy janch ne'egi jawi ndejint ja myeeñ tø tyøxy. Nipøn jaa'y ja myeeñ jade'en tø tkayøxy pøn jaty ja myeeñ tø tja'agonidi jap kajuunjotpy; <sup>44</sup> kumi ja myeeñ windank yø jap nugo tø tpikta'akti; jøts yø tø'øxyøjk øy idø'øn yø ayøy, ne'egi tø yø tpiktakixy ja ñidsinaajyik midi yø jam myøøt'ajtpy.

**Ku ja Jesús tnigajpxy jøts  
ku ja tsaptøjk yjett**

**13** Xjats ku ja Jesús pyidsiimy jam møj tsaptøjkjotp, winet ja pyabøjkpitøjk ja tu'uk ñimaajyøø: —iWindsøn, ejxik mets, ti tsaay yø jade'en jøts ti tøjkyø jade'en!

<sup>2</sup> Xjats ja Jesús y'adsøøy jøts ja wyaañ:

—¿M'ijxpy yø møj tøjkyø? Ni tu'ugin yø tsaay ja nøjkk kyatañ nikiibyety. Me'endip ja jaa'y jøts ja nøjkk tjaagøxtø tuki'iyi yø tøjkyø.

**Ja ejxa'an midi yik'exp ku wyinaty  
yiktiidyunwanidi ja naxwii'ñit jaa'y**

<sup>3</sup> Xjats ja jade'en ñøjkxtøø jam kojpkøjxp midi txøøw'ajtp Olivos,

ja kojpk midi jam wyinaty tsaptøjk awemp tamp. Jamts ja Jesús y'ixaajky, jøts pyabøjkpitøjk ja jam amaa'tsk yiktøøjiyøø, yide'en ja Pedro wyandøø møøt ja Jacobo, møøt ja Juan, jøts møøt ja Andrés:

<sup>4</sup>—Ja' øø ndsøjkpy jøts øøts xukmado'ot windem idø'on yø tsaptøjk jade'en yjatt. ¿Ti tiy'ajtin øøts jawyeen n'exp jøts ku dø'on ja jade'en wyinaty yjatwa'añ?

<sup>5</sup>Xjats ja Jesús y'adsøoy jøts ja wyaañ:

—Øyim mnay'eix'etidit, ejxim mee pøn mwin'øø'niyi. <sup>6</sup>Kumi may jaa'y nøjkx myendi jøts øts ja x'adunaxtit, jøts ja ñøø'mdit: “Cristo øts”, mayjaa'y ja jade'en wyindaay'attip.

<sup>7</sup>Jøts ku meets ja tsep øy ma xnimado'ot ku ja tsep wyingoni, kidi mdsø'øgidi kumi jatp idø'on ja jade'en, ka'ap ja ñaxt jøts ka'ap ja' tiidyu'unin xøøwi. <sup>8</sup>Kumi ja møj ja mutsk ja kajp nøjkx cheptundi xem yam, windsøndøjk ñañibidø'øgidit pøn jaty yikutujktip ya naxwiin; maawyeen ja uyx nøjkx ñaxy, me'emp ja yuu, may'ampy ja jaa'y nøjkx ja myigu'uk tmidsepøkti a'øy'ampy pøn ja nugo tyikma'a'ttip. Jøts ku dø'on ja jade'en yjatt tso'ondakpnim idø'on ja ayo'on wyinaty jade'en.

<sup>9</sup>Jøts øyim mnay'eix'etidit; kumi myikøyakp meets ma kudunktøjk yikutukti, jøts mee nøjkx myiktsiiky myikwøpy jap tsaptøjkjotpy. Mwinguwa'agip mee nøjkx ja møj windsøndøjk; øts meets jap xkunøjkxip jøts ja windsøndøjk myikmadya'agidit, xjats meets idø'on ja nja' xnigubojkit. <sup>10</sup>Namga'anin ja

tiidyu'unin xøøw tpaaty ku ja øgyajpxy ku ja ømyadya'aky øy magajp yikajpxwa'kxt. <sup>11</sup>Jøts ku jade'en ja kudunk øy madsoo myiktawinguwawidit, kidi xkumayidi xkudajidi sudso x'adsojimbettit. Jade'en idø'on mwa'andit pøni sa Espíritu Santo winet myik'ayukpaadyidi; kidi meedsip kø'øm mgajpxp, ja Espíritu Santo meets m'agajpxiyip. <sup>12</sup>May ja jaa'y ttukmiga'axwa'kxy ñagyøyakidit jøts y'ookit, may ja u'nkteety ja y'unaj'k nøjkx tmidsepøkti jøts ja tkøyaktit, nayide'en ja unaj'k nøjkx tmidsepøkti ja tyeety ja tyaak kunim o'jkin ja ttukpaattit kø'øm. <sup>13</sup>Jøts mdumidsep'attip meets ja jaa'y ja'agøjxp ku meets øts xjanchjawi; jøts pøni pøn ja ayo'on jade'en tmidanaapy kunim y'ookit, ja' idø'on nøjkx nitso'ok'ajtp.

<sup>14</sup>Jade'en ja Dios kyugajpxy Daniel tjaay tu'uk ja nøky ma ja ojts tngajpxy midi ja jaa'y tyikma'a'tp, jøts ku meets ja jade'en x'ext ku ja ma tø yikpikta'aky ma ja kyapaat'aty —pøni pøn ya'at nøkyajpxy, wan tja'gyuki—, jøts pøni pøn jam Judea tsinaadyip wan tkaknøjkxti jam kojpkjotp. <sup>15</sup>Jøts pøni jam wyinaty tø pyety tyøjkøjxp ja'abi xøøw, jøts ku ja wyinakt ka'ap ja yjaaktyimy'atstøkit jap tøjkjotpy jøts ja tjaakyikpidsø'ømt øy ti, ne'egi tø'øp ja' ku ja jadi'iñi yjaaka'akt; <sup>16</sup>jøts pøni pøn jam wyinaty kyamjotp, ka'ap ja y'ukwimbejtnit jam tyøjk windum jøts ja wyet ja tjaak'atswetst. <sup>17</sup>iTi yjanch'ayøoy ja tø'øxyøjk pøn

wyinaty jøtpyti, pøn jam wyinaty myutsku'nk tmøøt'ajttip ja'abi xøøw! <sup>18</sup>Ajot'att amidowdi ja Dios jøts kidi yja'aty ja tiempi winet et ku ja et wyinaty xyuxy, jøts kidi ja'abi xøøw mga'akti; <sup>19</sup>kumi ja dø'øn nøjcx ja møk ayo'on tyuñiyi midi ka'anim yik'ixy niujuuni wine'en ñaxy kujk ja tiempi jaayip ku Dios tyiktso'ondaajky yø naxwii'ñit, nika'ap nøjcx jadu'uk ja ayo'on jade'en yik'ixy sa ja'ajin midi idø'øn me'emp. <sup>20</sup>Jøts ku Dios Teety ja jeexyip tø tka'agajpxuky kon ja ayo'on, ti pøn xijy jade'en nitso'ok'atp; jøts ja'agøjxp Dios Teety ja tø tyikøñ ku ja ttsøky ja yjaa'y pøn ja tø twiwich.

<sup>21</sup>Pøni pøn mdukmadojidip, pøni pøn mnimaajyidip: "Ejxti, ixya dø'øn ja Cristo", uk ku myiknøjmidit "Ejxti, ixem ja Cristo tyani", kidi xmibøkti. <sup>22</sup>Ja' idø'øn nøjcx jade'en wandip pøn ñadyijyi jade'en sa Cristo sa ja Dios kyugajpxy, pøn ja miku' myøk'ajtin nøjcx tyiktuujnidip jøts ja nayide'en ttu'unt sa Diosin, yjawin'øø'mbaatwa'amp ja nøjcx pøn ø tø nwiwich. <sup>23</sup>Jøts nay'ejx'etidi meets, nayjøp'ejxidi jøts kidi mwindaay'atyidi ja miku'; patki'jyi meets yø yam ndukmadøy.

**Sa mye'ent ja naxwii'ñit  
jaa'y myøjkudanaabyi**

<sup>24</sup>Ku dø'øn ja tiempi ñaxt ma et ja ayo'on tyuniyat, winet ja xøøw y'lookt, winet ja po' y'lookt, jøts ja ka'ap y'uk'anidit, <sup>25</sup>ka'agøjxp yø maadsa' jam tsajpwemp, jøts naxp ja uyx jam tsajpwemp. <sup>26</sup>Xjats t'ejxtit ja naxwii'ñit jaa'y ja

myøjkudanaabyi ku ja kyutujk tmime'ent møk'ajtingøjxp yoots agujkp. <sup>27</sup>Winets øts ja n'ankilis ngajxwa'kxt, ja'ats øts ja njaa'y xwaamujkip pøn øts tø nwiwetsti øy madsoo, yikwaamuktup ja' øy ja wyinaty ma tyimyjatsøonidi.

<sup>28</sup>Uk patmadojidik øts ja n'ixpøjkin: Ku ja iigi kipy y'awaj y'u'nk'aty jøts ku ja kujk xyimumbøjkni, jade'en yiknijawi ja et jøts ku y'anda'akwani.

<sup>29</sup>Nayide'en idø'øn ja n'ukpiktaajkint sa ja ayo'on nøjcx ñaxy; jøts ku ja jade'en x'ejxtit, jade'ents meets ja xnijawidit jøts ku øts wyinaty nmenwani. <sup>30</sup>Janch meets idø'øn nnøjmi, jatp idø'øn ja jade'en namga'anim jaa'y wyinaty y'ookti. <sup>31</sup>Najxp yø naajx yø tsajp y'ity, jøts niwindem øts n'ayuujk kyanaxy.

<sup>32</sup>Ka'ap ja et ja xøøw yiknijawi pøni juuni dø'øn ja jade'en yjatt, nipøn ja tkanijawi, ni ankilis ja tkanijawi, jøts ni Dios U'nk ja tkanijawi. Ja Dios Teety ja tu'ugyi tnija'wip.

<sup>33</sup>Jøts nayjøp'ejxidi meets ejtp, ejtp ja Dios x'ajot'attit kumi ka'ap meets ja xnijawi pøni juuni øts wyinaty nwimbejtkojmit. <sup>34</sup>Jade'en idø'øn ja ndejint n'ukpiktaajkint ejxim ja jaa'y midi nøjcxp jagam widejtpi, jøts ku ja chøøñ y'uk'ane'empy ja tumbi ja', tu'uk jaty tyumbi ja t'uktunkmø'øy jøts y'ukpiktakpy tøjck adinaabyi ja tu'uk, pøn t'ejx'etp ja tøjck. <sup>35</sup>Jøts ejtp idø'øn mjøp'ejxtit, kumi ka'ap meets ja xnijawi pøni juuni yja'att ja mwindsøn midi kudøjk'ajtp, jotmøñ ja yja'aty ux, uk jotmøñ ja

yja'aty tsuu'm, jotmøñ ja yja'aty ku tsapni'aaw y'ayajxnidi, uk jotmøñ ja yja'aty jøpkyoos; <sup>36</sup>ka' ti nnija'win pøni juuni ja yja'att, kuts meets ja jotmøñ mmaagubaadiyit yam meets jap wyinaty mmaaly. <sup>37</sup>Midi mee ndukmadøøpy, niduki'iyi øts idø'on ja jaa'y jade'en nnøjmi jøts tjøp'ejx'ettit.

**Ku ja Jesús yikajpxy'aty  
jøts ja yikmatst**

**14** Ja majtsk xøow wyinaty kya'lity jøts ja paski xøow tpaatt ku ja jaa'y tkaydi ja tsapkaaky jadi'liñi midi ja levaduri tkamøøt'ajtp. Winet et idø'on ja teetywindsøn møøt ja kajpxwejpitøjk t'ixa'adi ja taay ja winmaa'ñ sudso ja tjadyimy'ukmatstit ja Jesús awin'øøni'ampy, jøts ja tyik'ooktit. <sup>2</sup>Xjats ja yide'en kø'øm ñawyajnidøø:

—Ka'ap ja jade'en y'ø'y'att ku ja nmajtsint xøjøøjty, tsojk ja jaa'y jade'en xem yam pyidø'øktit jøts adøm ja sagasa xu'unindit.

**Ku ja Jesús yiktagutajmji'iky  
ja pa'akxuu'kpi**

<sup>3</sup>Jam ja Jesús wyinaty ma ja kajp txøow'aty Betania, jam ja wyinaty tyøk'ayø'øpy Simón wyindum, ja jaa'y pøn wyinaty axøø'kpm putsp; jam ja Jesús wyinaty twindsøøni ja mesi ku tø'øxyøjk tu'uk tmija'jty ja poop tsaadu'jts midi wyinaty tmøøt'ajtp ja aceite midi janch pa'akxuu'kp, jøts midi janch tsowi to'jkip. Ja'ats ja tø'øxyøjk øjts tkupu'udu'uty, jøts ja Jesús kyubajk ja øjts ttanitajmiyi. <sup>4</sup>Winets

ja jaa'y y'ambøjktøø pøn jam wyinaty winaagindi, yide'en ja øjts ñawya'añidi:

—¿Tigøjxp ku yø pa'akxuu'kpi jade'en nugo tø wyindigø? <sup>5</sup>Tø yø jeexyip ne'egi yiktøøky tigøøk magø'pxy denarios, jøts ayoobi jaa'y ja jeexyip ja meñ yiktabudøki.

Jøts ja tjanchmyi'ambøjktøø ja tø'øxyøjk.

<sup>6</sup>Winets Jesús ja øjts ñii'mxyidi:

—Majtstu'utti; ¿ti yø

mdamigajpxtip? Øts yø jade'en tø x'ødyuñ. <sup>7</sup>Kumi ejtp meets ayoobi jaa'y xpaatt x'ext, jøts ødyundi meets ja' pøni juuni meets ja kø'øm xmay'atwa'añ; jøts kidi xjøp'ejxti jøts øts meets ejtp xpaatt x'ext. <sup>8</sup>Tø øts idø'on yø tø'øxyøjk jade'en xuñ pøni sa øts idø'on yø xamidsøkyin; tø øts ja pa'akxuu'kpi yø xanitemy kumi x'ookjøp'ejxnip øts idø'on ja', paty idø'on xyik'øø'yiñi xyikpaajitiñi kumi wingonip øts ja n'o'jkin. <sup>9</sup>Janch meets idø'on nnøjmi, ku øy maðsoo yikajpxwa'kxt ja øgyajpxy ja ømyadya'aky ya naðwiin, nayide'en yø øy maðsoo yiknimadya'akt ku øts yø tø'øxyøjk jade'en tø xmay'aty, yikja'myatsp yø øy juuni ku yiknimadya'akt.

**Ku ja Judas ñay'awajniyi  
jøts ja tkøyakt ja Jesús**

<sup>10</sup>Winets ja Judas Iscariote chøø'ñ pøn ja Jesús pyabøjkpitøjk wyinaty møøt ñimakmajtsk'aty, jøts ja øjts tninijkxy ja teetywindsøn, ja'ats ja møøt tkajpxy'ajty jøts ku ja tkøyakt ja Jesús. <sup>11</sup>Xjats ku ja jade'en tmadoodøø, winets ja jyanchxondaktøø, jøts ja Judas ja



meeñ jatyí yíktami'awa'aníyíí'ñ.  
Ja'agøjxpts ja Judas t'ixaay ja taay  
ja winmaa'ñ juuni et ja t'ukøyakt ja  
wyindsøn.

**Ku ja nwindson'ajtim yjaak'a'ux'ajtni  
møøt ja pyabøjkpitøjk**

<sup>12</sup>Xjats ku ja xøøw tpaajty midí  
ja israelít jaa'y yjanch'amaay'ajttip,  
ku chapkaaky ja jadi'iñi tkaydi  
midi levadurí tkamøøt'ajtp, ja'abi  
xøøw idø'on wyínaty tø tpaaty  
jøts ku ja xøøw midukxøøw tyuñi,  
ja' ja tyejtip paski, ja'abi xøøw  
idø'on ja tyukni'o'jkidip ja borreegi  
maxu'unk, paty ja pabøjkpitøjk  
winet et tyíktøødøø ja Jesús jøts ja  
tnímaadyøø:

—¿Ma øøts ja paski a'ux  
nyik'awext jøts ni'amuki  
n'a'ux'ajtidít?

<sup>13</sup>Xjats ja Jesús ja pyabøjkpitøjk  
namajtsk tkajxtsøø'ñ, yide'en ja  
t'uknimaay:

—Nøjkxti jam møj kajpjotp, jamts  
ínet jaa'y tu'uk x'ejxpaattít pøn jam  
wyínaty tsíy tyanígo'oníp, ja'ats  
mbanøjkxtíp, <sup>14</sup>jøts pøni ma ja  
yja'aty, japts ja kudøjk xnøjmidít:  
“Yide'en ja windsøn wya'añ: ¿Mak  
idø'on ja tøjkjoojt, mak idø'on  
ja pyabøjkpitøjk ja tmøøtka'aty  
tmøøt'uukt, mak idø'on paski a'ux  
ja tka'adyít?” <sup>15</sup>Winets meets ínet  
ja myíktuk'ext tu'uk ja tøjkjoojt  
jap nípat tøjkiixpy midí jap a'ejxi  
abaadi ejtníp; japts meets ja jii'kxy  
xyíkøyidít midí njøø'kxíndíp.

<sup>16</sup>Xjats ja pyabøjkpitøjk namajtsk  
ñøjkxtøø jøts ja ojts yja'atti jam  
møj kajpjotp, jamts ja jade'en  
tjanchpaattøø sa Jesús ja wyínaty  
tø tyukmadøyidí, jøts ja jam

tyíkøyidøø ja paski a'ux, winets ja  
wyímbejtøø ma choo'ndøø.

<sup>17</sup>Xjats ku ja et kyoodsiyíí'ñ,  
winets ja Jesús ja pyabøjkpitøjk  
nímakmajtsk jam tmøøtja'jty. <sup>18</sup>Jøts  
ku ja twínguwa'atsidøø ja kyaabyajt,  
kuts ja jam wyínaty kyaañidí,  
winets ja Jesús ja pyabøjkpitøjk  
tnímaay:

—Janch meets idø'on nnøjmi jøts  
ku ja íxyam nídu'ugin nmøøtkay  
pøn øts ínet amaa'tsk'ampy  
xkøyakp.

<sup>19</sup>Xjats ja pyabøjkpitøjk  
yjanchjotmay'oo'kpøjktøø, jøts ja  
nídu'uk jaty tyíktøødøø:

—¿Wan ja ndejínt y'øtsi?

Nayide'en jadu'uk wyamøø:

—¿Øts ndejínt jade'en adø'øtsp?

<sup>20</sup>Winets ja Jesús y'adsøøy jøts ja  
wyaañ:

—Tu'ugyi ja' pøn øts idø'on jade'en  
xu'ump, jøts ka'ap ja yjagami, íxya  
adøm idø'on ja nmøøt'a'ux'ajtíndí,  
nídu'ugin meets jade'en xunwa'añ.

<sup>21</sup>Jade'ents idø'on yjatt ja  
naxwíí'ñit jaa'y myøjkudanaabyí  
sam ja Dios kyajpxy wya'añín;  
jøts íti ja jaa'y yjanch'ayøøy pøn  
øts jade'en xkøyakp amaa'tsk! Tø  
ja jeexyip ne'legi tyíy ku jeexyip  
kyidyíngye'exy.

<sup>22</sup>Ku dø'on ja jade'en íxam  
wyínaty kyaydí, winets ja Jesús  
tníxajíyíí'ñ tu'uk ja tsapkaaky, jøts  
ja ttamøja'wíyíí'ñ ja Dios Teety,  
xjats ku ja t'adujkpajky, winets ja  
tmøøy ja pyabøjkpitøjk, yide'en ja  
wyaañ:

—Kaydí, ya'at øts idø'on ñamyayí  
nne'kx'ajtpy.

<sup>23</sup>Xjats ja nayide'en t'adam'ujch  
tu'uk ja uujk'íí'ñ, jøts ku

ttamøja'wiyii'n ja Dios Teety, winets ja ttuk'uk'abidsiimy ja pyabøjkpitøjk midi ja wyinaty tø t'adami jap uujk'i'i'njotpy, niduki'iyi ja t'uktamujktøø. <sup>24</sup>Yide'en Jesús ja ojts ñii'mxyidi:

—Yø øts idø'on ñamyayi nni'jpy'ajtpy midi widsu'ump widaxp øts nnikøjxp øts ngubajkp ku nyikpikta'akt jam kruskøjxp. Ja'ats may jaa'y y'ajot'attip jøts ja ñitso'ok'attit. Jade'en'ampy idø'on ja Dios Teety tyik'adukwa'añ ja wyanda'aky sam idø'on ja ttami'awa'anii'n ja nitso'ok'ajtin. <sup>25</sup>Janch meets idø'on nnøjmi, jøts ku ka'ap n'uk'uknit yø vino, jaanim øts yø nøjx n'uuky jadigojk ku Dios kyutujk yja'att, ku kyutujk ja ttanitanit ja yjaa'y.

**Ku ja Jesús kø'øm tnigajpxy  
jøts ku Pedro ja kyu'øøniyit**

<sup>26</sup>Xjats ku ja t'øøgøjxtøø ja Dios kyajpxy, winets ja ñøjkxtøø jam kojpkøjxp midi txøw'ajtp Olivos. <sup>27</sup>Jøts ja Jesús pyabøjkpitøjk tnimaay: —Niduki'iyi meets inet xatsø'odyu'unt icyamgoots; kumi yide'en Dios kyajpxy wya'añ: “Yikøyakp ja borreegi ejxpi jøts ja y'ookt, jøts ja borreegi jadi'iñi kyaakwa'kxnidit.” <sup>28</sup>Jøts ku ø nbidsø'ømt jadigojk jap oo'kpi jutjotpy, winets ø nnøjkxjawyenit jam Galilea, jamts mee xpaatt.

<sup>29</sup>Xjats ja Pedro tnimaay ja Jesús: —Øy mets mbabøjkpitøjk niduki'iyi mjadatsø'odyuñiyi, niujuuni me ngadatsø'odyuñ.

<sup>30</sup>Winets Jesús ja ñimaajyøø: —Janch mets idø'on nnøjmi jøts ku yamgoots inet mnø'ømt ku me

ka'ap x'ijxy'aty, ka'aním tsapni'aaw wyinaty myajtsk'aya'axy ku mets inet tigøøk ojk mwa'ant jade'en jøts ku me ka'ap xnijawi.

<sup>31</sup>Xjats ja Pedro møk'ampy tyimwyindani ja Jesús, yide'en ja tnimaay:

—Nja'øøky me møøt, niujuuni øts jade'en ngawa'ant.

Tum jade'en ja yjadu'ukpi pabøjkpitøjk wyandøø sam ja Pedro wyaañ.

**Ku ja Jesús t'ajot'ajty ja Dios  
Teety jam Getsemaní**

<sup>32</sup>Xjats ja yja'ttøø ma ja et txøw'aty Getsemaní, jamts ja Jesús pyabøjkpitøjk tnimaay: —Ya tsøøniidi, wan ø t'ats'ajot'aty ja Dios Teety.

<sup>33</sup>Winets ja t'ukwaay ja Pedro, ja Jacobo, jøts ja Juan, jøts ja ojts tmøøtnijkxy, xjats ja Jesús yjantyimchø'jkiyii'n, ka'ap ja y'ukwinmaa'nbyatni, ja'agøjxp ku ja y'ayo'on wyingøñ. <sup>34</sup>Jøts pyabøjkpitøjk ja tnimaay: —Janch tyimyjotmay'oo'kp øts, øy øts yø yjawi jadi'iñi ngu'oogit. Awejxti ya ejxim mma'oo'knidi, wijy m'ettit.

<sup>35</sup>Xjats ja Jesús jawaani yjaaknajtsyø'øiyii'n, japts ja ojts ñagyuxendya'agiyi, jøts Dios Teety ja ojts t'amidøy jøts ja jade'en kidi tyimy'ayo'ombaaty sa dø'on ja wyinaty yjatwa'añ ja'abi xøøw. <sup>36</sup>Yide'en ja wyaañ ku dø'on ja ojts dios'ajot'aty:

—Mets Teety, øyik jade'en xjanchkayikjatt, jøts øts kidi jadine'en ayo'on ndyimbaaty; øy idø'on kyidyimyjade'eni sam ø

ndyimyjatsøkyin, jade'en øts idø'øn ngupøkt pøni sa me xamidsøky.

<sup>37</sup>Ku ja jade'en wyaañ, xjats pyabøjkpitøjk ja tniimiñ, maadip ja jap wyinaty ku ja ojts tpaaty; winets ja tniimaay ja Pedro:

—Simón, ¿tø me ma'oo'kni? ¿Niwine'en me waani tø mgawijy'ity?

<sup>38</sup>Wejti kajti jøts ja Dios x'ajot'attit, nay'ejx'etidi jøts kidi mmimajada'agidi ja ayo'on midi wingomp. Janch øts idø'øn nwa'añ ku ja winmaa'ñ janchja'ødyunwa'añ, ja ne'kxts jaayi ja ka'øybi tumbi amutsk'ejxiyip.

<sup>39</sup>Xjats ja ñøjkxkojmøø Dios Teety ajot'ajtpi, nayide'en ja ojts wyangojmi sa ja wyinaty jawyeen tø wya'añ. <sup>40</sup>Winets ja myengojmøø ma pyabøjkpitøjk ja jam, maagojmidip ja wyinaty ku ja tpaajty, kumi janchmaa'y'oo'ktip ja'.

<sup>41</sup>Jøts ku ja tigøøk ojk ojts t'ixy ja pyabøjkpitøjk, jaanimts ja tniimaay: —Tøts inet, maanidi poo'kxnidi.

Wan jade'en tjaty, tø dø'øn tyimbyaaty jøts yikøyakt ja naxwii'ñit jaa'y myøjkudanaabyi.

<sup>42</sup>Pidø'økti, niwejti, wan tjaa'myindi; ixa ja ixyam wyingøñ pøn øts inet xkøyakp.

### Ku ja Jesús yikmajch

<sup>43</sup>Nay jamnim ja Jesús wyinaty jade'en wya'añ ku ja Judas yja'ljty, pøn ja pyabøjkpitøjk wyinaty møøt ñimakmajtsk'atti, ja'ats ja mayjaa'y jam tmøøtja'jt tsujx møøt jøts kipkyapidi. Ja teetywindsøn idø'øn ja wyinaty tø kyexyidi, møøt ja kajpxwejpitøjk, jøts møøt ja møjaa'dyøjkti. <sup>44</sup>Yide'en idø'øn

ja Judas wyinaty tø wya'añ jøts ja tu'uk tpikta'akt ja ejxa'anin midi ja y'ejxtip ku ja tkøyakt ja Jesús, yide'en ja wyinaty tø wya'añ:

—Pøni pøn øts inet ndsu'kxpy, ja' idø'øn ja wyinaty; ja'ats idø'øn mmatstip, jøts ja xyiknøjkxtit ta'tspiky'ampy.

<sup>45</sup>Xjats ku dø'øn ja jam jade'en yja'ljty, winets ja twinguwa'ljkijiyi'ñ ja Jesús, yide'en ja tniimaay:

—Øts, windsøn, memp.

Jøts ja ojts jade'en ttsu'kxy.

<sup>46</sup>Xjats ja Jesús yiknixajiyi'ñ, jøts ja jade'en yikmajch.

<sup>47</sup>Jøts ja jaa'y pøn ja Jesús jam wyinaty myøøt'ajtpy, ja' tsujx tu'uk tnixajiyi'ñ jøts ja ttaxikja'tstuupty ja teetywindsøn tyumbi, ojts ja tyatsk ja tyikwinajki. <sup>48</sup>Winets ja Jesús tniimaay ja jaa'y pøn ja wyinaty tø myachi.

—¿Ti mee x'ejxni ku xanimenidi ja kipy jøts ja tsujx? ¿Ti mee x'ejxni, maa'tspi, ku meets jade'en xmatswa'añ? <sup>49</sup>Jabom jabom meets jam y'ijty nyik'ixpiky tsaptøjkjotp, ¿ti kuts meets jam xkamajch? Paty idø'øn ya'at ixyam jade'en yjaty kumi Dios kyajpxy jade'en wamp, ¿sudso'ampy idø'øn ja kyatøøt?

<sup>50</sup>Winets ja pyabøjkpitøjk tmajstuttøø nadyu'uk ja wyindsøn Jesús, jøts ja ojts jadi'iñi y'agakpajknidi.

**Ja una'jk jaa'y pøn jadi'iñi kaktigøøy**

<sup>51</sup>Jamts ja Jesús wyinaty pyayø'øyi tu'uk ja una'jk jaa'y pøn ja poop wet wyinaty tyukwop'ajtp, ja'ats ja yikmach; <sup>52</sup>winets ja wyet ja tmajstuupty, jøts ja jadi'iñi niwa'ats kyejky.

**Ku ja Jesús yikwaanijkxy  
jam kutujktaajkjotp**

<sup>53</sup>Xjats ja Jesús

yiknajtswa'awiyii'n jam møj  
windsøn wyindum pøn ja teety  
wyindsøn'ajtip, jam idø'øn ja  
windsøndøjk ñamyujkøjxidøø møøt  
ja møjaa'dyøjkti. <sup>54</sup>Jagam idø'øn  
ja Pedro tpayø'øy ja wyindsøn  
ku ja yiknajtswa'awiyii'n jam  
windsøn kyutujktaajk agø'øm,  
jade'en ja tpaja'jty, jamts ja Pedro  
tmøøt'ixaajky ja tajk, ja' ja jam  
myøøtjo'kxpjiky ma ja jøøn jam  
wyinaty tø myøji.

<sup>55</sup>Jøts ja teetywindsøndøjk møøt  
tuki'iyi ja kutujk adsinaabyidi  
t'ixaadyøø tu'uk ja pøky, jade'en  
ja t'ixaadyøø ja pøky jøts ja  
tuku'oogiywa'andi ja Jesús; xjats ja  
niti tkapattøø. <sup>56</sup>Kumi øy ja tigati  
ttaniwambatti jøts ja jade'en xem  
yam kyanabyaadyidi ja y'ayuujk.  
<sup>57</sup>Winaagin pyidø'økti møk'ampy  
jøts ja nugo tni'øønidi øy ja  
yjagajade'eni, yide'en winaagin  
wyandøø:

<sup>58</sup>—Tø øøts yø nmadøy ku yø  
yide'en wya'añ: “Nyikida'ap  
øts yø tsaptøjki midi yø jaa'y tø  
tyik'øyidi, jøts øts kyidigøøk xøøw  
jadu'uk nyikwa'kukit midi ja jaa'y  
kyayik'øyip.”

<sup>59</sup>Jøts ni jade'embaat ja kø'øm  
kyanagyupikyidi ku ja øy sa  
yjawa'andi.

<sup>60</sup>Winets ja teetywindsøn  
tyanaagyukiyii'n jam mayjaa'yjotp,  
jøts ja tyiktiy ja Jesús, yide'en ja  
tnimaay:

—¿Ka' idø'øn m'adsø'y? ¿Ti dø'øn  
jade'en myiktani'øø'nip?

<sup>61</sup>Xjats ja Jesús amøñi  
tyik'ity, jeky ja niwine'enin  
kyidyimy'adsøøy. Winets ja  
teetywindsøn ja ojts jadigojk  
tyiibyikyiyi, yide'en ja ojts  
ñii'mxyiyi:

—¿Mets idø'øn ja' pøn Dios Teety  
pyiktaajky jøts mets mwindsøn'att?  
¿Mets idø'øn ja Dios Teety  
m'U'nk'ajtip?

<sup>62</sup>Xjats ja Jesús y'adsøøy jøts ja  
wyaañ:

—Øts idø'øn ja'. Øts  
idø'øn ja naxwii'ñit jaa'y  
nmøjkudanaabyi'ajtpy, jøts x'ejxtip  
meets ku n'ixa'aakt aga'n'ampy  
ma Dios Teety, jøts ku nayide'en  
ø nme'ent yoots agujkpy jap  
tsajpjøtpy.

<sup>63</sup>Winets ja teetywindsøn ja  
wyet kø'øm ttakø'ljtsiyii'n ku ja  
y'oj'abajtyii'n, ja' idø'øn tyijpy ku  
tø ja jaabaat y'oj'amø'øty, xjats ja  
wyaañ:

—¿Ti ejxpi ti ni ja'wibi  
jaaktsojkiyip? <sup>64</sup>Tøxi xmadowdi  
sa tø wya'añ ku ja Dios Teety yø tø  
twingajpxnaxy; ¿sa dø'øn xjawidi  
ku jade'en wya'añ?

Winets ja niduki'iyi ttanikajpxtøø  
ja o'jkin.

<sup>65</sup>Jøts winaagin jatyi tniidsujidøø,  
jatyi twinmajtstøø jøts ja ttsee'ktøø,  
yide'en ja wyan'adø'øtsti ku ja  
jade'en ttundi:

—iNajtsjawi pøn tø mgøxyi!

Jøts ja tajk ja twingoxti tjøpkoxti  
awa'an'ampy.

**Ku ja Pedro tku'iiñ jøts ku  
ja ka' t'ijxy'aty ja Jesús**

<sup>66</sup>Jap ja Pedro wyinaty tøk'agi'py  
ku yja'jty tu'uk ja tø'øxyøjk pøn

ja teetywindsøn tyumbi'ajtpy;  
<sup>67</sup>ja'ats ja ojts y'ijxyiyi ku ja jap  
 wyinaty jøn'ajpy yjo'kxpiky, tøyim  
 ja wyinaty wyin'ejxniyi xjats ja  
 yide'en ñimaajyøø:

—Nayide'en mets y'ijty xpawidity  
 ja Jesús ja Nazaretit jaa'y, ðkidi?

<sup>68</sup>Xjats ja Pedro ja ka'ap tñigajpxy,  
 yide'en ja wya'añ:

—Ka'ap øts ja n'ijxy'aty pø pøn ja',  
 jøts nguidyimñija'wip øts pø ti me  
 mgajpxy.

Xjats ja jade'en yø'øpyidsiimy jam  
 tajyjøp'am. Winets ja tsapni'aaw  
 y'ayajxi'jky. <sup>69</sup>Jøts ja tø'øxyøjk ojts  
 twin'ixy jadigojk ja Pedro, xjats ja  
 ttukmadoobinaxwa'jky ja jaa'y pøn  
 jam wyinaty, yide'en ja wya'añ:

—Ya'at jaa'y tmøøtwidejtp yø  
 Jesús.

<sup>70</sup>Winets ja Pedro ja ka'ap  
 tkupijky jadigojk. Waani y'ijty, xjats  
 Pedro ja jaa'y ñimaajyøø jadigojk  
 pøn jam wyinaty:

—Mets inet mdyimyøøtwidijtp yø  
 Jesús; kumi Galile'it jaa'y mets, jøts  
 jade'en me mgajpxy sa yø kyajpxti.

<sup>71</sup>Winets ja Pedro kø'øm  
 kyanay'ømygajpxiyøø møk'ampy ja  
 jaa'y yide'en:

—Tyimy'ijxpy ja Dios jøts ku  
 nguidyimñijawi pøni pøn jaa'y  
 meets jade'en mdijpy.

<sup>72</sup>Xjats ja tsapni'aaw  
 myajtsk'ayajxy. Winets ja Pedro  
 tja'myejch ja Jesús y'ayuujk  
 sa ja wyinaty tø ñii'mxyi:

“Ka'anim wyinaty ja tsapni'aaw  
 myajtsk'aya'axy ku mets inet  
 wyinaty tigøøk ojk tø mwani ku me  
 xka'ijxy'aty.” Jøts ja tkuyajxyii'ñ  
 ku ja jade'en tja'myejch jøts ku ja  
 wyinaty jade'en nichøky tø wya'añ.

### Ku ja Jesús twinguwa'jkiyii'ñ ja Pilato

**15** Xjats ku xyii'ndyaaky,  
 winets ja teetywindsøn  
 ñamyujkidøø møøt ja møjaa'dyøjkti,  
 møøt ja kajpxwejpitøjkti, tuki'iyi  
 wine'en ja t'adsøonidi ja kutujk jam  
 tsaptøjkjotp. Jøts ja ojts tyiknøjkxti  
 ja Jesús køwii'ñ jam Pilato  
 wyindum, jamts ja tkøyakti. <sup>2</sup>Xjats  
 ja Pilato tñimaay ja Jesús:

—ðJanch mets idø'on windsøn'ajtp  
 ya israelit jaa'y y'etjøøjty?

Winets ja Jesús y'adsøoy jøts ja  
 wya'añ:

—Øts ja'.

<sup>3</sup>Xjats ja teetywindsøn janch  
 may ja øø'nin tpiktaktøø, yikxon  
 ja Jesús yikni'øø'niyiii'ñ. <sup>4</sup>Winets ja  
 Pilato tyiktiy jadigojk, yide'en ja  
 tñimaay ja Jesús:

—ðKa'ap idø'on m'adsøy? iEjx!  
 Yikxon mjanchyikni'øøni. iEjx! Ja  
 pøky kawinakjøøjp myiktani'øøni.

<sup>5</sup>Jøts kyidyimy'adsoop ja Jesús  
 ku Pilato ja jade'en ñii'mxyi; jøts  
 ñigyumaap idø'on ja Pilato ja kø'øm  
 tjawi ku ja jade'en kyidyimy'adsøy.

### Ku ja nwindson'ajtim Jesús ñidujkiyii'ñ jøts ja y'oockt

<sup>6</sup>Yide'en idø'on ja Pilato  
 wyinaty ja kostumbri tmøøt'aty  
 ku ja paski xøøw tpaaty, winets ja  
 tyik'awa'atspidsimy nidu'ugin ja  
 tsumyjaa'y, pøni pøn ja mayjaa'y  
 yik'awa'atspidsømwandip. <sup>7</sup>Jamts  
 wyinaty tu'uk ja pøkyjaa'y  
 tsumy pøn txøøw'ajtp Barrabás,  
 ja' ja jap møøt chum'lity pøn ja  
 wyinaty møøt tø yikjaa'y'øøky  
 ku tsep ja wyinaty tø ttundi

møøt ja kudunktøjk. <sup>8</sup>Xjats ja mayjaa'y jam jade'en myendøø, jøts ja t'amidoobinaxwa'aktøø ja Pilato jøts tsumyjaa'y ja tyik'awa'atspidsø'ømt nidu'ugin sa kyostumbri ja wyinaty tmøøt'aty. <sup>9</sup>Winets ja Pilato y'adsøø y jøts ja tnimaay:

—¿Sa mee m'ukwa'añ, wan yø israelit windsøn tyikmajtstu'uty?

<sup>10</sup>Jade'en ja wyaañ kumi tø dø'øn ja wyinaty tja'gyuki jøts ku ja teetywindsøn wyinaty nugo tø tkøyakti ja Jesús tanejkingøjxp.

<sup>11</sup>Xjats ja teetywindsøn tkajpxwejkøjxtøø ja mayjaa'y. Ojts ja t'agajpxidi, jøts ja wya'andit jøts wan ja Barrabás t'awa'atspidsimy jøts ka'ap ja Jesús. <sup>12</sup>Xjats ja Pilato tyiktiiy ja mayjaa'y, yide'en ja tnimaay:

—¿Jøtsimts yø israelit windsøn, sa yø yiktu'unt?

<sup>13</sup>Winets ja y'adsoodøø jøts ja wyandøø møkta'a'ky:

—iYikruspat!

<sup>14</sup>Xjats ja Pilato tnimaay ja mayjaa'y:

—¿Ti tundigøø'yin yø tø ttuñ, ti yø kyubatp?

Winets ja tjaaktyimyikjinajxtøø, møk'ampy ja yjaaktyimwyandøø:

—iYikruspat!

<sup>15</sup>Jøts kumi yikjotkukiwyampy ja Pilato wyinaty ja mayjaa'y, xjats ja tyik'awa'atspidsiimy ja Barrabás; jøts ku ja t'uknankwoyjpøø ja Jesús, winet ja ojts tkøyaky jøts ja kyiruspatt.

<sup>16</sup>Xjats ja soldaditøjk tyiknøjkxtøø ja Jesús jap kutujktaajk'agui'py ma ja ttejtí Pretorio, ma ja masyoldadi jap wyinaty

chøønidi, japts ja myisoldadi ja twaamukøxti. <sup>17</sup>Winets ja tsuu'nk wet ja ttuktatøjkidøø ja Jesús midi ja windsøndøjk nugo myiwindsøn'ajttip, jøts ja kujp awiity ttukoroni'atti. <sup>18</sup>Jøts ku ja jade'en t'uktundøø, winets ja wyambinaxwa'ktøø møk'ampy, yide'en ja tkajpxpoo'kxtøø:

—iMay xøøwim may jumøjtim mdsøønit mdanit mets israelit jaa'y wyindsøn!

<sup>19</sup>Jøts ja kipy ja ttaxikwojppø'ktøø, ojts ja tnidsujidi jøts ja ñadyijyi twinguxanidi, ñadyijyi ja twindsø'øgidi. <sup>20</sup>Xjats ku dø'øn ja jade'en t'uktaxe'ktøø, winets ja tsuu'nk wet ja ojts t'ajniidi jøts ja ttuktatøjkidøø ja wyet midi ja wyinaty wyet'ajtpy. Xjats ja jatyi twaabidsømdøø jøts ja kyiruspatt.

### Ku ja nwindsøn'ajtim

#### Jesús kyiruspejty

<sup>21</sup>Xjats ku ja Cirenit jaa'y jam wyinaty ñaxy pøn txøøw'ajtp Simón, kyamjotp ja wyinaty chøøñ; ja'ats ojts yiktaguwani jøts Jesús kyirus ja t'padsøjmit, ja' idø'øn jade'en jajtp pøn ja Alejandro møøt ja Rufo tyety'ajttip.

<sup>22</sup>Xjats ja mayjaa'y tyiknøjkxtøø ja Jesús jam Gólgota, ma ja et jade'en txøøw'aty midi jade'en tyijpy ayuujk Oo'kpi Kyubajk Pajk. <sup>23</sup>Jamts ja tmøødyøø ja vino midi wyinaty tø yik'adamuky møøt ja tsøøy midi yiktejp mirra, ja' ja ojts tmo'odi ja Jesús, jøts ja ka'ap tkupijky, ka'ap ja t'uujky. <sup>24</sup>Winets ja tyikruspajttøø; jøts ja soldaditøjk tyikwa'kxtøø ja Jesús wyet, ojts ja tniguyatti, jøts pøni pøn majadap ja'ats ja wet twejtstøø.

<sup>25</sup> Jaa dø'øn ja xøøwu'nk wyinaty waani pyety ku dø'øn ja jade'en tyikruspajttøø. <sup>26</sup> Jøts letri ja jam tkøxjaadyi; yide'en ja tyikwa'andi: "Israelit jaa'y ya'at ja wyindsøn." Ja' dø'øn ja ojts ttagubatti kidi tii'jip. <sup>27</sup> Namajtsk ja maa'tspi ja tyikruspajttøø nay jam møøt ja Jesús, tu'uk aga'n'ampy jøts tu'uk anajy'ampy. <sup>28</sup> Janch jajt idø'øn ja jade'en sa jap nøkyjxpy wya'añ, ku yide'en wya'añ: "Møøt ja yiktamimacho'owiyii'n ja møj ka'øy jaa'y."

<sup>29</sup> Xjats ku dø'øn ja jaa'y jam ñaxti kruswemp, ka'ap ja tjanch'ømyigajpxti, wyibejptip ja kyubajk ja jam, jøts ja tnøjmidi:

—iJøj! Metsxi xijy tsaptøjky myikidaapy, jøts mets ja xijy jatyi kyidigøøk xøøw xyiktanaagyukigyojmi,

<sup>30</sup> ñankñitso'ok'atits me kø'øm jøts mwinaakt jam kruskøjxp.

<sup>31</sup> Jade'en ja jaa'y wya'andi, nayide'en ja teetywindsøn wyamidi møøt ja kajpxwejpitøjkti, yide'en ja kø'ømyi ñawya'añidi:

—May abiky jaa'y tø tyiknitso'ok'aty, jøts ka'ap kø'øm tjaty sudso ñankñitso'ok'atitit.

<sup>32</sup> Pøni ku net njanch'ejxint yø Israelit jaa'y wyindsøn wyinaakt jam kruswemp, winet inet njanchja'win jøts ku yø yjanchja'aji ja Cristo.

Ja jaa'ybaat ja kya'ømyigajpxøø pøn ja jam wyinaty møøt tø yjakruspety.

**Ku ja nwindson'ajtim Jesús y'ø'jky**

<sup>33</sup> Xjats ku kyujkxøøw'ajty, winets kyoodsiyii'n ja ñaxwii'ñit, jaanim ojts yjajta'aky møj winakxyøøw.

<sup>34</sup> Jøts ja Jesús møk'ampy wyaañ:

—Eloi, Eloi, ðlama sabactani? —  
midi tyijpy: Dios Teety, Dios Teety,  
ðjadits ku ø tø xnanktyuñi?

<sup>35</sup> Winaagin ja jaa'y jade'en tmadoodøø pøn jam wyinaty jøts ja wyandøø:

—Madowdi, ja Elías yø wyaadsøøpy.

<sup>36</sup> Xjats tu'uk myiiñ janch pujtpim pøn tnixajyiii'n ja tanøxe'ljts midi jade'en t'ejxp ejxim ja xa'akjoptsin, ja'ats ja ojts tyikxøøky jap vino ta'amjotpy jøts ja tpiktaajky jam kipy jøp'am, winets ja jade'en tta'adejyiii'n ja Jesús jøts ja ttukwimuukwa'añ, yide'en ja wya'añ:

—Majtstu'utti; wan tu'uk'ijxyim pøni janch'ukyikwinajkip inet idø'øn ja Elías jam kruskøjxp ku inet ja mye'ent.

<sup>37</sup> Winets ja Jesús møk'ampy yaajxy, jøtsnim ja y'ø'jky. <sup>38</sup> Jøts nay jatyi ja wet kujkwa'kxy y'akø'øtspajky midi ja tsaptøjky jam wyinaty y'awejtstuk'ajtpy, kubajk'ampy ja kyø'øtstøjkiyiii'n jøts ja kyø'øtskidaajky ok'am'ampy.

<sup>39</sup> Jøts ku ja soldadi windsøn jade'en ojts t'ixy pøn ja Jesús jam wyinaty twindanaapy, winets ja wyaañ ku ja Jesús wyinaty jade'en møk'ampy tø ya'axy, jøts ku ja wyinaty tø y'øøky, yide'en ja wyaañ:

—Janch tiy tam idø'øn Dios tam ya'at y'ity y'U'nk.

<sup>40</sup> Jam ja tø'øxyøjky wyinaty tyanaamyidi pøn jam jagam a'ejxujktip; ja Salomé, jøts ja María Magdalena jam wyinaty møøt jadu'uk ja María midi ja Jacobo tyaak'ajttip møøt ja José.

<sup>41</sup> Ja tø'øxyøjky idø'øn wyinaty

tø tpawidetti ja Jesús, jøts ja' ja wyinaty tø t'ejx'etti ku ja Jesús jam Galilea wyidijty. Jøts jam ja t'øxyøjk wyinaty y'a'ejxujkmidi pøn ja Jesús jam wyinaty tø pyanijkxyi Jerusalén, møøt ja jam wyinaty tø yja'atti.

**Ku ja nwindson'ajtim Jesús ñe'kx yikpiktaajky jap oo'kpi tsaa jutjøtpy**

<sup>42</sup>Xjats ku chuu'wiyii'ñ ku ja poo'kxin xøøw wyinaty kyimjabom tpaatwani, <sup>43</sup>winet ja José myiñ, ja Arimate'it jaa'y pøn wyinaty ja kutujk t'adsinaadyip. Ja'ats idø'øn tjøp'ejxp jøts ja ttatøkiwya'añ ja Dios kyutujk midi ja yjaa'y ja tyanitanaapy, jøts ja ojts amumjoojt myiñ ma dø'øn ja Pilato jam wyinaty, jøts ja t'amidooji ja Jesús ñe'kx ku ja wyinaty tø y'øøky. <sup>44</sup>Xjats ja Pilato ñigyumaap yjajty ku dø'øn ja wyinaty tø y'oo'kni, winets ja tyaajxyii'ñ ja soldadi windsøn jøts ja tyiktiiy pøni janch ku dø'øn ja wyinaty tø y'øøky. <sup>45</sup>Xjats ku ja soldadi windsøn ja ojts tnigajpxy jøts ku ja janch jade'en, winets ja Pilato tkøyajky ja oo'kpi jøts José ja yikmøøy. <sup>46</sup>Xjats ja tjuuy tu'uk ja poop wet midi øy midi majpxy, jøts ku ja tyikwinajky ja oo'kpi, ja'ats ja tya'amojts, jøts ja tpiktaajky jutjøtpy midi ja wyinaty tø tyikjuty jam tsaaotp. Jøts ku dø'øn ja jade'en tpiktaajky, winets ja møj tsaa ja tta'agiyy. <sup>47</sup>Ojts idø'øn ja María Magadaleña møøt jadu'uk ja María, pøn ja José tyaak'ajtpy, t'ejxtøø ma ja Jesús wyinaty tø yikpikta'aky.

**Ku ja nwindson'ajtim Jesús yjukpyjky jadigojk**

**16** Xjats ku ja poo'kxin xøøw ñajxy, winet ja

María Magdalena t'atsjuudyøø ja pa'akxuu'kpi møøt Jacobo tyaak, møøt ja Salomé, jade'en ja ojts t'atsjuudyi jøts Jesús ja t'atspikta'akwajniidi ku ja wyinaty tø y'oo'kni. <sup>2</sup>Xjats ja ojts ttaninøjkxti jøpyi ku ja samaan wyinaty tø y'abety, xøbidsimyu'nk ja yja'ttøø jam møj tsaa agujkp ma ja Jesús jam wyinaty tø yikpikta'aky. <sup>3</sup>Yide'en ja kø'øm ñawyajnidøø:

—¿Pøn inet ja tsaa

tjanch'agiidyu'ut jøts ndøjki'int?

<sup>4</sup>Xjats ku ja yja'ttøø, winets ja t'ejxtøø ku ja møj tsaa ka'ap ja jap wyinaty ukteeni jap jut'agui'py, tø ja wyinaty yikiiyø'ñi. <sup>5</sup>Jøts ku ja tyøjkidøø jap mutsk tøjkjøtpy, winets ja t'ejxpattøø tu'uk ja ankilis midi ja wyinaty pya'ajpy tsinaapy, jøts midi wyinaty nayide'en ja poop wet myøøt'ajtpy. Xjats ku ja t'ejxpattøø waajtyøjk ja tity, jøts ja ojts jantyimchø'jkidi. <sup>6</sup>Jøts ja ankilis ja ojts ñii'mxyidi:

—Kidi mdsø'øgidi; nñija'wip

øts ku meets ja Jesús ja ñe'kx x'ixaajiyidi. Tø ja jadigojk yjukpyiky, øy xtyimy'ejxtit ma ja yikpiktaajky. <sup>7</sup>Nøjx ja pyabøjkpitøjk xukmadojidi møøt ja Pedro, jøts ñøjkxtit jam Galilea; jamts meets ja x'ejxtit jadigojk, jamts meets ja xminabyaadiyit jade'en sa ja kø'øm mnimaajyidøø.

<sup>8</sup>Xjats ja choo'ndøø jam møj tsaa agujkp ma Jesús ja wyinaty tø yikpikta'aky, jøts ja ñøjkxtøø. Jadi'iñi tsø'øgi ja yjantyyikmibejnnyidi jøts nipøn ja sa tkanøjmidi, kumi jantyimchø'jkidip ja wyinaty.



**Ku ja Jesús ñanky'ejxøø jadigojk ma ja María Magdalena jam wyinaty**

<sup>9</sup>Ku ja Jesús domingi jøpy wyinaty tø pyidsimy jadigojk jap oo'kpi jutjøtpy, ja María Magdalena ja ojts jawyeen y'ijxyiyi, pøn ja wyinaty tø tyikpidsøjmi niwixujk ja miku'. <sup>10</sup>Ja'ats ojts ñijkxy jøts ja ojts t'atstukmadøp pøn jaty ja Jesús wyinaty tø tmøotwidetti, pøn jam wyinaty jiidyip yaxtip, maadyip tajtip. <sup>11</sup>Jøts ku ja jade'en tñimadoodøø ku ja Jesús yujky'aty, ku ja tø'øxyøjk ja wyinaty tø t'ixy, ka'ap ja tjanchja'widøø.

**Ku ja Jesús ñanky'ejxøø jadigojk ma wyinaty ja namajtsk pyabøjkpitøjk**

<sup>12</sup>Xjats ku dø'øn ja jade'en y'luknajxy, winets ja Jesús ñanky'ejxkojmüyøø abiky tsoo ku wyinaty ja pyabøjkpitøjk namajtsk yø'ødyi jam tuu'am. Ka'ap idø'øn ja pyabøjkpitøjk y'ejxkapyidi kumi wenk idø'øn ja kyaxi'jky. <sup>13</sup>Jawaani y'ijty, jøts ku ja t'ejxkajptøø winets ja jatyi jam wyimbejtøø kyamjotp, jøts ja ñøjkxtøø Jerusalén ma ja myigu'uk ja t'atstukmadoowa'andi. Kuts ja jam yja'ttøø, winets ja myigu'uk ttukmadoodøø jøts ja nika' yjanchja'wiyi.

**Ku ja Jesús ttaguwa'anüyii'ñ ja tunk ja pyabøjkpitøjk**

<sup>14</sup>Waani et xøøw ñajxy, xjats ja Jesús ñanky'ejxkojmüyøø ku pyabøjkpitøjk ja jam wyinaty nimaktu'uk twindsøønidi ja kaabyajt; jamts ja møk'ampy twingugajpxiyii'ñ ja'agøjxp ku ja niti janchja'win tkamøøt'atti ku ja

jadine'en kyujuunidi, kumi ka'ap ja wyinaty tø tjanchjawidi ku ja yiktukmadoodøø jøts ku ja Jesús wyinaty tø yik'ixy, ku ja wyinaty tø jadigojk yujkpyiky. <sup>15</sup>Yide'en ja yiknimaadyøø:

—Niyø'øyigyøxti naxwii'ñit, jøts ja øgyajpxy jøts ja ømyadya'aky xkajpxwa'kxtit ma jaty ja jaa'y yujky'atti. <sup>16</sup>Pøni pøn øts xjanchja'wip jøts pøni pøn nøbajtp, ja' nøjkx nitso'ok'ajtp ja y'anmija'win; jøts pøni pøn øts xkajanchja'wip, ja' yiktagubatp ja pyøky. <sup>17</sup>Ja jaa'y pøn øts xjanchja'widip, yide'en idø'øn ttu'undit øts køjxp: Yikpidsø'ømdip ja' ja miku'; kyajpxtip ja wenk ayuujk ja'; <sup>18</sup>pøni ayo'ombattip ja', pøni tsu'utsidip ja' ja tsa'a'ñ adsu'jky, jøts pøni y'uuktip ja veneni ja', ka'ap idø'øn ja sa yjattit; jøts nayide'en ku pamaa'y ja ja'ayi tkønixajtit, jatyi ja tyiktso'oktit.

**Ku ja Jesús chajpejty**

<sup>19</sup>Xjats ku ja pyabøjkpitøjk ja jade'en t'luknimaay, winets ja chajpejty, ojts Dios Teety ja tsajpjøtpty yikpatøkiyi, jøts ja tpuwa'ltsiyii'ñ aga'ngyø'ampy. <sup>20</sup>Xjats ja pyabøjkpitøjk choo'ndøø, jøts ja ojts tkajpxwa'kxti ja øgyajpxy ja ømyadya'aky øy ma'dsoo. Ja nwindson'ajtim Jesucristo ja kø'øm pudøjkiyidip, jøts nay ja Jesús ja tmøøp ja myøk'ajtin jøts ja ttu'undit jade'en midi nipøn jaa'y ja naxwii'ñ kyajajtpy, paty ja mayjaa'y ja tjanchja'widi dø'øn ja pyabøjkpitøjk ja kyajpxy. Jade'en idø'øn ja y'ejxi.